

ଯୋହନ ଲିଖିତ ସୁସମାଚାର ଜହନ ରାଚାମାନି ନେହୁଁ କାରୁ ମୂଲୁ ହାଡ଼ା

ଜୀସୁ କ୍ରୀସ୍ତତି ଜୀଝୁ ଅଡ଼େ ଇ ଦାର୍ତତିତା ମାଟି କାତା ଜହନ ରାଚାମାନି ନେହୁଁ କାରୁ; ପୁଃନି ମେରାତି ସାରିଗଟା ନେହୁଁ କାରୁ ପତିୟାଁ ବିତ୍ରାଟି ଇଦି ଆହିମାନେ ର ପତି । ଏ ବାରେ ପତିୟାଁକ ନେହୁଁ କାରୁ ଇନେରି । ଏ ପତିୟାଁ ଜୀସୁ କ୍ରୀସ୍ତ ହାଡ଼ି ତାୟୁ ମାତିୟୁ, ମାର୍କ, ଲୁକ ଅଡ଼େ ଜହନ ରାଚାମାଚେରି । ପାଣ୍ଡିଆତି ଜହନ ଜୀସୁ କ୍ରୀସ୍ତ ଜାର୍ନାଆତି ୯୦ ବାର୍ଯା ତାୟୁ ଜହନ ରାଚାମାନି ନେହୁଁ କାରୁ ରାଚାମାଚେସି । ଇ ପତିତା ଜହନ ରାଚିତି କାତା ଝେସା ହିଲାଆତି ଜିକେଏ; ୧ଜହ୨ଜହ ଇଞ୍ଜା ଶଜହ ଆକୁ ସମାନା ମାନୁ । ଜହନ ଏପିସିୟୁ ଗାଡ଼ାତା ମାଚାକି ଇ ପତି ଏପିସତା ରାସ୍କି ଆହାମାନେ ଇଞ୍ଜିହୁଁ ଇନେରି ।

ଜୀସୁକ୍ କ୍ରୀସ୍ତ ଜୀଝୁତି ମାହାପୁରୁ ମୀର୍ଏସି ଇଞ୍ଜିହୁଁ ଲକୁ ଏନିକ୍ ନାମିନେରି, ଏଦାଆଁତାକି ଜହନ ଇ ପତି ରାଚାମାଚେସି ୨୦:୩୧ । ଇଦାଆଁ ନାମାହାଁ ଏଝାଣି ଦରୁତଲେ ମାର ଜୀଝୁ ବେଟାଆନାୟି । ଇ ପତି ଜୀହୁଦି ଅଡ଼େ ଜୀହୁଦିଆଆତି ଲକୁତାକି ରାସ୍କି ଆହାମାଚେ । ଜହନ ରାଚାମାନି ନେହୁଁ କାରୁ ଏ ତାନିଗଟା ନେହୁଁ କାରୁ କିହାଁ ରଲେ ମାନେ । ଜହନ ଜୀସୁ କିତି କାବାଆନି କାମାୟାଁ ହାରେକା ରାଚାମାନେସି ସାମା ପୁଣ୍ଡିକିନି ପୁସପନିକା ହାରେକା ରାଚାହିଲଅସି । ଏଟକା ପତିୟାଁଣା ଜୀସୁ ବାପ୍ତିସ୍ତ ଅନାଣି ଅଡ଼େ ଲକୁ ହିଲାଆ ଚାୟୁତା ତାୟିପାରି ଆଡାଣି ରାସ୍କି ଆହାମାନେ ଏଦାଆଁ ଇ ପତିତା ରାସ୍କି ଆହା ହିଲେଏ ।

ପତିତା ମାନାୟି;

୧. ତଲିତି ହାଡ଼ା । ୧:୧-୧୮

୨. ବାପ୍ତିସ୍ତ ହାନି ଜହନ ଅଡ଼େ ଜୀସୁତି ମୂଲୁ ସୀସୁୟାଁ । ୧:୧୯-୫୧

୩. ଜୀସୁ ସେବା କାମା ମାଟ୍ନାୟି । ୨:୧-୧୨:୫୦

୪. ଜିରୁସାଲମ ଅଡ଼େ ଦାରିମାରି ଜୀସୁତି କାମା । ୧୩:୧-୧୯:୪୨
 ୫. ଜୀସୁ ହାକିଟି ଖେଣ୍ଡେ ନିଜିନାୟି ଅଡ଼େ ସୀସୁୟାଁଇଁ ତଞ୍ଜା ଆନାୟି । ୨୦:୧-୩୧
 ୬. ଗାଲିଲିତା ଖେଣ୍ଡେ ତଞ୍ଜା ଆନାୟି । ୨୧:୧-୨୫

ଜୀସୁତି ବଲୁ

୧ ମୂଲୁଏ ବଲୁ ମାତେ, ବଲୁ ମାହାପୁରୁ ତଲେ ମାତେ, ଏ ବଲୁଏ ମାହାପୁରୁ ମାତେସି । ୨ ମୂଲୁଏ ଏ ବଲୁ ମାହାପୁରୁ ତଲେ ମାତେ । ୩ ଏ ବଲୁ ତଲେ ମାହାପୁରୁ ବାରେ ଗାଡ଼ିକିତେସି; ଅଡ଼େ ଏନାୟି ବାରେ ଗାଡ଼ି ଆହାମାନେ, ଏ ବିତ୍ରାଟି ରଣ୍ଡି ଜିକେଏ ଏ ବଲୁ ପିସପେ ରାଡ଼ି ଆହା ହିଲେଏ । ୪ ଏ ବଲୁତା ଜୀସୁ ମାତେ ଅଡ଼େ ଏ ଜୀସୁ ମାଣ୍ଡସିୟାତି ଉଜେଡ଼ି । ୫ ଏ ଉଜେଡ଼ି ଆନ୍ଦେରିତା ତଞ୍ଜିହ୍ ଖାହ୍ମାନେ, ଇଞ୍ଜା ଆନ୍ଦେରି ଏଦାଆଁ ଏରେଲା ଜିକେଏ ଅପାହିଲେଏ ।

୬ ☆ମାହାପୁରୁ ତାଣାଟି ତାନି କାରୁ ଖେହ୍ନାଣାଇଁ ପାଣ୍ଡାତେସି; ଏଞ୍ଜାଣି ଦରୁ ଜହନ । ୭ ଏଞ୍ଜାସି ଉଜେଡ଼ିତି କାତା ଲକୁଇଁ ଖେସାଲି ଖାଡ଼େସି, ଅଡ଼େ ଏନିକିହ୍ ବାରେଜାଣା ଏଞ୍ଜାଣି ତାଣାଟି ନାମିନେରି, ଏଦାଆଁତାକି ଏଞ୍ଜାସି ସାକି ହାହାଲି ଖାଡ଼େସି । ୮ ଏଞ୍ଜାସିଏ ତାନୁଏ ଉଜେଡ଼ି ହିଲାଆତେସି; ସାମା ଏଞ୍ଜାସି ଏ ଉଜେଡ଼ିତି କାତା ଖେସାଲି ଖାଡ଼େସି । ୯ ଏମିନି ସାତା ଉଜେଡ଼ି ବାରେ ଲକୁକି ଉଜେଡ଼ି ହାନେ, ଏଞ୍ଜାସି ଦାର୍ଡିତା ଖାଡ଼େସି ।

୧୦ ଏଞ୍ଜାସି ଦାର୍ଡିତା ମାତେସି ଅଡ଼େ ଏଞ୍ଜାଣି ତାଣାଟି ଦାର୍ଡି ବାରେ ରାଡ଼ି ଆଡ଼େ, ଆଡ଼ିଜିକେଏ ଇ ଦାର୍ଡି ଏଞ୍ଜାଣାଇଁ ପୁଞ୍ଜାଲି ଆଡ଼ାଆଡ଼େ । ୧୧ ଏଞ୍ଜାସି ତାନି ରାଜିତା ଖାଡ଼େସି, ଆଡ଼ିଜିକେଏ ତାନି ଜାହାରା ଲକୁ ଏଞ୍ଜାଣାଇଁ ଆବାଆଡ଼େରି । ୧୨ ଆମ୍ବାଆରି ଏଞ୍ଜାଣାଇଁ ଆବିତେରି ଇଞ୍ଜା ଏଞ୍ଜାଣି ତାଣା ନାମିତେରି; ଏଞ୍ଜାସି ଏଞ୍ଜାରାଇଁ ମାହାପୁରୁତି ମୀର୍କା ମାସ୍କା ଆହାଲି ଅଦିକାରା ହାତେସି । ୧୩ ମାଣ୍ଡସିତି ତାଞ୍ଜିୟାଁ ତାଣାଟି ଜାର୍ନା ଆତାକି ଏଞ୍ଜାରି ମାହାପୁରୁତି ମୀର୍କା ଆହାହିଲଅରି, ମାହାପୁରୁ ତାନୁଏ ଏଞ୍ଜାରି ତାଞ୍ଜି ଆଡ଼େସି ।

☆ ୧:୬ ୧:୬ ମାଡି ୩:୧; ମାର୍କ ୧:୪; ଲୁକ ୩:୧,୨

୧୪ ଅଡ଼େ, ଏ ବଲୁ ମାଣ୍ଡସି ଖାଣା ଆଡ଼େ, ମାହାପୁରୁତି କାର୍ମା ଇଞ୍ଜା ସାତା ତଲେ ମା ତାଣା ବାସା କିତେସି, ଅଡ଼େ ଆବା ତାଣାଟି ଖାହାମାନି ରଣ୍ଡିଏ ମୀର୍ଏଣାତି ଗାଝୁରମି ଲେହେଁ ମାର ଏଝାଣି ଗାଝୁରମି ମେସ୍ତାୟି ।

୧୫ ଜହନ ଏଝାଣି କାତାତି ସାକି ହୀହାନା କାଜା ଗିୟାତଲେ ଏଲେଇଚେସି, “ଆମ୍ବାଆସି ନା ତାୟୁ ଖାହାମାନେସି, ଏଝାସି ନା କିହାଁ କାଜାସି, ଏନାଆଁତାକି ଇଚିହଁ ଏଝାସି ନାନୁ ଜାର୍ନାଆତି ନକେଏ ମାଚେସି, ଇଞ୍ଜି ଏଝାଣି କାତା ନାନୁ ତଲିଏ ଏଲେଇଞ୍ଜି ଝେସାମାଞ୍ଜାତେସି, ଏଝାସିଏ ଇଝାସି ।”

୧୬ ଏନାଆଁତାକି ତାନୁ ପୁରା କିନି ତାଣାଟି ମାର ବାରେ ଜାଣାତାୟି ବାରେ ବେଟାଆହାନା, କାର୍ମା ମୁହେଁ କାର୍ମାମେହନାଣି ବେଟାଆହାମାନାୟି । ୧୭ ମାହାପୁରୁ ମସା ତାଣାଟି ମେରା ହିୟାତେସି, ସାମା ଜାସୁ କ୍ରୀସୁ ତାଣାଟି କାର୍ମାମେହନାୟି ଅଡ଼େ ସାତା ଖାଡ଼େ । ୧୮ ଆମ୍ବାଆସି ଏଚେଲା ମାହାପୁରୁଇଁ ମେସାହିଲଅସି, ତାନିତଲେ ମାନି ରଣ୍ଡିଏ ମୀର୍ଏସି ଏଝାସି ମାହାପୁରୁ ଆବାଇଁ ପୁଣ୍ଡି କିହାମାଞ୍ଜାନେସି ।

ବାପ୍ତିସ୍ମ* ହାନି ଜହନତି କାରୁ

(ମାତି ୩:୧-୧୨; ମାର୍କ ୧:୧-୮; ଲୁକ ୩:୧-୧୮)

୧୯ ନାନୁ ଆମ୍ବାଆତି ଇଞ୍ଜି ଜହନଇଁ ଝେଞ୍ଜାଲି ଜାହୁଦିୟାଁ ଏଚିବେଲା ଜିରୁସାଲମତି କାଜା ପୁଜେରାକ୍ମା ଇଞ୍ଜା ଲେବିୟକାଣି ଜହନ ତାଣା ପାଣ୍ଡିତେରି, ଏଝାସି ଇ କାତା ଝେସ୍ତେସି ।

୨୦ ଜହନ ସାତା କାତା ଝେସ୍ତେସି, ଆଏ ଇଞ୍ଜି ଇନାଆତେସି, ତୀର୍ପୁତଲେ ଝେସ୍ତେସି, “ନାନୁ ମସିହା ଆଏ ।”

୨୧ ଏଝାରି ଏଝାଣାଇଁ ଝେଚେରି, ଆତିହଁ “ନାନୁ ଆମ୍ବାଆତି ? ନାନୁ ଏନାଆଁ ଏଲିୟତି କି ?”

ଜହନ ଏଲେଇଚେସି, “ନାନୁ ଏଲିୟତେସି ଆଏ ।”

ଏଝାରି ଝେଚେରି, “ନାନୁ ଏନାଆଁ ମାହାପୁରୁ ଅଣ୍ପୁତି ବଲୁ ଝେହନାତି କି ?” ଏଝାସି ଏଲେଇଚେସି, “ନାନୁ ଆଏ ।”

* ୧:୧୮ ୧:୧୯ ମୁଞ୍ଜିନାୟି

୨୨ ଏମ୍ବାଟିଏ ଏଞ୍ଜାରି ଏଞ୍ଜାଣାଇଁ ଏଲେଇଚେରି, “ମାଲୋ ଖେସ୍ତାମ୍ବୁ, ମାମ୍ବୁମାଲୋ ପାଣ୍ଡା ମାଞ୍ଜାନାରାଇଁ ଏନ୍ତି କାତା ଖେହ୍ନମି । ନୀନୁ ଆମ୍ବାଆତେଏଁ ଇଞ୍ଜିଁ ଖେସାକଡିମାଞ୍ଜି ?”

୨୩ ଜହନ ଏଲେଇଚେସି, “ମାହାପୁରୁ ଅଣ୍ପୁତି ବଲୁ ଖେହ୍ନି ଜିସାୟ ଏନିକିଁ ଜଲମାଚେସି, ‘ନୀନୁ ଲକୁ ହିଲାଆ ଟାୟୁତା କାଜା ଗିୟାତଲେ କାଲୁଞ୍ଜି ଆହିମାନି ରଅଣି ହାଡାଲେହେଁ ତାତେଏଁ, ପ୍ରବୁତି ଜିରୁ ସଲକେ କିଦୁ ।’”

୨୪ ଅଡେ, ପାରୁସିୟାଁ ବିତ୍ରାଟି ଏଚରଜାଣା ପାଣ୍ଡୁଞ୍ଜି ଆହାମାଚେରି, ୨୫ ଏଞ୍ଜାରି ଜହନଇଁ ଖେଚେରି, “ନୀନୁ କ୍ରୀସ୍ତ କି ଏଲିୟ କି ମାହାପୁରୁ ଅଣ୍ପୁତି ବଲୁ ଖେହ୍ନାତି ଆଏ, ଆତିହଁ ନୀନୁ ଏନାଆଁତାକି ବାପ୍ରିସ୍ତାଁ ହାହିମାଞ୍ଜି ?”

୨୬ ଜହନ ଏଞ୍ଜାରାଇଁ ଏଲେଇଚେସି, “ନୀନୁ ଏୟୁତା ବାପ୍ରିସ୍ତାଁ ହାହିମାଇଁ; ଆମ୍ବାଆରାଇଁ ମୀରୁ ପୁଞ୍ଜାହିଲଅତେରି, ଏଞ୍ଜାସି ମୀ ବିତ୍ରା ମାନେସି । ୨୭ ଏଞ୍ଜାସି ନା ଡାୟୁ ଖାହିମାନେସି, ନୀନୁ ଏଞ୍ଜାଣି ସେପୁୟାଁତି ଡକା ଜିକେଏ ହୁକହାଲି ଜଚେ ଆଏ ।”

୨୮ ଏମିନି ଜର୍ଦନ କାତାତି ଖେଡା ହପୁଞ୍ଜାକିତି ବେତନିୟାଁତା ଜହନ ବାପ୍ରିସ୍ତାଁ ହାହିମାଚେସି, ଏ ଟାୟୁତା ଇ ବାରେ ଆହାମାଚେ ।

ମାହାପୁରୁତି ମେଣ୍ଡା ଡାଲୁ

୨୯ ଏ ଅର ନେରୁ ଜହନ ଜୀସୁଇଁ ତାନି ଖାକି ଖାହିମାନାଣି ମେସାନା ଏଲେଇଚେସି, “ସିନିକିଦୁ ମାହାପୁରୁତି ମେଣ୍ଡା ଡାଲୁ, ଆମିନିଗାଟାସି ଇ ଦାରଡିତି ପାପୁ ବାରେ ଡେକା ଅନେସି । ୩୦ ଇଞ୍ଜାସିଏ ଏଞ୍ଜାସି, ଆମ୍ବାଆରି କାତା ନୀନୁ ଖେସାମାଞ୍ଜାତେଏଁ, ‘ର ମାଣ୍ଡି ନା ଡାୟୁ ଖାହିମାନେସି, ସାମା ଏଞ୍ଜାସି ନା କିହାଁ କାଜାସି, ଇଞ୍ଜା ଏଞ୍ଜାସି ନୀନୁ ଜାର୍ନାଆଡି ନକେଏ ମାଚେସି ।’ ୩୧ ନୀନୁ ଜିକେଏ ଏଞ୍ଜାଣାଇଁ ପୁଞ୍ଜା ହିଲାଆତେଏଁ, ସାମା ଏଞ୍ଜାସି ଏନିକିହଁ ଇସାୟେଲ ଲକୁ

† ୧:୨୫ ୧:୨୫ ମୁଞ୍ଜିନାୟି ‡ ୧:୨୭ ୧:୨୭ ମୁଞ୍ଜିନାୟି § ୧:୨୮ ୧:୨୮ ମୁଞ୍ଜିନାୟି

ନକିତା ତଞ୍ଜାଆନେସି, ଇଦାଆଁତାକି ନାନୁ ଏୟୁତା ବାପ୍ତିସ୍ତ* ହୀହାଲି
ଝାହାମାଲ୍ ।”

୩୨ ଅଡେ ଜହନ ସାକି ହୀହାନା ଝେସ୍ତେସି, “ନାନୁ ସୁଦୁଜୀଝୁ
ପାରୁଝା ପଟାଲେହେଁ ଲାକପୁରୁଟି ରେଚା ଝାହିମାନାଣି ମେସ୍ତେସି,
ଇଞ୍ଜା ଏଦି ଏଝାଣିଲାକ କୁରିତେ । ୩୩ ନାନୁ ଜିକେଏ ଏଝାଣାଲ୍ ପୁଞ୍ଜା
ହିଲାଆତେସି, ସାମା ଆମ୍ବାଆସି ନାଜେ ଏୟୁତା ବାପ୍ତିସ୍ତ† ହୀହାଲି
ପାଣ୍ଡାମାଞ୍ଜାନେସି, ଏଝାସି ନାଜେ ଝେସ୍ତାତେସି, ଆମିନିଗାଟାଣି ଲାକ
ସୁଦୁଜୀଝୁ ରେଚା ଝାନାଣି ଅଡେ କୁରିନାଣି ମେହ୍ଦି, ଆମ୍ବାଆସି
ସୁଦୁଜୀଝୁ ତଲେ ବାପ୍ତିସ୍ତ‡ ହୀନେସି, ଏଝାସି ଏ ମାଣ୍ଡସି ।” ୩୪ ଜହନ
ଏଲେଇଚେସି, “ନାନୁ ଏଦାଆଁ ମେସାମାଲ୍, ଏଦାଆଁତାକି ନାନୁ ମିଙ୍ଗ
ଝେସିମାଞ୍ଜାଲ୍, ଏଝାସି ମାହାପୁରୁ ମୀରଏସି ।”

ଜୀସୁତି ମୂଲୁ ସୀସୁ

୩୫ ତାନି ଅର ନେରୁ ଜହନ ତାନି ରୀ ସୀସୁୟାଁ ତଲେ ନିଚାମାଚେସି;
୩୬ ଏଝାସି ଜୀସୁଲ୍ ଏ ଜିରୁଟି ହାଜିମାନାଣି ମେସାନା ଏଲେଇଚେସି,
“ସିନିକିଦୁ ମାହାପୁରୁଟି ମେଣ୍ଡା ତାଲୁ !”

୩୭ ଏ ରୀ ସୀସୁୟାଁ ଏଝାଣି ହାଡ଼ା ଝେଞ୍ଜାନା ଜୀସୁ ଜେଚ ଜେଚ
ହାଚେରି । ୩୮ ଜୀସୁ ଝେଣ୍ଡେ ତିରଝାନା ଏଝାରାଲ୍ ତାନି ଜେଚ ଜେଚ
ହାଜିମାନାଣି ମେସାନା ଝେଚେସି, “ମୀରୁ ଏନାଆଁ ପାରିମାଞ୍ଜେରି ?”
ଏଝାରି ଝେଚେରି, “ରାବିର୍ସି ନୀନୁ ଆମ୍ବିୟା ତ୍ତୟିମାଞ୍ଜି ?”

୩୯ ଜୀସୁ ଏଝାରାଲ୍ ଏଲେଇଚେସି, ଝାଦୁ, ମେହ୍ଦେରି । ଏମ୍ବାଟିଏ
ଏଝାରି ହାଜାନା ତାନି ତ୍ତୟିନି ଟାୟୁ ମେସ୍ତେରି, ଇଞ୍ଜା, ଏ ଦିନା
ଏଝାଣିତଲେ ତ୍ତୟିତେରି; ଏନାଆଁତାକି ଇଚିହ୍ଁ ଏଚିବେଲା ଲାଈତି
ଦସି ଟାଟା ଆହାମାଚେ ।

୪୦ ଜହନତି କାତା ଝେଞ୍ଜାନା ଆମିନି ରିଆରି ଜୀସୁ ଜେଚ ଜେଚ
ହାଜାମାଚେରି, ଏଝାରି ବିତ୍ତା ରଅସି ସିମନ ପିତରତି ତାୟି ଆହିୟ
ମାଚେସି । ୪୧ ଏଝାସି ତଲିଏ ତାନି ତାୟି ସିମନଲ୍ ମେସାନା
ଏଲେଇଚେସି, “ମାମ୍ବୁ ମସିହାଲ୍* ମେସ୍ତମି ।” ୪୨ ଆହିୟ ସିମନଲ୍

* ୧:୩୧ ୧:୩୧ ମୁଞ୍ଜିନାୟି † ୧:୩୩ ୧:୩୩ ମୁଞ୍ଜିନାୟି ‡ ୧:୩୩ ୧:୩୩ ମୁଞ୍ଜିନାୟି
§ ୧:୩୮ ୧:୩୮ ଗୁରୁ * ୧:୪୧ ୧:୪୧ ମସିହାତି ଇଚିହ୍ଁ କ୍ରୀସୁ

ଜୀସୁ ତାଣା ତାତେସି । ଜୀସୁ ଏଝାଣାଙ୍କୁ ଆଟେ ସିନିକିହାନା ଏଲେଇଚେସି, “ନୀନୁ ଜହନ ମୀରୁଏଣା ସିମନତି । ନୀନୁ କେପା† ଦରୁଟି ଝେଙ୍ଗିଦି ।”

ଜୀସୁ ପିଲିପ ଅଡ଼େ ନିତନିୟେଲଙ୍କୁ ହାଟିନାୟି

୪୩ ଅର ନେରୁ ଜୀସୁ ଗାଲିଲିତା ହାଜାଲି ଅଣ୍ଡପିତେସି, ଏଝାସି ପିଲିପଙ୍କୁ ମେସାନା ଏଲେଇଚେସି, “ନା ଜ୍ଞେତ ଝାମ୍ବୁ !” ୪୪ ପିଲିପ ବେଦସାୟିଦା ଗାଡ଼ାତାସି ମାଚେସି, ଏଦି ଆନ୍ଦିୟ ଇଞ୍ଜା ପିତରତି ଗାଡ଼ା ମାଚେ । ୪୫ ପିଲିପ ନିତନିୟେଲଙ୍କୁ ମେସାନା ଏଝାଣାଙ୍କୁ ଏଲେଇଚେସି, “ଆମ୍ବାଆରି କାତା ମସାତି ମେରାତା ରାଟାମାନେରି, ଅଡ଼େ, ମାହାପୁରୁ ଅଣ୍ଡପୁତି ବଲୁ ଝେହ୍ନାରି ଜିକେଏ ରାଟାମାନେରି, ମାମ୍ବୁ ଏଝାଣାଙ୍କୁ ବେଟାଆହାମାନମି । ଏଝାସି ଜସେପ ମୀରୁଏସି ନାଜ୍ଜରିତତି ଜୀସୁ ।”

୪୬ ନିତନିୟେଲ ଏଝାଣାଙ୍କୁ ଝେଚେସି, “ନାଜ୍ଜରିତତା କି ଏନି ନେହୁଁ କାମା ଆହିମାନେ ?”

ପିଲିପ ଏଲେଇଚେସି, “ଝାହାନା ସିନିକିମୁ ।”

୪୭ ଜୀସୁ ନିତନିୟେଲଙ୍କୁ ତାନି ତାଣା ଝାହିମାନାଣି ମେସାନା ଜୀସୁ ଏଝାଣି କାତା ଝେସ୍ତେସି, “ମେହ୍ନୁ ଇଝାସି ସାତା ତଲେ ଇସ୍ରାୟେଲତି ଲକୁ; ଇଝାଣି ତାଣା ଏନାୟି ନାଡ଼ିକିନି ବୁଦି ହିଲେଏ !”

୪୮ ନିତନିୟେଲ ଜୀସୁଙ୍କୁ ଝେଚେସି, “ନୀନୁ ନାଙ୍ଗେ ଏନିକିହୁଁ ପୁଞ୍ଜାତି ?”

ଜୀସୁ ଏଲେଇଚେସି, “ପିଲିପ ନିଙ୍ଗେ ହାଟାତି ନକେଏ ନୀନୁ ତୟା ମାରୁନୁ ଡ଼ଇ ମାତି, ଏଚେତା ନୀନୁ ନିଙ୍ଗେ ମେସାମାଞ୍ଜାତେଏ ।”

୪୯ ନିତନିୟେଲ ଏଲେଇଚେସି, “ଏ ଗୁରୁ ନୀନୁ ମାହାପୁରୁ ମୀରୁଏଣାତି ! ନୀନୁଏ ଇସ୍ରାୟେଲ ରାଜାତି ।”

୫୦ ଜୀସୁ ଏଲେଇଚେସି, “ନୀନୁ ନିଙ୍ଗେ ତୟା ମାରୁନୁ ଡ଼ଇ ମେସ୍ରାତେଏ ଇଞ୍ଜୁଁ ଝେସାଲିଏ ନୀନୁ ନାମିମାଞ୍ଜି ?” ନୀନୁ ଇଦାଆଁ କିହାଁ ହାରେକା କାଜା କାମାୟାଁ ମେହ୍ଦି । ୫୧ ଜୀସୁ ନିତନିୟେଲଙ୍କୁ ଏଲେଇଚେସି, “ନୀନୁ ନିଙ୍ଗେ ସାତା ଝେସିମାଞ୍ଜାଙ୍କୁ ନୀନୁ ଲାକପୁରୁ

† ୧:୪୨ ୧:୪୨ କେପା ଇତିହୁଁ ପିତର

ଦେପିଆହାମାନାଣି ଇଞ୍ଜା ମାଣ୍ଠି ମୀରଏଣା ତାଣା ମାହାପୁରୁତି ଦୁରୁୟା ଲାକ ହାଜିମାନାଣି ଅଡ଼େ ଡ଼ଇ ଖାହିମାନାଣି ମେହ୍ଦି ।”

୨

କାନା ଗାଡ଼ାତି ବୀହା ବଜିତା ଜୀସୁ

^୧ ତାନି ଦିନା ଜେଟ ଗାଲିଲିତି କାନା ଗାଡ଼ାତା ର ବୀହା ମାଟେ, ଜୀସୁ ତାନି ଇୟା ମରିୟମ ଜିକେଏ ଏମ୍ବାଆଁ ମାଟେ; ^୨ ଜୀସୁ ଜିକେଏ ତାନି ସୀସୁୟା ତଲେ ବୀହାତା ହାଜାଲି ହାଟୁକି ଆହାମାଟେସି । ^୩ ଏରିବେଲା ଅଜୁରି ରାସା ରାହାହାଟୁ, ଜୀସୁଇଁ ତାନି ଇୟା ଏଲେଇଟେ, “ଏଞ୍ଜାରି ଅଜୁରି ରାସା ରାହାହାଟୁ ।”

^୪ ଏମ୍ବାଟିଏ ଜୀସୁ ତାନି ଇୟାନି ଏଲେଇଟେସି, “ଇୟା, ନୀନୁ ନାଜେ ଏନାଆଁ କିନାୟିମାନେ ଏନାଆଁକି ଖେସିମାଞ୍ଜାଦି ? ନା କାଲା ନୀର୍ବ ପାତେକା ଖାହିଲେଏ ।”

^୫ ଜୀସୁ ତାନି ଇୟା କାମା କିନାରାଇଁ ଏଲେଇଟେ, “ଏଞ୍ଜାସି ମିଜେ ଏନାଆଁ ଖେସ୍ତାନେସି ଏଲେକିହିଁଏ କିଦୁ ।”

^୬ ଅଡ଼େ, ଏମ୍ବାଆଁ ଜୀହୁଦିୟା ସୁଦୁ କିହାଲି ନରନ୍ତି ମେରାତାକି ସ ଗଟା କାଜା ଖାଲକାତି ଏୟୁ ଗୁନାୟା ମାଟୁ । ^୭ ଜୀସୁ ହଲିୟାଜାଣି ଏଲେଇଟେସି, “ଇ ଗୁନାୟାଣା ଏୟୁ ନେଞ୍ଜିକିଦୁ ।” ଏଞ୍ଜାରି ଏମ୍ବାଆଁ ନେଞ୍ଜିକିତେରି । ^୮ ଜୀସୁ ଏଞ୍ଜାରାଇଁ ଏଲେଇଟେସି, “ଇମ୍ବାଟି ଇଟରା ଅହାନା ବଜିତି ଗୁମୁସ୍ତାକି ହୀଦୁ ।” ଏମ୍ବାଟିଏ ଏଞ୍ଜାରି ଅଡ଼େଟି । ^୯ ବଜିତି ଗୁମୁସ୍ତା ଅଜୁରି ରାସା ଆହାମାନି ଏ ଏୟୁତି ଖାଣ୍ଡାହାଁ ଏଞ୍ଜି ଏମ୍ବିଟି ତାପିଆଟୁ, ପୁଞ୍ଜା ହିଲାଆଟେସି । ସାମା ଏ ହଲିୟାଜା ଏୟୁ ଖାକହା ମାଟାରି ପୁଞ୍ଜାମାଟେରି ଏଦାଆଁତାକି ହନେଏଣାଇଁ ହାଟାହାଁ ଏଲେଇଟେସି । ^{୧୦} ବାରେଜାଣା ତଲିଏ ନେହିଁ ଅଜୁରି ରାସା ହୀନେରି ଅଡ଼େ ଏମ୍ବାଆଁ ଖାହାଡ଼ୟିନି ଲକୁ ହଡ଼ିସାରେ ଡାୟୁ ଲାଗେଏତି ଅଜୁରି ରାସା ହୀନେରି; ସାମା ମୀରୁ ବାରେ ନେହିଁ ଅଜୁରି ରାସା ନୀର୍ବ ପାତେକା ଇଟାମାଞ୍ଜେରି ।

^{୧୧} ଜୀସୁ ଇଲେକିଁ ଗାଲିଲିତି କାନା ଗାଡ଼ାତା କାବାଆନ୍ତି କାମା ମାଟୁହାନା ତାନି ଗାଞ୍ଜୁରମି ତସ୍ତେସି, ଅଡ଼େ ସୀସୁୟା ଏଞ୍ଜାଣି ତାଣା ନାମିତେରି ।

୧୭ ☆ଏଦାଆଁ ତାୟୁ ଜୀସୁ ତାମି ଇୟା, ତାୟିୟାଁ ଅଡ଼େ ସୀସୁୟାଁ ତଲେ କପରନାହୁମତା ହାଚେରି; ଇଞ୍ଜାଁ ଏମ୍ବାଆଁ ହାଡ଼େକା ଦିନା ଡୟାଆଡେରି ।

ଜୀସୁ ଜିରୁସାଲମତା ହାନାୟି

(ମାତି ୨୧:୧୨-୧୩; ମାର୍କ ୧୧:୧୫-୧୭; ଲୁକ ୧୯:୪୫-୪୭)

୧୩ ଏଚିବେଲତା ଜୀହୁଦିଜା ପିସ୍ପିଆନି ପାରୁଁ ତାଗେ ଆହାମାଚେ, ଅଡ଼େ ଜୀସୁ ଜିରୁସାଲମତା ହାଚେସି । ୧୪ ଏମ୍ବାଆଁ ଜୀସୁ ମେସ୍ତେସି, ମାହାପୁରୁ ଇଲୁ ବିତ୍ରା ଲକୁ କଡ଼ିୟାଁ ମେଶ୍ତାୟାଁ ଅଡ଼େ ପଟାୟାଁ ବେବାରା କିନାରି ଅଡ଼େ ତାରୁୟାଁ ବେବାରା କିନାରି କୁଗାମାଚେରି; ୧୫ ଏମ୍ବାଟିଏ ଜୀସୁ ଡରିତି ସାଟ୍ଟି କେପାନା କଡ଼ିୟାଁ, ମେଶ୍ତାୟାଁ ମାହାପୁରୁ ଇଲୁଟି ପାଜାତା ପେରହା ପାଣ୍ଡା ଟାକାୟାଁ ବେବାରା ଗାଟାରି କୁଚିୟାଁ ଡିରିମ୍ପିପହାନା ଟାକାୟାଁ ବାରେ ଡାଞ୍ଜିତେସି । ୧୬ ପଟାୟାଁ ବେବାରା ଗାଟାରିଆଁ ଏଲେଇଚେସି, “ଇ ବାରେତି ଇମ୍ବାଟି ଅହାଡ଼ୁକୁ, ନା ଆବା ଇଲୁତି ବେବାରା ଇଲୁ କିଆଦୁ ।” ୧୭ ଇଦାଆଁ ମେସାନା ସାସ୍ତେରିତା ରାସକି ଆହାମାନି ର କାତା ସୀସୁୟାଁ ମନତା ଖାଡ଼େ, “ନୀ ଇଲୁତାକି ନା ରାହାଁ ନାଜେ ହାଡ଼େକା ନାସା କିୟାନେ ।”

୧୮ ଜୀହୁଦିୟାଁ ଜୀସୁଇଁ ଖେଚେରି, “ନୀନୁ ଇ ବାରେ କାମା କିହାଲିତାକି ଅଦିକାରା ବେଟାଆହାମାଞ୍ଜି, ଏମ୍ବାତି ସିନା ମାଜେ ଏନାଆଁ ତସିମାଞ୍ଜାଦି ?”

୧୯ ☆ଜୀସୁ ଏଲେଇଚେସି, “ଇ ଦେଖୁଡ଼ିତି ନାସା କିଦୁ, ଅଡ଼େ ତାନି ଦିନାଟିଏ ନାନୁ ଏଦାଆଁ ଖେଶ୍ଟେ କେପିଇଁ ।”

୨୦ ଏଚେଟିଏ ଜୀହୁଦି ଲକୁ ଏଲେଇଚେରି, “ଏନାଆଁ ତାନିଦିନା ବିତ୍ରା ନୀନୁ ଇଦାଆଁ କେପାଲି ଆଡ଼ିଦି ? ଇ ଦେଖୁଡ଼ି କିହାଲିତାକି ରା କଡ଼ି ସ ବାର୍ସା ଆହାମାନେ ।”

୨୧ ସାମା ଜୀସୁ ଜାହାରା ଆଜା ଲେହେଁତି ଦେଖୁଡ଼ିତି ତସାନା ଇଦାଆଁ ଖେସାମାଚେସି । ୨୨ ଇଦାଆଁତାକି ଜୀସୁ ହାହାନା ନିଜାଲିଏ

☆ ୨:୧୨ ୨:୧୨ ମାତି ୪:୧୩ ☆ ୨:୧୯ ୨:୧୯ ମାତି ୨୭:୨୧; ୨୭:୪୦; ମାର୍କ ୧୪:୫୮; ୧୫:୨୯

ତାନି ସୀସୁୟାଁ ଜୀସୁ ଇ କାତା ୱେସାମାରେସି ଇଞ୍ଜିଅର୍ଣ୍ଣ ଅର୍ଣ୍ଣପିତେରି; ଅଡ଼େ ଦୀର୍ଣ୍ଣ ସାସ୍ତେରି ଅଡ଼େ ଜୀସୁ ୱେସାମାଟି କାତାତି ନାମିତେରି ।

ଜୀସୁ ଲକ୍ଷ୍ମି ଗୁଣ୍ଣ ପୁନାସି

୨୩ ପିସ୍ପିଆନ୍ତି ପାର୍ବୁ ଆହିମାଟି ବେଲାତା ଜିରୁସାଲମତା ଜୀସୁ ମାତାଟି ହାରେକା ତାନି କାବାଆନ୍ତି କାମା ମେସାନା ତାନି ଦରୁତା ହାରେକା ଜାଣା ନାମିତେରି । ୨୪ ସାମା ଜୀସୁ ଏ ଲକ୍ଷ୍ମି ନାମାଆନା ଏଞ୍ଜାରି ତାଣାଟି ଏଟକା ତୁୟିତେସି, ଏନାଆଁତାକି ଇତିହାସ୍ ଏଞ୍ଜାରାଈଁ ନେହ୍ କିଁ ପୁଞ୍ଜାମାରେସି । ୨୫ ଅଡ଼େ ଆମ୍ବାଆସି ମାଣ୍ଡସି କାତା ସାକି ହୀନେସି, ଇଦି ଏଞ୍ଜାଣାକି ଲଡ଼ା ହିଲାଆତେ, ଇତିହାସ୍ ମାଣ୍ଡସି ବିତ୍ରା ଏନାୟି ମାନେ ଏଞ୍ଜାସି ତାନୁଏ ପୁଞ୍ଜାଲି ଆଡ଼ିମାରେସି ।

୩

ଜୀସୁ ଅଡ଼େ ନିକଦିମ

୧ ପାରୁସିୟାଁ ଗତିଟି ନିକଦିମ ଇଞ୍ଜିଅର୍ଣ୍ଣ ର ମାଣ୍ଡସି ମାରେସି, ଏଞ୍ଜାସି ଜୀହୁଦି ଲକ୍ଷ୍ମି ସାଲଞ୍ଜି କିନାସି ମାରେସି । ୨ ଏଞ୍ଜାସି ଲାଆଁ ବେଲାତା ଜୀସୁ ତାଣା ୱାହାନା ଏଲେଇଚେସି, “ଏ ରାବି,* ମାମ୍ବୁ ପୁଞ୍ଜାମାନମି ନୀନୁ ମାହାପୁରୁ ପାଣ୍ଡାମାଞ୍ଜାନି ଗୁରୁ । ନୀନୁ ଆମିନି ବାରେ କାବାଆନ୍ତି କାମା କିହିମାଞ୍ଜି, ମାହାପୁରୁ ସାୟେମି ହିଲାଆସାରେ ଏଦାଆଁ ଆମ୍ବାଆରି କିହାଲି ଆଡ଼ଅରି ।”

୩ ଜୀସୁ ଏଞ୍ଜାଣାଈଁ ଏଲେଇଚେସି, ସାତା ସାତା ନାନୁ ନିଙ୍ଗ ୱେସିମାଞ୍ଜାଈଁ, ଅଡ଼େ ୱେଣ୍ଡେ ଜାର୍ନା ଆଆସାରେ ଆମ୍ବାଆସି ମାହାପୁରୁ ରାଜି ମେସାଲି ଆଡ଼ଅସି ।

୪ ନିକଦିମ ଏଞ୍ଜାଣାଈଁ ୱେଚେସି, “ରୁଡ଼ହା ଆଡ଼ିସାରେ ମାଣ୍ଡସି ଅଡ଼େ ୱେଣ୍ଡେ ଏନିକିଁ ଜାର୍ନା ଆହାଲି ଆଡ଼ିନେସି ? ତାଲିନି ବାଣ୍ଡିତା ହଡ଼ାନା ଏଞ୍ଜାସି ୱେଣ୍ଡେ ଜାର୍ନା ଆହାଲି ଆଡ଼ିନେସି ?”

୫ ଜୀସୁ ଏଲେଇଚେସି; “ସାତା ସାତା ନାନୁ ନିଙ୍ଗ ୱେସିମାଞ୍ଜାଈଁ” ଏୟୁ ଅଡ଼େ ସୁଦୁଜୀଞ୍ଜୁଟି ଜାର୍ନା ଆଆସାରେ ଆମ୍ବାଆସି ମାହାପୁରୁ ରାଜିତା ହଡ଼ାଲି ଆଡ଼ଅସି । ୬ ଆଜାଟି ଏନାୟି ଜାର୍ନା, ଏଡ଼ି

* ୩:୨ ୩:୨ ଗୁରୁ

ଆଜ୍ଞା; ଅଡ଼େ ସୁଦୁଜୀଝୁଟି ଏନାୟି ଜାର୍ନା ଆନେ, ଏଦି ସୁଦୁଜୀଝୁ । ୭ ନିଜେ ଝେଣ୍ଣେ ଜାର୍ନା ଆନାୟି ଲଡ଼ାମାନେ ଇଞ୍ଜି ନାନୁ ନିଜ଼ ଝେସ୍ତାତେଏଁ, ଏଦାଆଁତାକି କାବା ଆଆନି । ୮ ଗାଲି ଆମ୍ବିୟାଝାକି ମନ କିନେ, ଏତାଲା ଝାକି ହାନେ, ଅଡ଼େ ନୀନୁ ଝାରଇ ଏଦାନି ହାଡ଼ା ଝେଞ୍ଜାଲି ଆଡ଼ିଦି, ସାମା ଏଦି ଏମିନି ତାଣାଟି ଝାଡ଼େ ଅଡ଼େ, ଏମ୍ବିୟା ହାନେ, ଏଦାଆଁ ପୁନଅତି; ସୁଦୁଜୀଝୁଟି ଜାର୍ନା ଆହାମାନି ବାରେଜାଣା ଏଲେକିହଁଏ ।

୯ ନିକଦିମ ଏଝାଣାଇଁ ଏଲେଇଚେସି, “ଏଦି ଏନିକଁ ଆହାଲି ଆଡ଼ିନେ ?”

୧୦ ଜାସୁ ଏଝାଣାଇଁ ଏଲେଇଚେସି; “ନୀନୁ ଇସ୍ତାୟେଲତି ଗୁରୁ ଆହାନା ଜିକେଏ, ଇ ବାରେ ତେଲ୍‌ହି ହିଲଅତି କି ? ୧୧ ନାନୁ ନିଜ଼ ସାତା ଝେସିମାଞ୍ଜାଇଁ, ନାନୁ ଏନାଆଁ ପୁଞ୍ଜାମାଇଁ, ଏଦାନି କାତା ଝେସିମାଞ୍ଜାଇଁ, ଏନାଆଁ ମେସାମାଇଁ, ଅଡ଼େ ନୀନୁ ନା କାତା ନାମିହିଲଅତି । ୧୨ ନାନୁ ଦାରତି କାତାତି ଝେସ୍ତାସାରେ ନୀନୁ ନାମଅତି, ଆତିହଁ ଲାକପୁରୁତି ହାଡ଼ା ଝେସ୍ତାସାରେ ଏନିକଁ ନାମିଦି ? ୧୩ ଆମିନି ମାଣ୍‌ସି ମୀର୍‌ଏସି ଲାକପୁରୁଟି ରେଟା ଝାଡ଼େସି, ଏଝାଣି ପିସ୍‌ପେ ଅଡ଼େ ଆମ୍ବାଆସି ଲାକପୁରୁ ହାଜାହିଲଅସି ।”

୧୪ ଅଡ଼େ, ମସା ଏନିକଁ ଲକୁ ହିଲାଆ ଟାୟୁତା ପିତାଡ଼ା ରାଚୁତି ଲାକ ପେର୍‌ହା ମାଚେସି, ମାଣ୍‌ସି ମୀର୍‌ଏସି ଜିକେଏ ଏଲେକିହଁଏ ଲାକ ପେର୍‌ଝି ଆନେସି । ୧୫ ଏନିଇତିହଁ ଆମ୍ବାଆସି ତାନି ତାଣା ନାମିନେସି, ଏଝାସି କାଲାକାଲାତି ଜୀଝୁ ବେଟା ଆନେସି । ୧୬ ଇତିହଁ ମାହାପୁରୁ ଦାରତିତି ଏଚେକା ଜୀଝୁ ନଡ଼େସି, ଏଝାସି ତାନି ରଣ୍ଡିଏ ମୀର୍‌ଏଣାଇଁ ଦାନା ହାଡ଼େସି, ଏନିଇତିହଁ ଏଝାଣି ତାଣା ନାମିନାସି ନାସା ଆଆନା କାଲାକାଲାତି ଜୀଝୁ ବେଟା ଆନେସି । ୧୭ ଇତିହଁ ଦାରତିତା ନୀହାୟି କିହାଲିତାକି ମାହାପୁରୁ ତାନି ମୀର୍‌ଏଣାଇଁ ଦାରତିତା ପାଣ୍ଡାଆନା, ଦାରତି ଏନିକଁ ତାନିତାଣାଟି ଗେଲ୍‌ପିଆନେ, ଏଦାଆଁତାକି ତାନି ମୀର୍‌ଏଣାଇଁ ପାଣ୍ଡାତେସି ।

୧୮ ଆମ୍ବାଆସି ତାନି ତାଣା ନାମିନେସି, ଏଝାସି ନୀହାୟି କିଝି ଆଅସି ଆମ୍ବାଆସି ନାମଅସି, ଏଝାସି ନୀହାୟି କିଝି ଆଡ଼େସିଏ, ଏନାଆଁତାକି ଇତିହଁ ମାହାପୁରୁଟି ରଣ୍ଡିଏ ମୀର୍‌ଏଣା ଦରୁତି ନାମାହିଲଅସି ।

୧୯ ଅଡ଼େ ଏ ନୀହାଁୟି ଇଦି, ଇ ଦାରତିତା ଉଜେଡ଼ି ତଞ୍ଜା ଆହାମାନେ, ଅଡ଼େ ଲକୁ ଉଜେଡ଼ି ପିସାନା ଆନ୍ଦେରିତି ଜୀଞ୍ଜୁ ନଡ଼େରି, ଏଡ଼ାଆଁତାକି ଏଞ୍ଜାରି ବାରେ କାମା ଲାଗେଏତାୟି । ୨୦ ଇଚିହ୍ ଆମ୍ବାଆରି ଲାଗେଏତି କାମାକିନାରି, ଉଜେଡ଼ିତି ଅପଅରି, ଅଡ଼େ ଏଚେତା ତାମି ପାପୁ କାମା ତଞ୍ଜାଆନେ, ଏଡ଼ାଆଁତାକି ଉଜେଡ଼ିତା ଖାଅରି । ୨୧ ସାମା ଆମ୍ବାଆରି ସାତା କାମା କିନେରି, ଏଞ୍ଜାରି ଉଜେଡ଼ିତା ଖାନ୍ନେରି, ଏନିକ୍ ତାମି କାମା ବାରେ ମାହାପୁରୁ ତାଣାଟି ତୀରି ଆଡ଼ାୟି ଇଞ୍ଜି ତଞ୍ଜାଆନେ ।

ଜୀସୁ ଅଡ଼େ ଜହନ

୨୨ ଇଦାଆଁ ତାମୁ ଜୀସୁ ଅଡ଼େ ତାନି ସୀସୁୟାଁ ଜୀହୁଦା ରାଜିତା ହାଚେରି, ଅଡ଼େ ଏଞ୍ଜାସି ଏ ଗାୟୁତା ତୁୟାନା ବାପ୍ତିସ୍ମାଁ ହୀହାଲି ମାଟ୍‌ହେସି । ୨୩ ଜହନ ଜିକେଏ ସାଲମତି ତାଗେ ଏନନ୍‌ତା ବାପ୍ତିସ୍ମାଁ ହୀହିମାରେସି, ଇଚିହ୍ ଏମ୍ବାଆଁ ଗାଡ଼ି ଏମୁ ମାରୁ, ଅଡ଼େ ଲକୁ ଖାହାନା ବାପ୍ତିସ୍ମା ଅହିମାରେରି । ୨୪ ଏଚିବେଲା ପାତେକା ଜହନ କାୟିଦିତା ହାଜାହିଲାଆତେସି ।

୨୫ ଏମ୍ବାଟିଏ ଜହନତି ଏଚରଜାଣା ସୀସୁୟାଁ ର ଜୀହୁଦି ତଲେ ମେରାତାକି ନରନି କାତାତାକି ବାଦିବାଦା ଆଡ଼େରି । ୨୬ ଏଞ୍ଜାରି ଜହନଇଁ ଏଲେଇଚେରି, “ଗୁରୁ ଆମ୍ବାଆସି ଜର୍ଦନ କାତାତି ଅରଞ୍ଜାକି ନୀ ତଲେ ମାଚେସି, ଆମ୍ବାଆରି କାତା ନୀନୁ ସାକି ହୀହାମାଞ୍ଜାତି, ମେହ୍‌ମୁ ଏଞ୍ଜାସି ବାପ୍ତିସ୍ମାଁ ହୀହିମାଚେସି ଅଡ଼େ ବାରେଜାଣା ଏଞ୍ଜାଣି ତାଣା ହାଜିମାନେରି ।”

୨୭ ଜହନ ଏଲେଇଚେସି, “ଲାକପୁରୁଟି ମାହାପୁରୁ ହୀଆସାରେ ମାଣ୍‌ସି ଏନାଆଁ ମେଡ଼ାଆହାଲି ଆଡ଼ଅସି । ୨୮ ନୀନୁ କ୍ରୀସ୍ତେଏଁ ଆଏ, ସାମା ଏଞ୍ଜାଣି ନକିତା ପାଣ୍ଡୁଞ୍ଜି ଆହାମାଇଁ, ଇ କାତା ନୀନୁ ମିଙ୍ଗେ ଖେସାମାଞ୍ଜାତେଏଁ ଇଞ୍ଜି ମୀରୁ ନା ସାକି । ୨୯ ମାକ୍‌ମାନି ଅନାସି, ଏଞ୍ଜାସି ହନେଏସି, ସାମା ହନେଏଣି ଏମିନି ତଡ଼ ନ୍ରିତାନା ତାନି ହାଡ଼ା ଖେନେସି, ଏଞ୍ଜାସି ହନେଏଣି ହାଡ଼ା ଖେଞ୍ଜାନା ହାରେକା ରାହାଁ ଆନେସି

† ୩:୨୨ ୩:୨୨ ମୁଞ୍ଜିନାୟି ‡ ୩:୨୩ ୩:୨୩ ମୁଞ୍ଜିନାୟି § ୩:୨୭ ୩:୨୭ ମୁଞ୍ଜିନାୟି

☆ ୩:୨୮ ୩:୨୮ ଜହ ୧:୨୦

। ଏଲେକିହି ଏ ନା ରାହାଁ ଜିକେଏ ପୂରା ଆଡେ । ୩୦ ସାତେଏ ଏଞ୍ଜାସି କାଜାସି ଆନାୟି ମାନେ, ଅଡେ ନାଜେ ଉଣା ଆନାୟି ମାନେ ।”

ଲୀକପୁରୁଟି ଖାନସି

୩୧ ଆମ୍ବାଆସି ଲୀକପୁରୁଟି ଖାନେସି, ଏଞ୍ଜାସି ବାରେକିହାଁ କାଜାସି, ଆମ୍ବାଆସି ଦାର୍ଡିତି ଜାର୍ନା ଆନେସି, ଏଞ୍ଜାସି ଦାର୍ଡିତି କାତା ଖେହ୍ନେସି; ଆମ୍ବାଆସି ଲୀକପୁରୁଟି ଖାନେସି ଏଞ୍ଜାସି ବାରେଜାଣା କିହାଁ କାଜାସି । ୩୨ ଏଞ୍ଜାସି ଏନାଆଁ ମେସାମାନେସି ଅଡେ ଏନାଆଁ ଖେଞ୍ଜାମାନେସି, ଏଦାଆଁ ଏଞ୍ଜାସି ସାକି ହାହିମାନେସି, ସାମା ଆମ୍ବାଆସି ତାନି ହାଡାତି ଅପଅସି । ୩୩ ଇଞ୍ଜା ଆମ୍ବାଆସି ତାନି କାତାତି ଅପିନେସି, ଏଞ୍ଜାସି ମାହାପୁରୁ ସାତା ଇଞ୍ଜା ଏ କାତାତି ଆବା ମାନେସି । ୩୪ ସାମା ମାହାପୁରୁ ଆମ୍ବାଆରାକ୍ ପାଣ୍ଡାମାଞ୍ଜାନେସି, ଏଞ୍ଜାସି ମାହାପୁରୁ ବଲୁ ଖେହ୍ନେସି, ଏଞ୍ଜାଶାକି ମାହାପୁରୁ ସୁଦୁଜୀଞ୍ଜୁ ହାନେସି । ୩୫ ଆବା ମୀରଏଶାକ୍ ଜୀଞ୍ଜୁ ନନେସି, ଅଡେ ବାରେ ତାନି କେୟୁତା ହେର୍ପା ମାନେସି । ୩୬ ଆମ୍ବାଆସି ମୀରଏଶାକ୍ ନାନିନେସି, ଏଞ୍ଜାସି କାଲ୍ଲୀକାଲ୍ଲୀତି ଜୀଞ୍ଜୁ ବେଟାଆହାମାନେସି, ସାମା ଆମ୍ବାଆସି ମୀରଏଶାକ୍ ଅପଅସି, ଏଞ୍ଜାସି ଜୀଞ୍ଜୁ ଜିକେଏ ମେହ୍ଅସି, ସାମା ଏଞ୍ଜାସି ମାହାପୁରୁଟି ତଣ୍ଡତା ଡୟିନେସି ।

୪

ଜୀସୁ ଅଡେ ସମିରଣ ଇୟା

୧ ପାରୁସିୟାଁ ଖେରେରି, ଜୀସୁ ଜହନ କିହାଁ ଗାତି ସୀସୁୟାଁ କିହିମାନେସି ଅଡେ ବାପ୍ତିସ୍ମ* ହାହିମାନେସି । ୨ ଜୀସୁ ତାନୁ ବାପ୍ତିସ୍ମ† ହାହିଲିଆତେସି, ସାମା ତାନି ସୀସୁୟାଁ ବାପ୍ତିସ୍ମ‡ ହାହିମାରେରି, ଇ କାତା ପାରୁସିୟାଁ ଖେଞ୍ଜାମାନେରି ଇଞ୍ଜା ପ୍ରୁ ଏଚେତା ପୁଚେସି, ୩ ଏଚେତା ଜୀହୁଦା ଦେସା ପିସାନା ଅଡେ ଖେଣ୍ଡେ ଗାଲିଲିତା ହାରେରି । ୪ ସାମା ତାଜେ ସମିରଣ ଜିରୁଟି ହାଜାଲି ଲାଗିତେ ।

୫ ଅଡେ ଏଞ୍ଜାସି ହାଜାନା ଜାକୁବ ତାନି ମୀରଏସି ଜସେପକି ଏମିନି ବୁମି ହାହାମାଚେସି ଏ ତାଗେ ସମିରଣତି ସୁକାର ଦରୁଗାତି ର ନାୟୁତା

* ୪:୧ ୪:୧ ମୁଞ୍ଜିନାୟି † ୪:୨ ୪:୨ ମୁଞ୍ଜିନାୟି ‡ ୪:୨ ୪:୨ ମୁଞ୍ଜିନାୟି

ଏଗାହାରେସି । ୭ ଏ ଗାୟତା ଜାକୁବତି କୁହି ମାରେ, ଇଞ୍ଜାଁ ଜୀସୁ
ଝାହାହାଜାମାଚାକି ଏ କୁହି ତାଗେ କୁଗିତେସି । ଏତେତା ମାଦେନା
ଆହାମାରେ ।

୭ ଅଡେ ର ସମିରଣ ଇୟା ଏୟୁ ଅହାଲି ଝାଡେ । ଜୀସୁ ଏଦାନି
ଏଲେଇରେସି “ନାଜେ ଏୟୁ ଗସାଲି ହିୟାମୁ ।” ୮ ତାନି ସୀସୁୟାଁ କାଡ଼ି
କତାଲି ଗାଡ଼ାତା ହାଜାମାରେରି ।

୯ ଏମ୍ବାଟିଏ ସମିରଣ ଇୟା ଜୀସୁଇଁ ଏଲେଇରେ, “ନୀନୁ ର ଜୀହୁଦି
ଲକୁ ଆହାଁ, ନୀନୁ ସମିରଣ ଆୟାଡେଏଁ, ଏନିକଁ ନା କେୟୁଟି ଏୟୁ
ଗସାଲି ରାସି ମାଞ୍ଜାଦି ?” ଏନିଇଟିହଁ ଜୀହୁଦିୟାଁ ତଲେ ସମିରଣ
ଲକୁଟି ଲେମ୍ବିନାୟି ହିଲେଏ ।

୧୦ ଜୀସୁ ଏଦାନି ଏଲେଇରେସି, “ମାହାପୁରୁତି ଦାନା ଅଡେ ନାଜେ
ଗସାଲି ହିୟାମୁ ଇଞ୍ଜାଁ ଆମ୍ବାଆସି ନିଜେ ଏଲେଇଞ୍ଜିମାଞ୍ଜାନେସି,
ଏଝାସି ଆମ୍ବାଆସି, ଇଦାଆଁ ନୀନୁ ପୁଟିହଁମା, ନୀନୁ ଏଝାଶାଲ୍
ରାସିମା, ଅଡେ ଏଝାସି ନିଜେ ଜୀହୁଟି ଏୟୁ ହିୟାଡେସିମା ।”

୧୧ ଏ ଆୟାଟି ଏଲେଇରେ, “ଗୁରୁ ନୀ ତାଶା ଏୟୁ କତାଲି ତାକି
ନକି ହିଲେଏ, ଅଡେ ଇ କୁହି କୁଡ଼ହାମାନେ; ଆତିହଁ ନୀନୁ ଏମ୍ବିଟି ଏ
ଜୀହୁଗାଟି ଏୟୁ ବେଟାଆହାମାଞ୍ଜି ? ୧୨ ମା ଆକୁୟାଁତି ଆବା ଜାକୁବ
ଇ କୁହି ମାଜେ ହୀହାମାଞ୍ଜାଡେସି, ଅଡେ, ତାନି ମୀରକା ଅଡେ ତାନି
କଡ଼ି ଗରି ଇମ୍ବାଟି ଏୟୁ ଗସିମାରୁ, ଏଝାଶି କିହାଁ ନୀନୁ କି କାଜାତି ?”

୧୩ ଜୀସୁ ଏଲେଇରେସି, “ଆମ୍ବାଆସି ଇ ଏୟୁ ଗହ୍ନେସି, ଅଡେ
ଝେଣ୍ଡେ ଏସ୍କି ଆନେସି; ୧୪ ସାମା ନୀନୁ ଏମିନି ଏୟୁ ହିୟାଲ୍, ଏଝାଆଁ
ଆମ୍ବାଆସି ଗହ୍ନେସି, ଏଝାସି ଏରେଲାଝା ଏସ୍କି ଆଅସି, ଇଟିହଁ
ନୀନୁ ଏମିନି ଏୟୁ ହୀଲ୍, ଏଡ଼ି କାଲାକାଲାତି ଜୀହୁଟି ଉସା ଲେହେଁ
ଏଝାଶି ତାଶାଟି ଡେଲାବୟା ହାନୁ ।”

୧୫ ଆୟାଟି ଏଲେଇରେ, “ଗୁରୁ, ନାଜେ ଏନିକଁ ଏସ୍କି ଆୟେଏ,
ଅଡେ ଏୟୁତାକି ଇରେକା ହେକ ଇ କୁହିତା ଝାୟାଲି ଆଏ,
ଏଦାଆଁତାକି ଏ ଏୟୁ ନାଜେ ହିୟାମୁ ।”

୧୬ ଜୀସୁ ଏଦାନି ଏଲେଇରେସି, “ହାଲାମୁ, ନୀ ତକ୍ରାଲ୍ ହାଡ଼ାତାମୁ
।”

୧୭ ଏ ଆୟାଚି ଏଲେଇଚେ, “ନା ତକ୍ରା ହିଲଅସି ।” ଜୀସୁ ଏଦାନି ଏଲେଇଚେସି “ନା ତକ୍ରା ହିଲଅସି ଇଞ୍ଜିଁ ସାତା ଝେସାମାଞ୍ଜି । ୧୮ ନିଙ୍ଗେ ପାସାଜାଣା ତକ୍ରାୟା ମାଚେରି, ଅଡେ ନୀର୍ବି ନୀ ତଲେ ଆମ୍ବାଆସି ମାନେସି ଏଝାସି ନୀ ତକ୍ରା ଆଏ ଇଦାଆଁ ସାତା ଝେସାମାଞ୍ଜି ।”

୧୯ ଆୟାଚି ଏଲେଇଚେ, “ଗୁରୁ, ନାନୁ ପୁଞ୍ଜିମାଈଁ ନୀନୁ ର ମାହାପୁରୁ ଅଣ୍ଟପୁତି ବଲୁ ଝେହନାତି, ଇଦାଆଁ ନାନୁ ପୁଞ୍ଜିମାଈଁ । ୨୦ ମା ଆକୁ ଆବାୟାଁ ଇ ହରୁ ଲାକ ପ୍ରାତାନା କିହିମାଚେରି; ଅଡେ ମୀ ଜୀହୁଦି ଲକୁ ଏଲେଇନେରି, ପ୍ରାତାନା କିନି ଟାୟୁ ଆହିମାନେ ଜିରୁସାଲମ ।”

୨୧ ଜୀସୁ ଏଦାନି ଏଲେଇଚେସି, “ଇୟା ନା ହାଡାତି ନାମାମୁ, ଏମିନି ବେଲାତା ମୀରୁ ଇ ହରୁତା କି ଜିରୁସାଲମତା ଆବା ତାଣା ପ୍ରାତାନା କିଅଡେରି ଇଲେତି କାଲମି ଝାନ୍ଦେ । ୨୨ ଆମ୍ବାଆରାଈଁ ମୀରୁ ପୁଞ୍ଜାହିଲଅଡେରି, ଏଝାଣାଈଁ ପ୍ରାତାନା କିହିମାଞ୍ଜେରି; ଆମ୍ବାଆରାଈଁ ମୀର ପୁଞ୍ଜାମାନାୟି, ଏଝାଣାଈଁ ପ୍ରାତାନା କିହିମାନାୟି, ଇଚିହିଁ ଗେଲ୍ପିନାୟି ଜୀହୁଦି ଲକୁ ତାଣାଟି ଝାନ୍ଦେ । ୨୩ ସାମା ଏମିନି କାଲମିତା ସାତା ତଲେ ପ୍ରାତାନା କିନି ଲକୁ ଜୀହୁତଲେ ଅଡେ ସାତା ତଲେ ଆବାଈଁ ପ୍ରାତାନା କିନେରି, ଇଲେତି କାଲମି ଝାହିମାନେ; ଅଡେ, ନୀର୍ବି ଜିକେଏ ମାନେ; ଇଚିହିଁ ଆବା ଇଲେତି ପ୍ରାତାନା କିନାରାଈଁ ପାରିମାନେସି । ୨୪ ମାହାପୁରୁ ସୁବୁଜୀଝୁ ଗାଟାସି, ଅଡେ ଆମ୍ବାଆରି ତାନି ପ୍ରାତାନା କିନେରି, ଏଝାରି ଜୀହୁ ଇଞ୍ଜାଁ ସାତା ତଲେ ତାନି ପ୍ରାତାନା କିନାୟିମାନେ ।”

୨୫ ଏ ଆୟାଚି ଜୀସୁଈଁ ଏଲେଇଚେ, “ନାନୁ ପୁଞ୍ଜାମାଈଁ, ମସିହା, ଆମ୍ବାଆରାଈଁ କ୍ରୀସ୍ତ ଇନେରି, ଏଝାସି ଝାନ୍ଦେସି; ଏଚେତା ଏଝାସି ଝାନ୍ଦେସି ମାଙ୍ଗେ ବାଚେ କାତା ପୁଣ୍ଡି କିୟାନେସି ।”

୨୬ ଜୀସୁ ଏଦାନି ଏଲେଇଚେସି, “ନୀର୍ବି ନୀ ତଲେ ହାଡା ଆହିମାନାଡେର୍ବି ନାନୁ, ନାନୁ ଏଝାଡେର୍ବି ।”

୨୭ ଏଚିବେଲାତା ତାନି ସୀସୁୟାଁ ଝାହାନା ତାନୁ ର ଆୟାଚି ତଲେ ହାଡା ଆହିମାନାଣି ମେସାନା କାବା ଆଡେରି, ଆଡିଜିକେଏ ନୀନୁ ଏନାଆଁ ମନ କିହିମାଞ୍ଜି, ଆଆତ୍ ଏନାଆଁତାକି ଏଦାନିତଲେ ହାଡା ଆହିମାଞ୍ଜି ଇଞ୍ଜିଁ? ଆମ୍ବାଆରି ଝେନାଆଡେରି ।

୨୮ ଏମ୍ବାଟିଏ ଆୟାଟି ଏମ୍ବାଆଁ ତାନି ଏୟୁ ଡକା ପିସାନା ଗାଡ଼ାତା ହାଜାନା ଲକୁଣି ଖେସ୍ତେ, “ଖାଦୁ, ରଅଣାଇଁ ମେହ୍‌ଦେରି, ୨୯ ନାନୁ ଏନା ଏନାଆଁ ନା ଜୀଝୁତା କିହାମାଇଁ, ଏଝାସି ନାଞ୍ଜେ ବାରେ ଖେସ୍ତାତେସି; ଏଝାସି ମସିହା ଆହାଡ଼ୟିନେସି ?” ୩୦ ଏମ୍ବାଟିଏ ଏମ୍ବାତି ଲକୁ ଗାଡ଼ାଟି ହଚାନା ଜୀସୁ ତାଣା ହାଚେରି ।

୩୧ ଏଚିବେଲୀତା ସୀସୁୟାଁ ବାତିମାଲିହୁଁ ଏଲେଇଚେରି, “ଏ ଗୁରୁ, ତିନାମ୍ବୁ ।”

୩୨ ସାମା ଜୀସୁ ଏଝାରାଇଁ ଏଲେଇଚେସି, “ତିଞ୍ଜାଲି ତାକି ଏମିନି କାଡ଼ି ନା ତାଣା ମାନେ, ମୀରୁ ଏ କାଡ଼ିତି କାତା ପୁଞ୍ଜାହିଲଅତେରି ।”

୩୩ ସୀସୁୟାଁ ତାମ୍ବୁ ତାମ୍ବୁ ହାଡ଼ାକାତା ଆଡେତି, “ଆମ୍ବାଆୟି ତାଞ୍ଜେତାକି କାଡ଼ି ତାଚା ହାହାମାନେ ହାବୁଲ୍ଲା ?”

୩୪ ଜୀସୁ ଏଝାରାଇଁ ଏଲେଇଚେସି, “ନାଞ୍ଜେ ପାଣ୍ଡାମାଞ୍ଜାନାଣା ଅଣ୍‌ପୁ ଅଡେ ତାନି କାମା ରାପ୍‌ନାୟି ଏଡ଼ିଏ ନା କାଡ଼ି । ୩୫ ଆର୍ନା ଦାଚାଲି ଅଡେ ସାରି ଲେଞ୍ଜୁ ମାନେ, ଈ କାତା ମୀରୁ ଖେସିହିଲଅତେରି ସାମା ନାନୁ ମିଞ୍ଜେ ଖେସିମାଞ୍ଜାଇଁ, ଗୁଡ଼ିୟାକା ବାରେ ସିନିକିଦୁ ଏ ବାରେ ଦାଚାଲି ତାକି କାମ୍ବାହାଚେୟିଏ । ୩୬ ନୀର୍ବି ଜିକେଏ ଦାଃଆନାରାକି କୁଲି ହୀପକି ଆହିମାନେ ଅଡେ କାଲ୍ଲାକାଲ୍ଲାତି ଜୀଝୁତାକି ପାଡେୟି କୁଡ଼ି କିହିମାନେରି, ଏନିକିହୁଁ ଦାଃଆନାସି ଅଡେ କୁଡ଼ିକିନାସି ରହେଏ ରାହୁଁ କିନେରି । ୩୭ ଏନାଆଁତାକି ଇଚିହୁଁ ରଅସି ମାଚିନେସି ଅଡେ ଅର ରଅସି ଦାଃଆନେସି ଈ କାତା ସାତା । ୩୮ ମୀରୁ ଏନାଆଁତାକି କାମା କିହାହିଲଅତେରି, ଏଦାଆଁ ଦାଚାଲି ତାକି ନାନୁ ପାଣ୍ଡାତେସି; ଏଚ୍‌କାତାରି କାମା କିହାମାନେରି, ଅଡେ ମୀରୁ ଏଝାରି କାମାତି ଲାବା ବେଟାଆହିମାଞ୍ଜେରି ।”

୩୯ “ନାନୁ ଏନା ଏନାଆଁ କିହାମାଇଁ, ଏ କାତା ଏଝାସି ନାଞ୍ଜେ ବାରେ ଖେସ୍ତାତେସି” ଇଞ୍ଜୁଁ ଏମିନି ଆୟାଟି ସାକି ହାହାମାଚେ, ଏଦାନି କାତାତାକି ଏ ଗାଡ଼ାତି ସମିରଣ ଲକୁ ବିତ୍ରାଟି ହାରେକା ଜୀସୁଇଁ ନାମିତେରି । ୪୦ ଅଡେ ସମିରଣ ଲକୁ ଜୀସୁ ତାଣା ଖାହାନା ତାମିତଲେ ଡୟାଲି ତାକି ତାଞ୍ଜେ ବାତିମାଲିତେରି ଜୀସୁ ଏଝାରିତଲେ ଅଡେ ରୀ ଦିନା ଡୟିତେସି ।

୪୧ ଜୀସୁତି ବଲୁ ଖେଞ୍ଜାନା ହାରେକା ଲକୁ ନାମିତେରି । ୪୨ ଏଞ୍ଜାରି ଏ ଆୟାଟିଇଁ ଏଲେଇଚେରି, “ଝାରୁଇ ନୀମ୍ନୁ ଏଲେଇଞ୍ଜାତାକି ମାମ୍ନୁ ନାମାହିଲଅମି, ସାମା ମାମ୍ନୁ ଖେଞ୍ଜାମାନମି, ଅଡ଼େ, ଇଞ୍ଜାସି ସାତେଏ ଦାର୍ତତି ଗେଲ୍ପିନାସି, ଇଦାଆଁ ମାମ୍ନୁ ପୁଞ୍ଜାମାନମି ।”

ଜୀସୁ ସାଲୁଞ୍ଜି କିନାଣି ମୀରୁଏଣାଇଁ ନେହୁଁ କିନାୟି

୪୩ ରୀ ଦିନା ତାୟୁ ଜୀସୁ ଏମ୍ବାଟି ହଚାନା ଗାଲିଲିତା ହାଚେସି । ୪୪ ଇଚିହୁଁ ଜୀସୁ ତାଜେତାକି ସାକି ହୀହୁଁ ଏଲେଇଚେସି, “ମାହାପୁରୁ ଅଣପୁତି ବଲୁ ଖେହୁନାରି ଜାହାରା ଦେସାତା ମାନ୍ତି ବେଟାଆଅରି ।” ୪୫ ଅଡ଼େ ଏଞ୍ଜାସି ଗାଲିଲିତା ଏଜାଲିଏ ଏ ଗାଲିଲିତାରି ଏଞ୍ଜାଣାଇଁ ଆବିତେରି, ଇଚିହୁଁ ପିସ୍ପିଆନ୍ତି ପାର୍ବୁ ବେଲାତା ଜୀସୁ ଜିରୁସାଲମତା ଏନା ଏନାଆଁ କିହାମାଚେସି ବାରେ ମେସାମାଚେରି ଏଞ୍ଜାରି ଜିକେଏ ପାର୍ବୁତା ହାଜାମାଚେରି ।

୪୬ ଏମ୍ବାଟିଏ ଜୀସୁ ଗାଲିଲିତି କାନା ଗାଡ଼ାତା ଖେଣ୍ଡେ ହାଚେସି, ଏମ୍ବିୟା ଜୀସୁ ଏୟୁଣି ଅଞ୍ଜୁରି ରାସା କିହାମାଚେସି, ଏମ୍ବାଆଁ ପାସାକଡ଼ି କସ୍କା ମୁହେଁ କାଜାସି ରଅସି ମାଚେସି, ତାନି ମୀରୁଏସି କପରନାହୁମତା ଆଡ଼ିହିଲାଆଚେସି । ୪୭ ଜୀସୁ ଜୀହୁଦା ଗାଡ଼ାଟି ଗାଲିଲିତା ଖାହାମାନେସି ଇଞ୍ଜୁଁ ଖେଞ୍ଜାନା, ତାନି ତାଣା ହାଜାନା ଏଞ୍ଜାସି ଖାହାନା ଏନିକୁଁ ତାନି ମୀରୁଏଣାଇଁ ନେହୁଁ କିନେସି ଏଦାଆଁତାକି ବାତିମାଲିତେସି, ଇଚିହୁଁ ଏଞ୍ଜାସି ହାନିହଚେ ଆହାମାଚେସି ୪୮ ଜୀସୁ ଏଞ୍ଜାଣାଇଁ ଏଲେଇଚେସି, “ସିନା ଅଡ଼େ କାବାଆନ୍ତି କାମାୟାଁ ମେହୁଆତିହୁଁ ମୀରୁ ଏନିଜିକେଏ ନାମଅତେରି ।”

୪୯ ଏ ସାଲୁଞ୍ଜି କିନାସି ଏଲେଇଚେସି, “ଏ ପ୍ରବୁ, ନା ମୀରୁଏସି ହାନି ନକେଏ ନା ତଲେ ଖାମ୍ନୁ ।”

୫୦ ଜୀସୁ ଏଞ୍ଜାଣାଇଁ ଏଲେଇଚେସି, “ହାଲାମ୍ନୁ, ନୀ ମୀରୁଏସି ନୀତିନେସି ।” ଏ ମାଣ୍ଡିଇଁ ଜୀସୁ ଏମିନି ହାଡ଼ା ଖେସ୍ତେସି, ଏଞ୍ଜାସି ଏଦାଆଁ ନାମାନା ହାଚେସି । ୫୧ ଅଡ଼େ, ଏଞ୍ଜାସି ହାଲୁଞ୍ଜିଏ ତାନି ହଲିୟାଙ୍ଗା ଜିରୁତେଏ ନୀ ମୀରୁଏସି ନୀତିତେସି ଇଞ୍ଜୁଁ ଖେସ୍ତେରି ।

☆ ୪:୪୪ ୪:୪୪ ମାତି ୧୩:୫୭; ମାର୍କ ୬:୫; ଲୁକ ୪:୨୪ ☆ ୪:୪୫ ୪:୪୫ ଜହ ୨:୨୩ ☆ ୪:୪୬ ୪:୪୬ ଜହ ୨:୧-୧୧

୫୨ ଏଚିବେଲାତା କକାସି ନେହୁ ଆଡେସି, ଏଦାଆଁ ଏଝାସି ଝେରେସି । ଏମ୍ବାଟିଏ ଏଝାରି ଏଲେଇଚେରି, “ରେ୪ଏନି ସାତା ଗଂଟା ବେଲାତା ନଚେରି ପିସ୍ତେ ।” ୫୩ ଏମ୍ବାଟି ତାନି ଆବା ପୁଚେସି ଜୀସୁ ଆମିନି ବେଲାତା “ନୀ ମୀରଏସି ନୀଡିତେସି” ଇଞ୍ଜୁ ଝେସାମାଚେସି, ଏଚିବେଲାତେଏ ଏଡି ଗଟଝି ଆଡେ । ଏମ୍ବାଟିଏ, ଏଝାସି ଅଡେ ତାନି ଇଜଡି ବାରେ ଇଲୁ କୁଟମି ଜୀସୁ ତାଣା ନାମିତେରି ।

୫୪ ଜୀହୁଦାଟିଏ ଗାଲିଲିତା ଝେଶ୍ଟା ଝାହ୍ନାଁ, ଜୀସୁ ରୀ ପାଲି ତାକି ଇ କାବାଆନି କାମା କିତେସି ।

୫

ଜୀସୁ କଡେ ଅଟର ବାର୍ସା ତାଣାଇଁ ନେହୁ କିନାୟି

୧ ଇଦାଣି ତାୟୁ ଜୀହୁଦି ଲକୁଡି ର ପାରୁଁ ଆଡେ, ଅଡେ ଜୀସୁ ଜିରୁସାଲମତା ହାଚେସି । ୨ ଜିରୁସାଲମତି ମେଶ୍ଟାୟାଁ ଦୁଝେରି ତାଗେ ର ବାନ୍ଦା ମାନେ; ଏବୁ ହାଡାତଲେ ବେଡସାୟିଦା ଇନେରି, ଏ ବାନ୍ଦାତା ପାସାଗଟା ପିଶ୍ଟାୟାଁ ମାନୁ । ୩ ଏମ୍ବାଆଁ କାଣାୟାଁ, ସଟାୟାଁ ଅଡେ ଆଙ୍ଗା ଝାୟିତି ରଗ ଗାଟାରି ହାଡରକା ଜାଣା ନେହୁ ଆୟାଲି କାଟାହ୍ନାଁ ମାଣମ୍ବିତେରି; ୪ ଇଚିହୁ ଏଚିବେଲାତା ପ୍ରବୁଡି ର ଦୁଡୁ ବାନ୍ଦାତା ରେତାନା ଏୟୁ ଝୀଟ୍‌ହିସାରେ, ଅଡେ ଏୟୁ ଝୀଡିତି ତାୟୁ ଆମ୍ବାଆସି ତଲିଏ ହଡୁଚେସି, ଏଝାଣାକି ଏନି ରଗ ଆହାମାଟି ଜିକେଏ ନେହୁ ଆହିମାଚେସି* । ୫ କଡେ ଅଟର ବାର୍ସା ପାଚେକା ରଗ ଗାଟାସି ରଅସି ଏମ୍ବାଆଁ ମାଚେସି । ୬ ଜୀସୁ ଏଝାଣାଇଁ ଡୟାମାନାଣି ମେସାନା ଗାଡୁ ଦିନାତି ରଗ ଗାଟାସି ଇଞ୍ଜୁ ପୁଞ୍ଜାହ୍ନାଁ ଏଝାଣାଇଁ ଝେଚେସି, “ନୀନୁ ଏନାଆଁ ନେହୁ ଆହାଲି ମନ କିହିମାଞ୍ଜି ?”

୭ ରଗ ଗାଟାସି ଏଝାଣାଇଁ ଏଲେଇଚେସି, “ବାରୁ, ଏୟୁ ଝୀଡିନାଟି ନାଙ୍ଗେ ବାନ୍ଦାତା ଅହାଲି ତାକି ଆମ୍ବାଆସି ହିଲଅସି; ଅଡେ, ନୀନୁ ହାନିବେଲାତା ଅଡେ ରଅସି ନା ନକେଏ ହଡାହାନେସି ।”

୮ ଜୀସୁ ଏଝାଣାଇଁ ଏଲେଇଚେସି, “ନିଙ୍ଗାମୁ, ନୀ ପାୟପନି ଡେକାହ୍ନାଁ ତାକାମୁ ।” ୯ ଏ ଦେବୁଣିଏ ଏଝାସି ନେହୁ ଆଡେସି ଅଡେ ତାନି ପାୟପନି ଡେକାନା ତାକାଲି ମାଟ୍‌ହେସି ।

* ୫:୪ ୫:୪ ଇ କାତା ପ୍ଲୁଃଇ ପଡିତା ହିଲେଏ ।

ଏ ଦିନା ଜମିନି ଦିନା ମାତେ । ୧୦ ଇଦାଆଁତାକି, ଜୀହୁଦିୟା ନେହୁ ଆହାମାନି ମାଣ୍ଡିଇଁ ଏଲେଇଚେସି, “ନୀଞ୍ଜୁ ଜମିନି ଦିନା, ପାସ୍ପନି ଡେକା ଅହାଲି ନିଜେତାକି ମେରା ଆଏ ।”

୧୧ ସାମା, ଏଝାସି ଏଝାରାଇଁ ଏଲେଇଚେସି, “ଆମ୍ବାଆସି ନାଜେ ନେହୁ କିୟାତେସି, ଏଝାସି ନାଜେ ଏଲେଇଞ୍ଜାତେସି, ନୀ ପାସ୍ପନି ଡେକାନା ତାକାମୁ ।”

୧୨ ଏଝାରି ଏଝାଣାଇଁ ଝେଚେରି, “ନୀ ପାସ୍ପନି ଡେକାନା ତାକାମୁ ଇଞ୍ଜୁ ଏଲେଇଞ୍ଜାତାସି, ଏଝାସି ଆମ୍ବାଆସି ?”

୧୩ ସାମା ଏଝାସି ଆମ୍ବାଆସି, ଏ ନେହୁ ଆଡାସି ପୁଞ୍ଜା ହିଲୀଆତେସି, ଇଚିହୁ ଏମ୍ବାଆଁ ଲକୁ ମାନ୍ଦା ମାତାକି ଜୀସୁ ମେହୁଆରେଚୁ ହାଜାମାଚେସି ।

୧୪ ଇଦାଆଁ ତାୟୁ ଜୀସୁ ମାହାପୁରୁ ଇଲୁତା ଏଝାଣାଇଁ ମେସାନା ଏଲେଇଚେସି, “ମେହୁମୁ, ନୀନୁ ନେହୁ ଆହାମାଞ୍ଜି, ଅଡେ ପାପୁ କିଆନି, ଏନିକି ନିଜେତାକି ଗାଡି କସ୍ତୁ ଝାଏ ।”

୧୫ ଏ ମାଣ୍ଡି ଝେଣ୍ଡା ହାଜାନା, ଆମ୍ବାଆସି ତାଜେ ନେହୁ କିହାମାଚେସି, ଏଝାସି ଜୀସୁ ଇଞ୍ଜୁ ଜୀହୁଦିଙ୍ଗାଣି ଝେସ୍ତେସି ।

୧୬ ଇଦାଆଁତାକି ଜୀସୁ ଜମିନି ଦିନାତା ଇଦାଆଁ କିହିମାଚାକି ଜୀହୁଦିଙ୍ଗା ଏଝାଣାଇଁ ନିନ୍ଦା କିହାଲି ମାଟୁହେରି । ୧୭ ସାମା ଜୀସୁ ଏଝାରାଇଁ ଏଲେଇଚେସି, “ନା ଆବା ନୀଏଁ ପାତେକା କାମା କିହିମାନେସି, ଅଡେ ନାନୁ ଜିକେଏ କାମା କିହିମାଇଁ ।”

୧୮ ଇ ହାଡା ତାକି ଜୀହୁଦିଙ୍ଗା ଜୀସୁଇଁ ପାୟାଲି ତାକି ଅଡେ ଗାଡି ଅଣ୍ଡିଚେରେ, ଏଝାସି ଜମିନି ଦିନାତି ମେରାତି ଉରିତେସି ଝାରଇ ଏଡି ଆଏ, ସାମା ମାହାପୁରୁଇଁ ନା ଆବା ଇଞ୍ଜୁ ଝେସାନା ତାଜେ ମାହାପୁରୁ ତଲେ ସମାନା କିହିମାଚେସି ।

ମୀରଏଣି ଅଦିକାରା

୧୯ ଜୀସୁ ଏଝାରାଇଁ ଏଲେଇଚେସି, “ସାତା ସାତା ନାନୁ ମିଜେ ଝେସିମାଞ୍ଜାଇଁ, ମୀରଏସି ଆବାଇଁ ଏନାଆଁ କିହିମାନାଣି ମେହୁନେସି, ଏଦାଆଁ ପିସ୍ତେ ଏଝାସି ତାନୁଏ ଏନାଆଁ କିହାଲି ଆଡଅସି । ଇଚିହୁ ଆବା ଏନା ଏନାଆଁ କିନେସି, ମୀରଏସି ଜିକେଏ ଏଦାଆଁ ବାରେ ଏଲେକିହୁଏ କିନେସି । ୨୦ ଇଚିହୁ ଆବା ମୀରଏଣାଇଁ ଜୀହୁ

ନନେସି, ଅଡ଼େ ଏଞ୍ଜସି ତାନୁ ଏନା ଏନାଆଁ କିନେସି, ଏଦାଆଁ ବାରେ ମୀରୁଏଣାକ୍ ତହ୍ନେସି, ଅଡ଼େ ମୀରୁ ଏନିକ୍ କାବା ଆଡ଼େରି, ଏଦାଆଁତାକି ଏଞ୍ଜସି ଏଞ୍ଜାଣି ତାଣାଟି ଇଦାନି କିହ୍ନା ଆଡ଼େ କାଜା କାଜା କାମା ତହ୍ନେସି । ୨୧ ଆବା ଏନିକ୍ ହାଡ଼ି ଲକୁଣି ନିକ୍ହାନା ଜୀଝୁ ହୀନେସି, ଏଲେକିହ୍ ଏ ମୀରୁଏସି ଜିକେଏ ଆମ୍ବା ଆମ୍ବାଆରାକ୍ ମନ କିନେସି ଏଞ୍ଜାରାକ୍ ଜୀଝୁ ହୀନେସି । ୨୨ ଆବା ତାନୁଏ ଆମ୍ବାଆରାକ୍ ନାହ୍ନାୟି କିଅସି, ସାମା ବାରେଜାଣା ଏନିକ୍ ଆବାକ୍ ମାନି କିହିମାନେରି, ଏଲେକିହ୍ ଏ ମୀରୁଏଣାକ୍ ଜିକେଏ ମାନି କିନେରି, ଏଦାଆଁତାକି ମୀରୁଏଣାକି ବାରେ ନାହ୍ନାୟି କିହାଲି ଅଦିକାରା ହୀହାମାନେସି । ୨୩ ଆମ୍ବାଆସି ମୀରୁଏଣାକ୍ ମାନି କିଅସି, ଏଞ୍ଜସି ତାଙ୍ଗେ ପାଣ୍ଡାତି ଆବାକ୍ ଜିକେଏ ମାନି କିଅସି ।”

୨୪ “ନାନୁ ମିଙ୍ଗେ ସାତା ଝେସିମାଞ୍ଜାକ୍, ଆମ୍ବାଆସି ନା ବଲୁ ଝେଞ୍ଜାନା ନାଙ୍ଗେ ପାଣ୍ଡାତାଣାକ୍ ନାମିନାସି, ଏଞ୍ଜସି କାଲ୍ଲାକାଲ୍ଲାତି ଜୀଝୁ ବେଟା ଆହାମାନେସି, ଅଡ଼େ, ଏଞ୍ଜସି ନାହ୍ନାୟି କିଞ୍ଜିଆଆନା ହାକିତି ଜୀଣାଆହାନା ରାଆଗାଟି ଜୀଝୁତା ହଡ଼ାମାନେସି । ୨୫ ନାନୁ ମିଙ୍ଗେ ସାତା ଝେସିମାଞ୍ଜାକ୍, ର ଦିନା ଝାନ୍ନେ ନାଏଁ ଜିକେଏ ଏଦାତେୟିଏ, ଏମିନି ଦିନାତା ହାଡ଼ାରି ମାହାପୁରୁ ମୀରୁଏଣି ହାଡ଼ାତି ଝେନେରି ଅଡ଼େ ଆମ୍ବାଆରି ଝେନାରି ଏଞ୍ଜାରି ନୀଡ଼ିନେରି । ୨୬ ଇତିହ୍ ଆବା ଏନିକ୍ ତାନୁଏ ଜୀଝୁ ଗାଟାସି, ଏଲେକିହ୍ ଏ ଏଞ୍ଜସି ମୀରୁଏଣାକ୍ ଜିକେଏ ଜୀଝୁ ଗାଟାସି ଆହାଲି ହୀହାମାନେସି । ୨୭ ଅଡ଼େ, ଏଞ୍ଜସି ମାଣ୍ଡସି ମୀରୁଏସି ଆହାମାନାକି ଏଞ୍ଜସି ଏଞ୍ଜାଣାକି ନାହ୍ନାୟି କିନି ଅଦିକାରା ହୀତେସି । ୨୮ ଇଦାଆଁତାକି କାବା ଆଆଦୁ, ଇତିହ୍ ଏଚିବେଲ୍ଲା ହାଡ଼ି ଲକୁ ମାହଣି ମାଣ୍ଡାଟି ତାନି ଗିୟାଁ ଝେନେରି ଅଡ଼େ ଆମ୍ବାଆରି ସାତା କାମା କିହାମାନେରି, ୨୯ ଏଞ୍ଜାରି ଜୀଝୁତା ଝେଣ୍ଡେ ନୀତାଲିତାକି ଅଡ଼େ ଆମ୍ବାଆରି ଲାଗେଏତି କାମା କିହାମାନେରି, ଏଞ୍ଜାରି ନାହ୍ନାୟିତି ତଣ୍ଡୁ ତାକି ଝେଣ୍ଡେ ନିଙ୍ଗା ଝାନ୍ନେରି, ଇଲେତି ଦିନା ଝାହିମାନେ ।”

ଜୀସୁ ଝାକିଟି ସାକି

୩୦ “ନାନୁ ନା ତାଣାଟି ଏନାଆଁ କିହାଲି ଆଡ଼ଅଁ; ନାନୁ ଏନିକ୍ ଝେକ୍, ଏଲେକିହ୍ ଏ ନାହ୍ନାୟି କିକ୍, ଅଡ଼େ ନା ନାହ୍ନାୟି ଚିକ୍‌ଶାତାୟି,

ଇତିହାସ ନାନୁ ନା ମନତଲେ କିହାଲି ଅଣ୍ଠାଆନା, ନାଜେ ପାଣ୍ଡାତାଣା ମନ ଲେହେଁ କିହାଲି ଅଣ୍ଠାପିମାଲ୍ ।”

୩୧ “ନାନୁ ନାଜେତାକି ସାକି ହୀଇ, ଆଡିଜିକେଏ ନା ସାକି ସାତା ଆଏ । ୩୨ ନା କାତାତି ଆମ୍ବାଆସି ସାକି ହୀନେସି, ଏଞ୍ଜାସି ଅର ରଅସି; ଅଡେ, ନା କାତାତାକି ଏଞ୍ଜାଣି ସାକି ସାତା, ଏଦାଆଁ ନାନୁ ପୁଞ୍ଜାମାଲ୍ । ୩୩ ☆ ମୀରୁ ଜହନ ତାଣା ଲକୁଣି ପାଣ୍ଡାମାଞ୍ଜେରି ଅଡେ ଏଞ୍ଜାସି ସାତା ତାକି ସାକି ହୀହାମାନେସି । ୩୪ ସାମା ନାଜେ ମାଣ୍ଡସି ତାଣାଟି ସାକି ଲଡା ଆଏ, ସାମା ମୀରୁ ଏନିକି ଗେଲପି ଆଡେରି, ଏଦାଆଁତାକି ଇ ବାରେ ଖେସିମାଞ୍ଜାଲ୍ । ୩୫ ଜହନ ଡ଼ାଞ୍ଜିତି ମିଣ୍ଡସିମାନି ଦୀଞ୍ଜି ମାଚେସି, ଇଞ୍ଜା ମୀରୁ ଏଞ୍ଜାଣି ଉଜେଡିତା ଗାଡ଼େକା ତାକିଏ ରାହାଁ ଆହାଁ ମାଞ୍ଜାଲି ମନ କିହାମାଚେରି । ୩୬ ସାମା ଜହନତି ସାକି କିହାଁ ନା ତାଣା ହାରେକା କାଜା ସାକି ମାନେ, ଏନାଆଁତାକି ଇତିହାସ ଆବା ନାଜେ ଏନି ଏନି କାମା ରାପୁହାଲି ହୀହାମାଞ୍ଜାନେସି, ନାନୁ ଏମିନି କାମା କିହିମାଲ୍, ଆବା ନାଜେ ପାଣ୍ଡାମାଞ୍ଜାନେସି ଇଞ୍ଜି ଏ ବାରେ ନା ଖାକିଟି ସାକି ହୀହିମାନେସି । ୩୭ ଅଡେ ଏମିନି ଆବା ନାଜେ ପାଣ୍ଡାତେସି, ଏଞ୍ଜାସି ନା ତାକି ସାକି ହୀହାମାନେସି । ମୀରୁ ଏଚେଲା ଏଞ୍ଜାଣି ହାଡା ଖେଞ୍ଜା ହିଲଅତେରି କି ତାନି ମୁମୁ ମେସା ହିଲଅତେରି । ୩୮ ଅଡେ ଏଞ୍ଜାଣି ବଲୁ ମୀ ହିୟାତା ଇଟାହିଲଅତେରି, ଇତିହାସ ଏଞ୍ଜାସି ଆମ୍ବାଆରାଲ୍ ପାଣ୍ଡାତେସି ମୀରୁ ଏଞ୍ଜାଣାଲ୍ ନାମିହିଲଅତେରି । ୩୯ ମୀରୁ ଦାମ୍ବୁ ପତିତି କାତା ପାରିମାଞ୍ଜେରି, ଇତିହାସ ଏମ୍ବାଆଁ କାଲାକାଲାତି ଜୀଞ୍ଜୁ ବେଟାଆହାମାନମି ଇଞ୍ଜି ଅଣ୍ଠାପିମାଞ୍ଜେରି ଅଡେ ଏ ଦାମ୍ବୁ ପତି ନା ଖାକିଟି ସାକି ହୀହିମାନେ । ୪୦ ସାମା ମୀରୁ ଜୀଞ୍ଜୁ ବେଟାଆହାଲି ତାକି ନା ତାଣା ଖାହାଲି ମନ କିହିହିଲଅତେରି ।”

୪୧ “ନାନୁ ମାଣ୍ଡସିୟାଁ ତାଣାଟି ଗାଞ୍ଜୁରମି ପାରିହିଲଅଁ । ୪୨ ସାମା ନାନୁ ମିଜେ ପୁଞ୍ଜାମାଞ୍ଜାଲ୍, ମୀ ହିୟାତା ମାହାପୁରୁତି ଜୀଞ୍ଜୁନାୟି ହିଲେଏ । ୪୩ ନାନୁ ନା ଆବା ଦରୁଟି ଖାହାମାଲ୍, ଅଡେ ମୀରୁ ନାଜେ ଅପିମାଞ୍ଜଅତେରି; ଅର ରଅସି ତାନି ଦରୁଟି ଖାଡିହାଁ, ମୀରୁ ଏଞ୍ଜାଣାଲ୍ ଅପିଦେରି । ୪୪ ମୀରୁ ଏନିକି ନାମିମାଞ୍ଜେରି ? ମୀରୁ ମୀ ତାଣାଟି ଗାଞ୍ଜୁରମି ବେଟାଆହି ମାଞ୍ଜେରି, ଅଡେ

☆ ୫:୩୩ ୫:୩୩ ଜହ ୧:୧୯-୨୭; ୩:୨୭-୩୦

ଏମିନି ରଣ୍ଡିଏ ମାହାପୁରୁ ତାଣାଟି ଗାଞ୍ଜୁରମି ଏଦାଆଁ ବେଟାଆହାଲି ମନ କିହିଲିଲଅତେରି ^{୪୫} ନାନୁ ଆବା ନକିତା ମୀ କପାଟି ଦହ ଦସ୍ତାଇଁ, ଏଲେଇଞ୍ଜି ଅଶ୍‌ପାଆଦୁ; ଆମିନି ମସା ତାଣା ମୀରୁ ବାସ୍ତୁ ଇଟାମାଞ୍ଜେରି, ଏଞ୍ଜାସିଏ ମୀ କପାଟି ଦହ ଦସି ମାଞ୍ଜାନେସି । ^{୪୬} ଇଚିହ୍ମ ମୀରୁ ମସାଇଁ ନାମା ମାଚିହ୍ମ, ନାଞ୍ଜେ ଜିକେଏ ନାମାତେରିମା, ଇଚିହ୍ମ ଏଞ୍ଜାସି ନା କାତେଏ ରାଟାମାନେସି । ^{୪୭} ସାମା ମୀରୁ ଏଞ୍ଜାସି ରାଟାମାନି କାତା ନାମା ହିଲଅତେରି, ଆତିହ୍ମ ନା କାତା ଏନିକ୍ ନାମିଦେରି ?”



ଜୀସୁ ପାସାମାଣା ଲକୁଣି ତୀହ୍‌ନାୟି

(ମାତି ୧୪:୧୩-୨୧; ମାର୍କ ୬:୩୦-୪୪; ଲୁକ ୯:୧୦-୧୭)

^୧ ଇଦାଆଁ ତାୟୁ ଜୀସୁ ଗାଲିଲି ସାମ୍‌ଦୁରି, ଇଚିହ୍ମ ଡିବିରିୟା ସାମ୍‌ଦୁରି ଆତାଲାଞ୍ଜାକି ହାରେସି । ^୨ ଅଡେ ଏଞ୍ଜାସି ରଟ ଗାଟାରାଇଁ ଏନି ଏନି କାବାଆନି କାମା କିହାମାଚେସି, ଏ ବାରେ ମେସାନା ହାରେକା ଲକୁ ଏଞ୍ଜାସି ଜେଟ ଜେଟ ହାଚେରି । ^୩ ଏମ୍‌ପାଟିଏ ଜୀସୁ ସୀସୁୟା ତଲେ ର ହରୁ ଲାକ ହାଜାନା କୁଗିତେସି । ^୪ ଏଚିବେଲା ଜୀହୁଦି ଲକୁଡି ପିସ୍‌ପିଆନି ପାରୁ ତାଗେ ଆହାମାଚେ । ^୫ ହାରେକା ଲକୁ ତାନି ତାଣା ଖାହିମାନାଣି ମେସାନା, ଜୀସୁ, ପିଲିପଇଁ ଏଲେଇଚେସି, “ଇଞ୍ଜାରାକି ତିଞ୍ଜାଲି ମାର ଆମ୍‌ପିଟି ରାନ୍ଦା କଡିନାୟି ?” ^୬ ସାମା ଏଞ୍ଜାସି ପିଲିପଇଁ ତାୟିପାରି କିୟାଲି ଏଲେଇଚେସି, ଇଚିହ୍ମ ଏଞ୍ଜାସି ଏନାଆଁ କିନାୟିମାନେ, ଏଦାଆଁ ତାନୁଏ ପୁଞ୍ଜାମାଚେସି ।

^୭ ପିଲିପ ଏଞ୍ଜାଣାଇଁ ଏଲେଇଚେସି, “ବାରେ ଲକୁଡାକି ଇଟା ଇଟାଣି ତିଞ୍ଜାଲି ରୀ ଖାଞ୍ଜାଟିଏ ଆଗାଡ଼ା ଖେଣ୍ଡି ଟାକାୟାତି* ରୁଟି ଜିକେଏ ହାଲାଡ ।”

^୮ ତାନି ସୀସୁୟା ବିତ୍ରାଟି, ସିମନ ପିତର ତାୟି ଆନ୍ଦିୟ ଦରୁଗାଟାସି ଜୀସୁଇଁ ଏଲେଇଚେସି, ^୯ “ଇମ୍‌ପାଆଁ ର କକାସି ମାନେସି, ତାନିତାଣା

* **୬:୭** ଖେଣ୍ଡି ଟାକା ର ରୁପାଟାକା ର ଦିନାତି କୁଲି ମାତି ୨୦:୨

ପାସାଗଟା ରୁଟି ଇଞ୍ଜା ଖାଜିତି ମୀଶକା ରିଣ୍ଡି ମାନୁ, ସାମା ଇଚେକା ଲକୁତାକି ଏଞ୍ଜି ହାଲିନୁ କି ?”

୧୦ ଜୀସୁ ଏଲେଇଚେସି, “ଲକୁଣି କୁପକି କିଦୁ ।” ଏ ଟାୟୁତା ହାରେକା ଗାକି ଜାଡ଼ା ମାଚେ । ଏମ୍ବାଆଁ ପାସାମାଣା ଆବାୟା କୁଗିଚେରି । ୧୧ ଏମ୍ବାଟିଏ ଜୀସୁ ରୁଟି ଆସାନା ମାହାପୁରୁଇଁ ଜହରା ହୀହାନା ଏମ୍ବାଆଁ କୁଗାମାନାରାକି ଏଦାଆଁ ବାଟିକିହାଁ ହୀଚେରି, ମୀଶକା ଜିକେଏ ଏଲେକିହାଁଏ ବାଟିକିଚେରି, ଏଚେକା ମନ କିଚେରି ଏଞ୍ଜାରାକି ଏଚେକା ହୀଚେରି । ୧୨ ଅଡ଼େ ଏଞ୍ଜାରି ବାରେ ପାଞ୍ଜିତି ଡାୟୁ, ଜୀସୁ ତାନି ସୀସୁୟାଁଇଁ ଏଲେଇଚେସି, “ଏଚେକା ହୀରାମାନେ, ଏଦାଆଁ ବାରେ କୁଡ଼ି କିଦୁ ଏନିକିଁ ଇଚାୟି ଜିକେଏ ନସୁ ଆଏ ।” ୧୩ ଏଚେଟିଏ ଲକୁ ଡିଟି ଡାୟୁ ପାସାଗଟା ରୁଟି ବିତ୍ରାଟି ହୀରାମାଟି ମୁକାୟାଁ ବାର ଡାଲି କୁଡ଼ି କିଚେରି ।

୧୪ ଜୀସୁତି ଇ କାବାଆନ୍ତି କାମା ମେସାନା ଲକୁ ଏଲେଇଚେରି, “ଆମିନି ମାହାପୁରୁ ଅଣ୍ଡପୁତି ବଲୁ ଝେକନାସି ଦାରତିତା ଖାନାୟି ମାଚେ, ଏଞ୍ଜାସି ସାଚେଏ ଇଞ୍ଜାସି ।” ୧୫ ଏଦାଆଁତାକି ଏଞ୍ଜାରି ଖାହାନା ରାଜା କିୟାଲି ବାଲ୍‌ମିଟି ଆସା ଅୟାନେରି ଇଞ୍ଜାଁ ପୁଞ୍ଜାନା ଜୀସୁ ଏଟକା ଆହାନା ରଅସିଏ ଦାରିତା ମାଟି ହରୁ ଲାକ ହଟାହାଚେସି ।

ଜୀସୁ ଏୟୁ ଲାକ ତାକିନାୟି

(ମାଟି ୧୪:୨୨-୩୩; ମାର୍କ ୬:୪୫-୫୨)

୧୬ ମିଡ଼ଅଲ୍ଲା ଆହାଲିଏ ତାନି ସୀସୁୟାଁ ସାମଦୁରି ଗାରୁତା ହାଚେରି । ୧୭ ଅଡ଼େ ସାମଦୁରି ଆତାଲ୍ଲା ମାନି କପରନାହୁମ ଖାକି ହାଜାଲି ଡଂଗତା ହଟେରି । ଆନ୍ଦେରି ଆହାହାଚେ, ଅଡ଼େ, ଜୀସୁ ଏଟିବେଲା ପାଚେକା ଏଞ୍ଜାରିତାଣା ଖାହା ହିଲାଆଚେସି । ୧୮ ଇଞ୍ଜାଁ କାଜା ଗାଲି ଝେଟିମାରାକି ସାମଦୁରିତା ଆଜିହପେତି ଏୟୁ ଉଣ୍ଡାୟାଁ ନିଜିମାରୁ । ୧୯ ଏଟିବେଲା ଏଞ୍ଜାରି ସ କିଲମିଟର ହେକ ହାଜାଲିଏ ଜୀସୁ ସାମଦୁରିତା ତାକିହାଁ ଡଂଗ ଖାକି ଖାହିମାନାଣି ମେସାନା ଆଜିଚେରି । ୨୦ ସାମା ଜୀସୁ ଏଞ୍ଜାରାଇଁ ଏଲେଇଚେସି, “ଆଜାଆଦୁ ଇଞ୍ଜାଚେଏଁ ନାନୁ ।” ୨୧ ଏମ୍ବାଟିଏ ଏଞ୍ଜାରି ଏଞ୍ଜାଣାଇଁ ଡଂଗତା ଅହାଲି ମନ କିଚେରି,

ଅଡ଼େ, ଏମିନି ସାମ୍ବୁରି ଗାରୁଡ଼ା ହାଜିମାରେରି, ଦେବୁଣିଏ ଏ ଚାୟୁତା ଡଂଗ ଏଡେ ।

ଜୀସୁଇଁ ଲକୁ ପାରିନାୟି

୨୨ ଏ ଚାୟୁତା ର ଡଂଗ ପିସ୍‌ପେ ଏବ୍‌କାତି ଡଂଗୟାଁ ହିଲାଆଡୁ, ଅଡ଼େ ଏମ୍‌ଆଁ ଜୀସୁ ତାନି ସୀସୁୟାଁ ତଲେ ହାଜାହିଲାଆଡେସି, ସାମା ଖାରୁଇ ସୀସୁୟାଁ ହାଜାମାରେରି, ଇଦାଆଁ ଆମିନି ଲକୁ ତାନି ଅର ନେବୁ ସାମ୍ବୁରି ଆତାଲା ନିଚାମାରେରି ଏଞ୍ଜାରି ମେସାମାରେରି । ୨୩ ଆମିନି ତାଣା ଜୀସୁ ଜହରା କିହାନା ଲକୁଣି ରୁଟି ତିଞ୍ଜାଲି ହୀହାମାରେସି, ତିବିରିୟାତି ଅଡ଼େ ଏଚରଗଟା ଡଂଗାୟାଁ ଏ ଚାୟୁତା ଖାଡୁ । ୨୪ ଇଞ୍ଜା ଜୀସୁ ତାନି ସୀସୁୟାଁ ଏମ୍‌ଆଁ ହିଲାଆଡେରି, ଇଦାଆଁ ମେସାନା ବାରେ ଲକୁ ଇ ଡଂଗତା ହଚାନା ଜୀସୁଇଁ ପାରି ପାରିହଁ କପରନାହୁମତା ଖାଡ଼େରି ।

ଜୀସୁ ଜୀଞ୍ଜୁତି ରାନ୍ଦା

୨୫ ଏଞ୍ଜାରି ସାମ୍ବୁରି ଆତାଲା ଜୀସୁଇଁ ବେଟାଆହାନା ଖେଚେରି, ଏ “ଗୁରୁ, ନୀନୁ ଏଚିବେଲା ଇମ୍‌ଆଁ ଖାଡ଼ି ?”

୨୬ ଜୀସୁ ଏଞ୍ଜାରାଇଁ ଏଲେଇଚେସି, “ନୀନୁ ମିଙ୍ଗେ ସାତା ଖେସିମାଞ୍ଜାଇଁ, ନା କାବାଆନି କାମା ମେସ୍ତାକି ନାଙ୍ଗେ ପାରିମାଞ୍ଜାଦେରି ଏଡ଼ି ଆଏ, ସାମା ରୁଟି ତିଞ୍ଜା ପାଞ୍ଜିତାକି ମୀରୁ ନାଙ୍ଗେ ପାରିମାଞ୍ଜାଦେରି । ୨୭ ସୀରୁନି ରାନ୍ଦା ତାକି କାମା କିଆନା, କାଲାକାଲାତି ଜୀଞ୍ଜୁତାକି ଡ଼ୟିନି ରାନ୍ଦା ତାକି କାମା କିଦୁ, ଏ ରାନ୍ଦା ମାଣ୍‌ସି ମୀରୁଏସି ମିଙ୍ଗେ ହିୟାନେସି, ଇଚିହଁ ତାନି ଆବା ମାହାପୁରୁ ଏଞ୍ଜାଣାକି ଅଦିକାରା ହୀହାମାନେସି ।”

୨୮ ଏମ୍‌ାଟିଏ ଏଞ୍ଜାରି ଏଞ୍ଜାଣାଇଁ ଖେଚେରି, “ମାହାପୁରୁତି ବାରେ କାମା କିହାଲିତାକି ମାଙ୍ଗେ ଏନାଆଁ କିହାଲି ଆନେ ?”

୨୯ ଜୀସୁ ଏଞ୍ଜାରାଇଁ ଏଲେଇଚେସି, “ମାହାପୁରୁ ଆମ୍‌ଆରାଇଁ ପାଣ୍ଡାମାଞ୍ଜାନେସି, ଏଞ୍ଜାଣି ତାଣା ନାମିନାୟି ମାହାପୁରୁତି କାମା ।”

୩୦ ଏଚେଟିଏ ଏଞ୍ଜାରି ଏଞ୍ଜାଣାଇଁ ଖେଚେରି, “ଆଡ଼ିହଁ ନୀନୁ ସିନାଲେହେଁ ଏନାଆଁ କିହିମାଞ୍ଜି, ଏଦାଆଁ ମେସାନା ମାମ୍‌ନିଙ୍ଗେ

ନାମାନମି ? ୩୧ ମା ଆକୁ ଆବାୟାଁ ଲକୁ ଡୟାଆ ଟାୟୁତା ‘ମାନା’† ତିଞ୍ଜା ମାଚେରି, ଦାମ୍ବୁପତିତା ରାୟକି ଆହାମାନେ, ତିଞ୍ଜାଲି ଏଞ୍ଜାସି ଏଞ୍ଜାରାକି ଲାକପୁରୁଟି ରାନ୍ଦା ହୀତେସି ।”

୩୨ ଏଚେଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ସାତା ସାତା ନାନୁ ମିଙ୍ଗେ ଝେସିମାଞ୍ଜାଇଁ, ମସା ମିଙ୍ଗେ ଲାକପୁରୁଟି ରାନ୍ଦା ହୀହାମାଞ୍ଜଅସି, ସାମା ନା ଆବା ମିଙ୍ଗେ ଲାକପୁରୁଟି ସାତା ରାନ୍ଦା ହିୟାନେସି; ୩୩ ଇଚିହିଁ ଆମିନି ରାନ୍ଦା ଲାକପୁରୁଟି ଖାହାନା ଦାରତିତି ଲକୁଣି ଜୀଞ୍ଜୁ ହୀନେ, ଏଦି ମାହାପୁରୁ ହିୟାତି ରାନ୍ଦା ।”

୩୪ ଏଞ୍ଜାରି ଜୀସୁଇଁ ଏଲେଇଚେରି, “ପ୍ରବୁ, ମାଙ୍ଗେ ବାରେଦିନା ଏ ରାନ୍ଦା ହିୟାମୁ ।”

୩୫ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ନାନୁଏ ଜୀଞ୍ଜୁତି ରାନ୍ଦାତେଏଁ; ଆମ୍ବାଆସି ନା ତାଣା ଖାନ୍ନେସି, ଏଞ୍ଜାସି ଏଚେଲା ହାକି ଆଅସି, ଅଡେ ନା ତାଣା ନାମିନାସି, ଏଚେଲା ଏସକି ଆଅସି । ୩୬ ସାମା ନାନୁ ମିଙ୍ଗେ ଝେସିମାଞ୍ଜାଇଁ, ମୀରୁ ନାଙ୍ଗେ ମେସ୍ତାତି ଜିକେଏ ନାମିମାଞ୍ଜଅଚେରି । ୩୭ ଆବା ନାଙ୍ଗେ ଆମ୍ବାଆରାଇଁ ହିୟାନେସି, ଏଞ୍ଜାରି ବାରେଜାଣା ନା ତାଣା ଖାନ୍ନେରି; ଅଡେ ନା ତାଣା ଖାନ୍ନାଣାଇଁ, ନାନୁ ଏଚେଲାଞ୍ଜା ପାଙ୍ଗାତା ପିହିଅଁ । ୩୮ ଇଚିହିଁ ନାନୁ ଅଣ୍ପିନି ଲେହେଁ କିହାଲି ଖାହାହିଲଅଁ, ସାମା ନାଙ୍ଗେ ପାଣ୍ଡାତାଣା ଅଣ୍ପୁ ତଲେ କିହାଲି ଲାକପୁରୁଟି ଖାହାମାଇଁ । ୩୯ ଅଡେ ନାଙ୍ଗେ ପାଣ୍ଡାମାଞ୍ଜାନାସି ଆମିନି ଗାଟାରାଇଁ ନାଙ୍ଗେ ହିୟାନେସି, ଏଞ୍ଜାରି ବିତ୍ତାଟି ଆମ୍ବାଆରାଇଁ ଜିକେଏ ଏନିକଁ ନାନୁ ଜାକ୍ଅଁ, ସାମା ରାନ୍ଦି ଦିନାତା ଏଞ୍ଜାରାଇଁ ହାଡାରି ତାଣାଟି ନିକ୍ଇଁ, ଇଦି ଏଞ୍ଜାଣି ଅଣ୍ପୁ । ୪୦ ଇଚିହିଁ ଆମ୍ବାଆସି ମୀରୁଏଣାଇଁ ମେସାନା ଏଞ୍ଜାଣି ତାଣା ନାମିନେସି, ଏଞ୍ଜାସି ଏନିକଁ କାଲାକାଲାତି ଜୀଞ୍ଜୁ ବେଟା ଆନେସି, ଇଦି ନା ଆବାତି ଅଣ୍ପୁ, ଅଡେ ନାନୁ ଏଞ୍ଜାଣାଇଁ ରାନ୍ଦି ଦିନାତା ହାଡାରି ତାଣାଟି ନିକ୍ଇଁ ।”

୪୧ ନାନୁ ଲାକପୁରୁଟି ରେଟା ଖାହାମାନି ରାନ୍ଦାତେଏଁ ଇଞ୍ଜୁଁ ଏଞ୍ଜାସି ଏଲେଇଞ୍ଜାଲିଏ ଜୀହୁଦିୟାଁ ଏଞ୍ଜାଣି କପାଟି ଏଲେଇଞ୍ଜି ଜଲ୍ଲକି ଆଡେରି । ୪୨ “ଇଞ୍ଜାସି ଜସେପ ମୀରୁଏସି ଜୀସୁ ଆଏକି, ଅଡେ

† ୬:୩୧ ୬:୩୧ ମାନା ଇଚିସାରେ ଇସ୍ରାୟେଲ ଲକୁକି ମାହାପୁରୁ ହୀହାମାଟି କାଦିତି ଦରୁ

ମାର ଇଝାଣି ଇୟା ଆବାତି ପୁଞ୍ଜାହିଲାଆୟି କି ? ଆତିହିଁ ନାନୁ ଲାକପୁରୁଟି ରେଟା ଖାହାମାଲ୍ ଇଞ୍ଜିଁ ଏଝାସି ନୀର୍ବ୍ ଏନିକିଁ ଝେସିମାନେସି ?”

୪୩ ଜୀସୁ ଏଝାରାଇଁ ଏଲେଇଚେସି, “ମୀରୁ ମୀରୁ ମୁରୁମୁରୁ ଜଲ୍ଲକି ଆଆତୁ ।” ୪୪ ନାଜେ ପାଣ୍ଡାମାଞ୍ଜାନି ଆବା ଆମ୍ବାଆରାଇଁ ରେଜା କଡିନେସି, ଏଝାସିଦେଁ ନା ତାଣା ଖାହାଲି ଆଡିନେସି, ଅଡେ ନାନୁ ରାନ୍ତି ଦିନାତା ଏଝାଣାଇଁ ହାଡାରି ତାଣାଟି ନିକ୍ଲ୍ । ୪୫ ମାହାପୁରୁ ଅଶପୁତି ବଲୁ ଝେହନାରି ଦାମ୍ବୁପତିତା ରାସକି ଆହାମାନେ, “ବାରେଜାଣା ମାହାପୁରୁ ତାଣାଟି ଜାପିନେରି । ଆମ୍ବାଆସି ଆବାତି କାତା ଝେଞ୍ଜାନା ଜାପାମାନେସି, ଏଝାସି ନା ତାଣା ଖାନେସି । ୪୬ ଆମ୍ବାଆସି ଆବାଲ୍ ମେସାହିଲଅସି, ଆମ୍ବାଆସି ମାହାପୁରୁ ତାଣାଟି ଖାହାମାନାସି, ଖାରଇ ଏଝାସି ମେସାମାନେସି । ୪୭ ନାନୁ ମିଜେ ସାତା ଝେସିମାଞ୍ଜାଇଁ, ଆମ୍ବାଆସି ନାମିନେସି, ଏଝାସି କାଲାକାଲାତି ଜୀଝୁ ବେଟା ଆହାମାନେସି । ୪୮ ନାନୁ ଜୀଝୁତି ରାନ୍ଦାତେର୍ବ୍ । ୪୯ ମୀ ଆକୁ ଆବାୟାଁ ଲକୁ ଡୟାଆ ଟାନ୍ଦୁତା ମାନା ତିଞ୍ଜାନା, ହାଡେରି । ୫୦ ଆମ୍ବାଆରି ଏନିକିଁ ରାନ୍ଦା ତିଞ୍ଜାନା ହାଅରି, ଏଡାଆଁତାକି ଲାକପୁରୁଟି ଖାନ୍ତି ରାନ୍ଦା ଇଦି ।

୫୧ ନାନୁ ଲାକପୁରୁଟି ଖାହାମାନି ଏ ଜୀଝୁଟାଟି ରାନ୍ଦାତେର୍ବ୍; ଆମ୍ବାଆସି ଏ ରାନ୍ଦା ତିନେସି, କାଲାକାଲା ତାକି ନୀତିନେସି; ହାଅ, ନାନୁ ଏମିନି ରାନ୍ଦା ହାଇଁ, ଏଝି ନା ଡଙ୍ଗା, ନାନୁ ଏଝାଆଁ ଦାର୍ତତି ଜୀଝୁଟାକି ହାଇଁ ।”

୫୨ ଇ ହାଡା ଝେଞ୍ଜାନା ଜୀହୁଦିୟାଁ କାରୁବି ଆହାନା ଏଲେଇଶ୍ମି ଆଡେରି, “ଇଝାସି ଏନିକିଁ ମାଜେ ତାନି ଡଙ୍ଗା ତିଞ୍ଜାଲି ହିୟାଲି ଆଡାନେସି ?”

୫୩ ଜୀସୁ ଏଝାରାଇଁ ଏଲେଇଚେସି, “ନାନୁ ସାତା ଝେସିମାଞ୍ଜାଇଁ, ମାଣସି ମୀର୍ବଣି ଡଙ୍ଗା ତିନାଆସାରେ ଅଡେ ତାନି ନେତେରି ଗହ୍‌ଆସାରେ, ମୀ ତାଣା ଜୀଝୁ ହିଲେଏ । ୫୪ ଆମ୍ବାଆସି ନା ଡଙ୍ଗା ତିନେସି ଅଡେ ନା ନେତେରି ଗହ୍‌ନେସି, କାଲାକାଲାତି ଜୀଝୁ ବେଟା ଆନେସି, ଅଡେ ନାନୁ ଏଝାଣାଇଁ ରାନ୍ତି ଦିନାତା ହାଡାରି ତାଣାଟି ନିକ୍ଲ୍ । ୫୫ ଇତିହିଁ ନା ଡଙ୍ଗା ସାତା ରାନ୍ଦା ଅଡେ ନା ନେତେରି ସାତା

ଗହନାୟି । ୫୭ ଆମ୍ବାଆସି ନା ଉଚ୍ଚା ତିନେସି ଅଡ଼େ ନା ନେତେରି ଗହନେସି, ଏଝାସି ନା ତାଣା ଡ଼ୟିନେସି ଅଡ଼େ ନାନୁ ଏଝାଣି ତାଣା ଡ଼ୟିଇଁ । ୫୭ ଜୀଝୁତି ଆବା ନାଜେ ଏନିକି ପାଣ୍ଡାମାଞ୍ଜାନେସି ଅଡ଼େ ନାନୁ ତାନିତାଣାଟି ନୀତାମାଇଁ, ଏଲେକିହିଁ ଏ ଆମ୍ବାଆସି ନାଜେ ତିଞ୍ଜାନେସି, ଏଝାସି ଜିକେଏ ନା ତାଣାଟି ନୀତିନେସି । ୫୮ ଆମିନି ରାନ୍ଦା ଲାକପୁରୁଟି ଝାହାମାନେ, ଏଦି ଇଦି; ମୀ ଆକୁ ଆବାୟାଁ ଏନିକି ତିଞ୍ଜାନା ହାଡ଼େରି, ଇଦି ଏଲେତାୟି ଆଏ, ଆମ୍ବାଆସି ଇ ରାନ୍ଦା ତିନାସି ଏଝାସି କାଲାକାଲା ତାକି ଜୀଝୁତଲେ ଡ଼ୟିନେସି ।”

୫୯ ଜୀସୁ କପରନାହୁମତି ର ଜୀହୁଦି ଲକୁତି କୁଟମି ଇଲୁତାଃ ମାହାପୁରୁ ବଲୁ ଝେସିମାଗାଟି ଇ ବାରେ କାତା ଝେସେସି ।

କାଲାକାଲା ଜୀଝୁତି ବଲୁ

୬୦ ଜୀସୁତି ସୀସୁୟାଁ ବିତ୍ରାଟି ହାରେକା ଇ ବାରେ କାତା ଝେଞ୍ଜାନା ଏଲେଇଚେରି, “ଇଦି ଅପାଆଗାଟି କାତା, ଆମ୍ବାଆସି ଇଦାଆଁ ଝେଞ୍ଜାଲି ଆଡ଼ିନେସି?”

୬୧ ଏଝାରି ଇ କାତାତାକି ଝେସି ଆହିମାନେରି ଇଞ୍ଜିଁ ଜୀସୁ ପୁଞ୍ଜାନା ସୀସୁୟାଁ ଏଲେଇଚେସି, “ଇ କାତା ମିଜେ ଅପାଆଗାଟାୟି ଆହିମାନେ କି ? ୬୨ ଆତିହିଁ ମାଣସି ମୀରଏସି ତଲିଏ ମାଟି ଟାୟୁତା, ଝେଣ୍ଡେ ହାନାଣି ମେସିହିଁ, ଏନାଆଁ ଇଞ୍ଜେରି ? ୬୩ ମାହାପୁରୁଟି ଜୀଝୁ ନୀତାଲି ହୀନାୟି; ମାଣସିତି ଆଜା ଏନାଆଁ କିୟାଲି ଆଡ଼େଏ; ନାନୁ ମିଜେ ଝେସୁତି ବଲୁ ବାରେ, ସୁଦୁଜୀଝୁ ଅଡ଼େ ନୀତିନି ବଲୁ । ୬୪ ସାମା ମୀ ବିତ୍ରାଟି ଏଚରଜାଣା ନାମିହିଲଅରି” ଇତିହିଁ ଆମ୍ବାଆରି ନାମି ହିଲାଆତେରି ଅଡ଼େ ଆମ୍ବାଆସି ଏଝାଣାଇଁ ସାତୁ କେୟୁତା ହେରପିନେସି ଏଦାଆଁ ଜୀସୁ ତଲିଏ ପୁଞ୍ଜାମାଚେସି । ୬୫ ଅଡ଼େ ଏଝାସି ଏଲେଇଚେସି, “ଏଦାଆଁତାକି ନାନୁ ମିଜେ ଝେସିମାଞ୍ଜାଇଁ, ଆବା ହେଲ ହୀଆତିହିଁ ଆମ୍ବାଆସି ନା ତାଣା ଝାୟାଲି ଆଡ଼ଅସି ।”

୬୬ ଏ ଦିନାଟିଏ ତାନି ସୀସୁୟାଁ ବିତ୍ରାଟି ହାରେକା ଜାଣା ଅପାଆନାହାଁ ହାଜାତୁସେରି, ଇଞ୍ଜାଁ, ଏଝାଣିତଲେ ଅଡ଼େ ହାଲାଆତେରି ।

୨୭ ଏମ୍ବାଟିଏ ଜୀସୁ ବାରଜାଣା ସୀସୁୟାଣି ଖେରେସି, “ମୀରୁ ଜିକେଏ ହାଜାଲି ମନ କିହିମାଞ୍ଜେରି କି ?”

୨୮ ✧ ସିମନ ପିତର ଏଞ୍ଜାଣାଲ୍ ଏଲେଇରେସି, “ପ୍ରବୁ ଆମ୍ବାଆରି ତାଣା ହାନମି ? କାଲାକାଲାତି ଜୀସୁତି ବଲୁ ନୀ ତାଣା ମାନେ ।

୨୯ ନୀନୁ, ମାହାପୁରୁ ତାଣାଟି ଖାହାମାନି ଏ ସୁଦୁ ମାଣସିତି ଇଦାଆଁ ମାମ୍ବୁ ନାମା ମାନମି ଅଡେ ପୁଞ୍ଜାମାନମି ।”

୩୦ ଜୀସୁ ଏଞ୍ଜାରାଲ୍ ଏଲେଇରେସି, “ନୀନୁ ଏନାଆଁ ମୀ ବାରଜାଣାତେରି ମିଙ୍ଗେ ଆଚାମାଞ୍ଜିଅଁ କି ? ଅଡେ ମୀ ବିତ୍ରାଟି ରଅସି ସୟତାନ ।” ୩୧ ଏଞ୍ଜାସି ଇସ୍ପାରିୟତ ସିମନ ମୀରଏସି ଜୀହୁଦାଲ୍ ସିନିକିହାନା ଏଲେଇରେସି, ଇଚିହିଁ ଏଞ୍ଜାସି ବାରଜାଣା ସୀସୁୟା ବିତ୍ରାଟି ରଅସି, ଅଡେ ଏଞ୍ଜାସି ଜୀସୁଲ୍ ସାତୁ କେୟୁତା ହେରପାଲି ହାଜିମାରେସି ।

୭

ଜୀସୁ ଅଡେ ତାନି ତାୟିୟାଁ

୧ ଇଦାଆଁ ତାୟୁ ଜୀସୁ ଗାଲିଲିତା ରେଜିମାରେସି, ଇଚିହିଁ ଜୀହୁଦିୟାଁ ଏଞ୍ଜାଣାଲ୍ ପାୟାଲି ଅଣ୍ଡି ମାଚାକି ଏଞ୍ଜାସି ଜୀହୁଦା ରାଜିତା ରେଜାଲି ମନ କିହି ହିଲାଆତେସି । ୨ ସାମା ଜୀହୁଦି ଲକୁତି “ଗଚାୟାଁ ଗୁଡାତା ବାସାଆନି” ପାରୁଁ ତାଗେ ଖାହିମାଚାକି । ୩ ଜୀସୁତି ତାୟିୟାଁ ଏଞ୍ଜାଣାଲ୍ ଏଲେଇରେସି, “ନୀନୁ କିହିମାନି କାମାୟାଁ, ନୀ ସୀସୁୟାଁ ଜିକେଏ ମେହନେରି ଇଦାଆଁତାକି ନୀନୁ ଇମ୍ବାଟି ହଚା ହାଜାନା ଜୀହୁଦା ରାଜିତା ହାଲାମ୍ବୁ । ୪ ଇଚିହିଁ ଲକୁତାଣା ଖେଙ୍ଗାଲି ମନ କିନାସି ତାନି କାମା ତୁଗୁାହାଁ କିଅସି । ନୀନୁ ଇ ବାରେ କାମା କିହିମାଞ୍ଜି, ଆତିହିଁ ନୀନୁ ଦାର୍ଡି ନକିତା ତସାକତାମ୍ବୁ ।” ୫ ଇଚିହିଁ ତାନି ତାୟିୟାଁ ଜିକେଏ ତାଙ୍ଗେ ନାମି ହିଲାଆତେରି ।

୬ ଏମ୍ବାଟିଏ ଜୀସୁ ଏଞ୍ଜାରାଲ୍ ଏଲେଇରେସି, “ନୀର୍ବ ପାତେକା ନା ଦିନା ଏଜାମାଞ୍ଜେଏ, ସାମା ମୀ ଦିନା କାଲେଏ ମାନେ ।”

୭ ଦାର୍ଡିତାରି ମିଙ୍ଗେ ଅପାନେରି ସାମା ନାଙ୍ଗେ ଅପଅରି ଏନାଆଁତାକି ଇଚିହିଁ ତାନି କାମା ବାରେ ଲାଗେଏତାୟି ଇଞ୍ଜି

ନାନୁ ସାକି ହୀହାନା ତସିମାଈ । ୮ ମୀରୁ ଈ ପାର୍ବୁତା ହାନ୍ତୁ, ନାନୁ ନୀଏଁ
 ଈ ପାର୍ବୁତା ହାଜିହିଲଅଁ, ଇଚିହଁ ନା ଦିନା ଖାହାହିଲେଏ । ୯ ଏଝାସି
 ଏଝାରାଇଁ ଈ ବାରେ କାତା ଝେସାନା ଗାଲିଲିତା ତ୍ତୟିତେସି ।

ଗରାୟାଁ ଗୁଡ଼ାତା ବାସାଆନି ପାର୍ବୁତା ଜୀସୁ

୧୦ ଜୀସୁତି ତାୟିୟାଁ ଏ ପାର୍ବୁତା ହାଚି ତାୟୁ, ଜୀସୁ ଜିକେଏ ହାଚେସି
 ସାମା ଲକୁ ମେହ୍‌ଆରେରୁଁ ମେଣେଏ ହାଚେସି । ୧୧ ପାର୍ବୁ ବେଲ୍ୟାତା
 ଜୀହୁଦି ଲକୁ ଏଝାଣାଇଁ ପାରି ପାରିହଁ, “ଏଝାସି ଏନ୍ଦିୟା ମାନେସି
 ଇଞ୍ଜଁ ଝେଚେରି ?”

୧୨ ବାରେ ଲକୁ ଏଝାଣି ତାକି କିଲିବିଲି ଆହିମାଚେରି, ଏଚରଜାଣା
 “ଏଝାସି ନେହଁ ମାଣସି” ଇଚେରି; ଅଡ଼େ ଏଚରଜାଣା “ଆଏ, ଏଝାସି
 ଲକୁଣି ନାଡ଼ି କିହିମାନେସି” ଇଞ୍ଜଁ ଇଚେରି । ୧୩ ସାମା ଜୀହୁଦିୟାଁ
 ଆଜିତାକି ଆମ୍ବାଆରି ତାନି କାତା ପାଙ୍ଗାଝେଙ୍ଗେ ଝେସି ହିଲାଆଚେରି
 ।

୧୪ ସାମା ପାର୍ବୁତି ମାଦି ପାଚେକା ରାହାଲିଏ, ଜୀସୁ ମାହାପୁରୁ
 ଇଲୁତା ହାଜାନା ଜାପ୍‌ହାଲି ମାଚ୍‌ହେସି । ୧୫ ଏମ୍ବାଟିଏ ଜୀହୁଦିୟାଁ
 କାବାଆହାନା ଏଲେଇଚେରି, “ଇଝାସି ପାଟା ଜାପାଆନାହାଁ ଏନିକଁ
 ଇଚେକା ବୁଦି ପୁଚେସି ?”

୧୬ ଜୀସୁ ଏଝାରାଇଁ ଏଲେଇଚେସି, “ନାନୁ ଜାପ୍‌ହିମାନାୟି ନା
 ତାଣାଟି ଆଏ, ସାମା ନାଙ୍ଗେ ପାଣ୍ଡାତାଣାଝାୟି । ୧୭ ଆମ୍ବାଆସି
 ତାନି ଅଣ୍‌ପୁ ତଲେ କିହାଲି ଅଣ୍‌ପିନେସି, ଆଡ଼ିସାରେ ଈ ଜାପ୍‌ନାୟି
 ମାହାପୁରୁ ତାଣାଟି ଖାହାମାନେ, କି, ନା ତାଣାଟି ଝେସିମାଈ, ଏଦାଣି
 ଏଝାସି ପୁନେସି । ୧୮ ଆମ୍ବାଆସି ନାଦିଏ ଇନେସି, ଏଝାସି ତାନି
 ଗାଝୁରମି ପାରିନେସି, ସାମା ଆମ୍ବାଆସି ତାଙ୍ଗେ ପାଣ୍ଡାମାଞ୍ଜାନାଣା
 ଗାଝୁରମି ପାରିନେସି, ଏଝାସି ସାତା, ଅଡ଼େ ଏଝାଣି ତାଣା ଏନାୟି
 ଲାଗେଏ କିନାୟି ହିଲେଏ । ୧୯ ମସା ମିଙ୍ଗେ ମେରା ହୀହାମାଞ୍ଜଅସି
 କି ? ଆଡ଼ିଜିକେଏ ମୀ ବିଡ଼ାଟି ଆମ୍ବାଆଚେରି ମେରାଟି ମାନଝି ଆହି
 ହିଲଅଚେରି, ମୀରୁ ଏନାଆଁତାକି ନାଙ୍ଗେ ପାୟାଲି ଅଣ୍‌ପିମାଞ୍ଜାଦେରି
 ?”

୨୦ ଲକୁ ବାରେ ଏଲେଇଚେରି, “ନିଙ୍ଗେ ବୁଡୁ ଆଲ୍‌ଗାମାଞ୍ଜାନେ,
 ନିଙ୍ଗେ ଆମ୍ବାଆସି ପାୟାଲି ଅଣ୍‌ପି ମାଞ୍ଜାନେସି ?”

୨୧ ଜୀସୁ ଏଝାରାଇଁ ଏଲେଇଚେସି, “ନାନୁ ର କାବାଆନି କାମା କିତେଏଁ, ଅଡ଼େ ମୀରୁ ବାରେ କାବା ଆଡ଼େରି । ୨୨ ଇଦାଆଁତାକି ମସା ମିଙ୍ଗେ ତଲୁ ଦାପି କିନି ମେରା ହାହାମାଞ୍ଜାନେସି, ଇ ମେରା ମସା ତାଣାଟି ଆହାମାନେ, ଏଡ଼ି ଆଏ, ସାମା ଆକୁ ଆବାୟାଁ ତାଣାଟି, ଇଞ୍ଜା ମୀରୁ ଜମିନି ଦିନାତା ଜିକେଏ କକାରି ତଲୁ ଦାପି କିହିମାଞ୍ଜେରି ? ୨୩ ☆ଜମିନି ଦିନାତା ର କକାଣି ତଲୁ ଦାପି କିନାଣିତାକି ମସାଟି ମେରା ଉରିହିଲଅଡେରି, ଆତିହିଁ ନାନୁ ଜମିନି ଦିନାତା ର ମାଣସିତି ଗୁଡ଼ା ଆଙ୍ଗା ନେହିଁ କିୟାଲିଏ ମୀରୁ ନାଙ୍ଗେ ଏଦାଆଁତାକି କପା ଆହିମାଞ୍ଜାଦେରି ? ୨୪ ଝାରଇ ଲାକ ଲାକ କାତା ମେସାନା ନୀହାୟି କିଆଦୁ ସାତା ତଲେ ନୀହାୟି କିଦୁ ।”

ଇଝାସି ଏଦାଆଁ ମସିହା ?

୨୫ ଏଚେଟିଏ ଜିରୁସାଲମତା ମାନାରି ବିତ୍ତାଟି ଏଚରଜାଣା ଝେସପି ଆଡ଼େରି, “ଆମ୍ବାଆରାଇଁ ଇଝାରି ପାୟାଲି ଅଣ୍ଡିମାନେରି ଇଝାସି ଏଝାସି ଆଏକି ? ୨୬ ଅଡ଼େ ମେହ୍ତୁ, ଏଝାସି ଲକୁ ପୁଣ୍ଡେ କାତା ଝେସିମାନେସି, ଇଞ୍ଜା ଏଝାଣାଇଁ ସାଲଝି କିନାରି ଏଦାଆଁ କିହିହିଲଅରି । ଏଝାସି କ୍ରୀସ୍ତ ଇଞ୍ଜା ଏଝାରି ଏଦାଆଁ ସାତା ତଲେ ପୁଚେରି କି ? ୨୭ ଆତିହିଁ ଏଝାସି, ଆମ୍ବିଟି ଝାହାମାନେସି, ଇଦାଆଁ ମାର ପୁଞ୍ଜାମାନାୟି, ସାମା କ୍ରୀସ୍ତ ଏଚିବେଲା ଝାନେସି, ଏଚିବେଲାତା ଆମ୍ବାଆସି ପୁନଅସି, ଇତିହିଁ ଏଝାସି ଆମ୍ବିଟି ଝାହାମାନେସି ।”

୨୮ ଜୀସୁ ମାହାପୁରୁ ଇଲୁତା ମାହାପୁରୁ କାତା ଝେସି ଝେସିହିଁ କାଜା ରିୟାତଲେ ଏଲେଇଚେସି, “ମୀରୁ ସାତେଏ ନାଙ୍ଗେ ପୁଞ୍ଜାମାଞ୍ଜାଦେରି ଅଡ଼େ ନାନୁ ଏମ୍ବିଟି ଝାହାମାଇଁ ଏଦାଆଁ ସାତେଏ ପୁଞ୍ଜାମାଞ୍ଜେରି; ନାନୁ ନା ଅଣ୍ଡୁ ତଲେ ଝାହାହିଲଅଁ, ସାମା ନାଙ୍ଗେ ପାଣ୍ଡାତାସି ଏଝାସି ସାତା, ମୀରୁ ଏଝାଣାଇଁ ପୁଞ୍ଜାହିଲଅଡେରି । ୨୯ ନାନୁ ଏଝାଣାଇଁ ପୁଞ୍ଜାମାଇଁ, ଇତିହିଁ ନାନୁ ଏଝାଣି ତାଣାଟି ଝାହାମାଇଁ, ଅଡ଼େ ଏଝାସି ନାଙ୍ଗେ ପାଣ୍ଡାତେସି ।”

୩୦ ଏମ୍ବାଟିଏ ଜୀସୁଇଁ ଆସାଲି ତାକି ଅଣ୍ଡିଚେରି; ସାମା ଆମ୍ବାଆରି କେୟୁ ଏଝାଣି ମୁହେଁ ଏଆଡେ, ଇତିହିଁ ଏଝାଣାଇଁ ଆହୁନି କାଟୁ

☆ ୭:୨୩ ୭:୨୩ ଜହ ୫:୯

ଏଚେତା ଏଜାହିଲାଆତେ । ୩୧ ସାମା ଲକୁ ବିତ୍ରାଟି ହାରେକା ଏଝାଣି ତାଣା ନାମାନା ଏଲେଇଚେରି, “ଇଝାସି ଏନ୍ତି ଏନ୍ତି କାବାଆନ୍ତି କାମା ବାରେ କିହିମାନେସି, କ୍ରୀସ୍ତୁ ଝାହାନା ଇଝାଣି କିହା ଏନାଆଁ ଆଗାଡ଼ା କିନେସି ?”

ଜୀସୁଇଁ ଦସାଲି କସକାଣି ପାଣ୍ଡିନାୟି

୩୨ ଲକୁ ଜୀସୁ କାତା ତାମି ବିତ୍ରା ଝେସପି ଆହିମାଗାଣି ପାରୁସିୟାଁ ଝେଚେରି ଅଡ଼େ ପାରୁସିୟାଁ ଅଡ଼େ କାଜା ପୁଜେରାଙ୍ଗା ଜୀସୁଇଁ ଦସାଲି ଜାମାନାଙ୍ଗାଣି ପାଣ୍ଡିଚେରି । ୩୩ ଏମ୍ବାଟିଏ ଜୀସୁ ଏଲେଇଚେସି, “ନାନୁ ମୀ ତଲେ ଗାଡ଼େକା ତାକି ତୁୟାହାଁ ନାଙ୍ଗେ ପାଣ୍ଡାତାଣା ତାଣା ହାଇଁ । ୩୪ ମୀରୁ ନାଙ୍ଗେ ପାରାଦେରି, ସାମା ମେଡ଼ାଆୟଅଚେରି; ଅଡ଼େ, ନାନୁ ଏମ୍ବିୟା ମାଇଁ, ମୀରୁ ଏମ୍ବାଆଁ ଝାହାଲି ଆଡ଼ଅଚେରି ।”

୩୫ ଜୀହୁଦିୟାଁ ତାମ୍ବୁତାମ୍ବୁସୁ ଝେସପି ଆଚେରି, “ଇଝାସି ଆମ୍ବିୟା ହାଜିମାନେସି, ମାର ଏଝାଣାଇଁ ବେଟାଆହାଲି ଆଡ଼ାଆୟି ଏନାଆଁ ଇଝାସି ଇତାଲା ଆତାଲା ଜାଙ୍ଗାହାଜାମାନି ଗ୍ରିକ୍ ଲକୁଇଁ ଜାପୁହାଲି ହାଜିମାନେସି କି ?” ୩୬ “ମୀରୁ ନାଙ୍ଗେ ପାରାଦେରି, ସାମା ବେଟାଆୟଅଚେରି, ଅଡ଼େ ନାନୁ ଏମ୍ବିୟା ମାଇଁ, ମୀରୁ ଏମ୍ବାଆଁ ଝାହାଲି ଆଡ଼ଅଚେରି, ଇଞ୍ଜିଁ ଏଝାସି ଝେସ୍ତାତି ଇ କାତା ଏନାୟି ଇଞ୍ଜିଁ ଝେସପି ଆଚେରି ?”

ଜୀହୁହାନି ଜାରଣା ଏୟୁ

୩୭ ରାନ୍ତି ଦିନା, ଇଚିସାରେ ପାରୁଡ଼ି କାଜା ଦିନା, ଜୀସୁ ନିଚାନା କାଜା ଗିୟାତଲେ ଏଲେଇଚେସି, ଆମ୍ବାଆସି ଏସକି ଆଡ଼ିହୁଁ, ଏଝାସି ନା ତାଗେ ଝାହାନା ଗସପେସି । ୩୮ ଅଡ଼େ ଆମ୍ବାଆସି ନା ତାଣା ନାମିନେସି, “ଦାମ୍ବୁ ପତିତା ରାସକି ଆହାମାନି ଲେହେଁ, ଏଝାଣି ହିୟାଟି ଜୀହୁତି ଜାରଣା ଏୟୁ ହନୁ* ।” ୩୯ ଜୀସୁ ସୁଦୁଜୀହୁତି କାତା ଝେସିମାଚେସି, ଆମିନି ଗାଟାରି ଜୀସୁ ତାଣା ନାମି ମାଚେରି, ଏଝାରି ସୁଦୁଜୀହୁ ବେଟାଆନାୟି ମାଚେ, ଜୀସୁ ଗାଝୁରମି ବେଟାଆହା ହିଲାଆତାକି ଏଝାରାକି ଏଚେତା ସୁଦୁଜୀହୁ ହୀପକି ଆହାହିଲାଆତେ ।

ଲକୁ ବିତ୍ରା ବାଗା ଆନାୟି

* ୭:୩୮ ୭:୩୮ ଇ କାତା ପ୍ଲୁଃଇ ପତିତା ହିଲେଏ

୪୦ ଏବେତା, ଲକ୍ଷ୍ମୀ ଏ କାତା ଖେଚେରି, ଏଝାରି ବିଦ୍ରାଟି ଏଚରଜାଣା ଏଲେଇଚେରି, “ଇଝାସି ସାତେଏ ମାହାପୁରୁ ଅଣ୍ଟପୁତି ବଲ୍ଲୁ ଖେହ୍ନାସି ।”

୪୧ ଏଟକାତାରି ଏଲେଇଚେରି, “ଏଝାସି ମସିହା !”† ସାମା ଆମ୍ବା ଆମ୍ବାଆରି ଏଲେଇଚେରି, “ମସିହା !‡ ଏନାଆଁ ଗାଲିଲିଟି ଖାନ୍ଦେସି କି ? ୪୨ ଦାମ୍ବୁ ସାଢ଼େସ୍ତରିତା ରାସ୍ତକି ଆହାମାନେ, କ୍ରୀସ୍ତ ଦାଝୁଦ ରାଜା କୁଡ଼ାଟି ଇଞ୍ଜା ଦାଝୁଦ ଏମିନି ଟାୟୁତା ବାସା ଆହାମାଚେସି, ଏ ବେତଲିହିମ ନାୟୁଟି ଖାନ୍ଦେସି ।” ୪୩ ଇଦାଆଁତାକି ଲକ୍ଷ୍ମୀ ତାମି ବିଦ୍ରାଟି ଏଝାଣି ତାକି ବାଗା ଆଡ଼େରି; ୪୪ ଅଡ଼େ, ତାମି ବିଦ୍ରାଟି ଆମ୍ବା ଆମ୍ବାଆରି ଏଝାଣାଇଁ ଆସାଲି ଅଣ୍ଟପି ମାଚେରି, ସାମା ଆମ୍ବା ଆମ୍ବାଆରି ତାନି ଲାକ କେୟୁ ଇଟାଲି ଆଡ଼ାଆଚେରି ।

ସାଲୁଖି କିନି ଜୀହୁଦିୟାଁ ନାମାଆ ଗାଟାୟି

୪୫ ଏବେଟିଏ ଜାମାନାଲ୍ଲା କାଜା ପୁଜେରା ଅଡ଼େ ପାରୁସିୟାଁ ତାଣା ଖେଣ୍ଡା ହାଚେରି, ଅଡ଼େ ଏଝାରି ଏଝାରାଇଁ ଖେଚେରି, “ଏଝାଣାଇଁ ଏନାଆଁତାକି ଆସା ତାଆଚେରି ?”

୪୬ ଜାମାନାଲ୍ଲା ଏଝାରାଇଁ ଏଲେଇଚେରି, “ଇ ମାଣ୍ଡସି ଏନିକି ହାଡ଼ା ଖେହ୍ନାସି, ଏଲେକିହ୍ ଏମିନି ମାଣ୍ଡସି ଏଚେଲ୍ଲା ଖେସାହିଲଅସି ।”

୪୭ ପାରୁସିୟାଁ ଏଝାରାଇଁ ଏଲେଇଚେରି, “ଏନାଆଁ ମୀରୁ ଜିକେଏ ନାଡ଼ିକିଝି ଆଡ଼େରି ? ୪୮ ପାରୁସିୟାଁ ବିଦ୍ରାଟି କି ସାଲୁଖି କିନାରି ବିଦ୍ରାଟି ଆମ୍ବାଆରି ଏଝାଣି ତାଣା ନାମାମାନେରି କି ? ୪୯ ସାମା ଇ ଏମିନି ଲକ୍ଷ୍ମୀ ମସାତି ମେରା ପୁଞ୍ଜାହିଲଅରି, ଏଦାଆଁତାକି ଇଝାରି ବାକା ଗାଟି ଲକ୍ଷ୍ମୀ ।”

୫୦ ☆ଏମିନି ନିକଦିମ ଇଦାଆଁ ନକେଏ ଜୀସୁଇଁ ମେସାଲି ତାକି ଖାହାମାଚେସି ଇଞ୍ଜା ଏଝାସି ଏଝାରି ବିଦ୍ରାଟି ପାରୁସି ମାଚେସି, ଏଝାସି ଏଝାରାଇଁ ଖେଚେସି, ୫୧ “ରଅଣି ତାଣାଟି ନକେଏ ଖେନାଆନା ଇଞ୍ଜା ତାନି ମାଣ୍ଡକି ପୁନାଆନା ମା ମସାତି ମେରା ଏନାଆଁ ଏଝାଣାଇଁ ଦହ୍ କିନେ ?”

† ୭:୪୧ ୭:୪୧ କ୍ରୀସ୍ତ ‡ ୭:୪୧ ୭:୪୧ କ୍ରୀସ୍ତ ☆ ୭:୫୦ ୭:୫୦ ଜହ୍ ୩:୧,୨

୫୨ ଏଞ୍ଜାରି ଏଞ୍ଜାଣାଙ୍କୁ ଏଲେଇଚେରି, “ନୀନୁ ଜିକେଏ ଏନାଆଁ ଗାଲିଲି ଲକୁ କି ? ଗାଲିଲିଟି ଏନି ମାହାପୁରୁ ଅଣ୍ଟପୁତି ବଲୁ ଝେହନାରି ଏଚେଲା ଝାହାଲି ଆଡ଼ଅରି, ଇଦାଆଁ ସାଢ଼େସ୍ତେରିତା ସିନିକିମୁ ।” ୫୩ ଅଡ଼େ ଏଞ୍ଜାରି ବାରେଜାଣା ଜାହାରା ଇଜ ହାଚେରି ।

୮

ଦାଢ଼େଣି ଆୟାଟି

୧ ସାମା ଜୀସୁ ଜୀତ ହରୁତା ହାଚେସି । ୨ ଅର ଦିନା ଲାଈ ଏଞ୍ଜାସି ମାହାପୁରୁ ଇଲୁତା ଝେଣ୍ଡା ଝାଡ଼େସି, ଅଡ଼େ, ବାରେ ଲକୁ ଏଞ୍ଜାଣି ତାଣା ଝାହାଲିଏ, ଏଞ୍ଜାସି କୁଗାନା ଜାପହାଲି ମାଟହେସି । ୩ ମେରା ଜାପୁନାରି ଅଡ଼େ ପାରୁସିୟାଁ ଦାରି କାମାତା ଆସ୍ପି ଆହାମାନି ର ଇୟାନି ତାଚେରି, ବାରେଜାଣା ନକିତା ନିପହାନା ଜୀସୁଙ୍କୁ ଏଲେଇଚେରି । ୪ “ଗୁରୁ, ଇ ଇୟା ଦାରିକାମା କିହିମାଚାଟି ଆସ୍ପି ଆଡ଼େ । ୫ ଇଲେତି ଇୟାସିକାଣି ଝାଲୁକା କୁତାନା ଝେଚାଲିତାକି ମସା ମା ମେରାତା ହୁକୁମି ହାହାମାଞ୍ଜାନେସି; ଆଡ଼ିହୁଁ ନୀନୁ ଏନାଆଁ ଝେସିମାଞ୍ଜାଦି ?” ୬ ଏଞ୍ଜାରି ଜୀସୁଙ୍କୁ ଏନିକିଁ ପାନ୍ଦାତା ମେଡ଼ହାଲି ଆଡ଼ିନେରି, ଇଦାଆଁତାକି ଏଞ୍ଜାରି ଏଞ୍ଜାଣାଙ୍କୁ ତାୟିପାରି କିହାଲି ଝେଚେରି, ସାମା ଜୀସୁ ମୁନୁକାପାନା ଝାଞ୍ଜୁ ତଲେ ବୁମିତା ରାଚାଲି ମାଟହେସି ।

୭ ଏଞ୍ଜାରି ଏମ୍ବାଆଁ ନିଚାନା ଝେଣ୍ଡେ ଝେଞ୍ଜାଲିଏ, ଜୀସୁ ତାୟିଁ ପେରହାନା ଏଞ୍ଜାରାଙ୍କୁ ଏଲେଇଚେସି, “ମୀ ବିତାଟି ଆମ୍ବାଆସି ଏଚେଲା ଏନି ପାପୁ କିହାହିଲଅସି, ଏଞ୍ଜାସି ମୁଲୁ ଝାଲି କୁତାପେସି ।” ୮ ଅଡ଼େ ଝେଣ୍ଡେ ଜୀସୁ ମୁନୁକାପାନା ବୁମିତା ରାଚାଲି ମାଟହେସି । ୯ ଜୀସୁତି ହାଡ଼ା ଝେଞ୍ଜାନା ଏଞ୍ଜାରି କାଜାରିଟିଏ ମାଟହାଁ ରଅଣି ଜେଚ ରଅସି ହାଜାଲି ମାଟହେରି, ଏମ୍ବାଆଁ ଝାରଇ ଜୀସୁ ଅଡ଼େ ମାଦି ମାନି ଏ ଇୟା ଡ଼ୟିତେ । ୧୦ ଜୀସୁ ତାୟିଁ ଚୁପେରହାନା ଏଦାନି ଏଲେଇଚେସି, “ଏ ଇୟା ଏଞ୍ଜାରି ଏମ୍ବିୟା ? ଆମ୍ବାଆରି ନିଜେ ଡ଼ଣ୍ଡ ହାହାଲି ହିଲଅରି କି ?”

୧୧ ଏଦି ଏଲେଇଚେ, “ଆଏ, ପ୍ରବୁ, ଆମ୍ବାଆରି ହିଲଅରି ।”

ଏମ୍ବାଟିଏ ଜୀସୁ ଏଦାନି ଏଲେଇରେସି; “ନାନୁ ଜିକେଏ ନିଙ୍ଗେ ଡଣ୍ଡ ହିୟଅ; ହାଲାମ୍, ସାମା ଅଡ଼େ ପାପୁ କିଆନି* ।”

ଜୀସୁ ଦାର୍ତ୍ତିତ ଉଜେଡ଼ି

୧୨ ✠ଜୀସୁ ଖେଣ୍ଡେ ପାରୁସିୟାଁଇଁ ଏଲେଇରେସି, “ନାନୁ ଦାର୍ତ୍ତିତ ଉଜେଡ଼ି, ଆମ୍ବାଆସି ନା କେଚ ଖାନ୍ଦେସି, ଏଞ୍ଜାସି ଜୀଞ୍ଜୁତି ଉଜେଡ଼ି ବେଟା ଆନେସି ଅଡ଼େ ଏରେଲା ଜିକେଏ ଆନ୍ଦେରିତା ତାକଅସି ।”

୧୩ ✠ପାରୁସିୟାଁ ଏଞ୍ଜାଣାଇଁ ଏଲେଇରେରି, “ନୀଏଁ ନାନୁ ନିଙ୍ଗେତାକି ସାକି ହାହିମାଞ୍ଜି, ନାନୁ ଏନାଆଁ ଏଲେ ଇଞ୍ଜିମାଞ୍ଜି ଏଦି ସାତା ପାର୍ମାଣା ହିଲାଆଗାଟାୟି ।”

୧୪ ଜୀସୁ ଏଞ୍ଜାରାଇଁ ଏଲେଇରେସି, “ଆଏ ନାନୁ ନା ତାକି ସାକି ହୀତି ଜିକେଏ, ନାନୁ ଏନାଆଁ ଖେସିମାଞ୍ଜାଇଁ ଏଦି ସାତା, ଇଚିହିଁ ନାନୁ ଆମ୍ବିଟି ଖାହାମାଇଁ ଅଡ଼େ ଏମ୍ବିୟା ହାଜିମାଇଁ ଏଦାଆଁ ପୁଞ୍ଜାମାଇଁ, ମୀରୁ ପୁଞ୍ଜାହିଲଅତେରି ଏମ୍ବାଟି ଖାଇଁ ଅଡ଼େ ଏମ୍ବିୟା ହାଇଁ । ୧୫ ମୀରୁ ଖାରୁଇ ମାଣ୍ଡସିୟାଁ ଲେହେଁ ବିଚାରା କିହିମାଞ୍ଜେରି, ନାନୁ ଆମ୍ବାଆରି ବିଚାରା କିଅଁ । ୧୬ ସାମା ନାନୁ ବିଚାରା କିଇଁ, ଆଡ଼ିଜିକେଏ ନା ବିଚାରା ସାତା; ଇଚିହିଁ ନାନୁ ରଅତେଏଁ ଆଏ ସାମା ଏମିନି ଆବା ନାଙ୍ଗେ ପାଣ୍ଡାମାଞ୍ଜାନାସି ନା ତଲେ ମାନେସି । ୧୭ ମୀ ମସାତି ମେରାତା ରାସ୍ତକି ଆହାମାନେ, ରିଆରି ସାକି ହାଡ଼ା ରଲେଏ ଆଡ଼ିସାରେ, ଏଞ୍ଜାରି ଏନାଆଁ ଇନେରି ଏଦି ସାତା । ୧୮ ନାନୁ ନାଙ୍ଗେତାକି ସାକି ହାହିମାଇଁ, ଅଡ଼େ, ନାଙ୍ଗେ ପାଣ୍ଡାମାଞ୍ଜାନି ଆବା ଜିକେଏ ନା ଖାକିଟି ସାକି ହାହିମାନେସି ।”

୧୯ ଏଞ୍ଜାଣାଇଁ ଏଞ୍ଜାରି ଖେରେରି, “ନୀ ଆବା ଏମ୍ବିୟା ?” ଜୀସୁ ଏଲେଇରେସି, “ନାଙ୍ଗେ କି ନା ଆବାଇଁ ମୀରୁ ପୁଞ୍ଜାହିଲଅତେରି; ନାଙ୍ଗେ ପୁଞ୍ଜାଡ଼ିହିଁ ମା, ନା ଆବାଇଁ ଜିକେଏ ପୁରେରିମା ।”

୨୦ ମାହାପୁରୁ ଇଲୁତି ଦାନା ଇଚିନି ବାକ୍ରାତା ଜୀସୁ ଏ ବାରେ କାତା ଜାପୁହିମାରେସି, ସାମା ଆମ୍ବାଆରି ଜିକେଏ ଏଞ୍ଜାଣାଇଁ ଆହୁଆତେରି ଏନାଆଁତାକି ଇଚିହିଁ ତାନି ବେଲା ଖାହା ହିଲାଆତେ ।

* ୮:୧୧ ୮:୧୧ ଇ ବାରେ କାତା ବାରେ ପଡ଼ିଣାଁ ହିଲେଏ ✠ ୮:୧୨ ୮:୧୨ ମାତି ୫:୧୪; ଜହ ୯:୫ ✠ ୮:୧୩ ୮:୧୩ ଜହ ୫:୩୧

ନାନୁ ହାନି ତାଣା ମୀରୁ ହାଜାଲି ଆଡ଼ଅଡ଼େରି

୨୧ ଜୀସୁ ଅଡ଼େ ଝେଣ୍ଡେ ଏଝାରାଇଁ ଏଲେଇଚେସି, “ନାନୁ ହାଜିମାଇଁ, ମୀରୁ ନାଙ୍ଗେ ପାରାଦେରି, ଅଡ଼େ ମୀରୁ ମୀ ପାପୁତା ହାଡ଼େରି । ନାନୁ ଏମ୍ବିୟା ହାଜିମାଇଁ, ଏମ୍ବାଆଁ ମୀରୁ ହାଜାଲି ଆଡ଼ଅଡ଼େରି ।”

୨୨ ଇଞ୍ଜା ଜୀହୁଦିୟାଁ ଏଲେଇଚେରି, “ଇଝାସି ଏନାଆଁ ହାହାଲି ଏଲେଇଞ୍ଜି ମାନେସି, ନାନୁ ଏମ୍ବିୟା ହାଇଁ ମୀରୁ ଏମ୍ବାଆଁ ହାଜାଲି ଆଡ଼ଅଡ଼େରି ?”

୨୩ ଜୀସୁ ଏଝାରାଇଁ ଏଲେଇଚେସି, “ମୀରୁ ଇ ଡ଼ଇପୁରୁଟି ଜାନୀ ଆହାମାଞ୍ଜେରି, ସାମା ନାନୁ ଲାକଟି ଝାହାମାଇଁ । ମୀରୁ ଇ ଦାର୍ଡ଼ିଟି, ନାନୁ ଇ ଦାର୍ଡ଼ିଟି ଆଏ । ୨୪ ଏଦାଆଁତାକି ନାନୁ ଝେସିମାଞ୍ଜାଇଁ, ମୀରୁ ମୀ ପାପୁ ତଲେ ହାଡ଼େରି । ନାନୁ ଏଝାଡ଼େଏଁ ଇଞ୍ଜିଁ ଝେସ୍ତାସାରେ ମୀରୁ ନାମାଆସାରେ, ମୀ ପାପୁତା ହାଡ଼େରି ।”

୨୫ ଏମ୍ବାଟିଏ ଏଝାରି ଏଝାଣାଇଁ ଝେଚେରି, “ନାନୁ ଆମ୍ବାଆତି ?”

ଜୀସୁ ଏଝାରାଇଁ ଏଲେଇଚେସି, “ଇ ହାଡ଼ା ନାନୁ ମୂଲୁଟିଏ ଝେସାମାଞ୍ଜାଇଁ । ୨୬ ମିଙ୍ଗେତାକି କାତା ଜଲ୍ଲାଲି ଅଡ଼େ ବିଚାରା କିହାଲି ନା ତାଣା ହାଡ଼େକା କାତା ମାନେ; ସାମା ନାଙ୍ଗେ ପାଣ୍ଡାମାଞ୍ଜାନାସି, ଏଝାସି ସାତା, ଅଡ଼େ ନାନୁ ଏନାଆଁ ଝେଞ୍ଜାମାଇଁ; ଏ ବାରେ ଦାର୍ଡ଼ିଟି ଝେସିମାଇଁ ।”

୨୭ ଏଝାସି ମାହାପୁରୁ ଆବା କାତା ଝେସିମାଚେସି, ଏଝାରି ତେଲ୍‌ହାଲି ଆଡ଼ାଆଡ଼େରି । ୨୮ ଏଦାଆଁତାକି ଜୀସୁ ଏଲେଇଚେସି; “ଏଡ଼େତା ମୀରୁ ମାଣ୍ଡସି ମୀରୁଏଣାଇଁ ଗାଝୁରମି ହାଡ଼େରି, ଏଡ଼େତା ନାନୁ ଏ ମାଣ୍ଡସିଡ଼େଏଁ ଅଡ଼େ ନାନୁ ଜାହାରାଝାଣି ଏନାଆଁ କିଆନା, ଆବା ନାଙ୍ଗେ ଏନିକିଁ ଜାପୁହା ମାଞ୍ଜାନେସି, ଏଲେକିଁ ଇ ବାରେ କାତା ଝେସିମାଞ୍ଜାଇଁ ଇଦାଆଁ ମୀରୁ ପୁଞ୍ଜାଲି ଆଡ଼ିଦେରି । ୨୯ ଆମ୍ବାଆସି ନାଙ୍ଗେ ପାଣ୍ଡାମାଞ୍ଜାନାସି ଏଝାସି ନା ତଲେ ମାନେସି, ଏଝାସି ନାଙ୍ଗେ ରଅଡ଼େଏଁ କିହିଁ ପିସାମାଞ୍ଜଅସି, ଇଚିହିଁ ନାନୁ ତାନି ରାହାଁ ଆନି କାମା କିହିଁ ।”

୩୦ ଜୀସୁ ଇ ବାରେ ହାଡ଼ା ଝେଞ୍ଜାନା ହାଡ଼େକା ଜାଣା ତାନି ତାଣା ନାମିଡ଼େରି ।

ପିସ୍‌ପିଆଡ଼ି ଲକୁ ଅଡ଼େ କଡ଼ିଡ଼ି ହଲିୟାଙ୍ଗା

୩୧ ଏମୁଗିଏ ଜୀସୁ ତାନି ତାଣା ନାମିତି ଜୀହୁଦିଙ୍ଗାଣି ଏଲେଇଚେସି, “ନା ବଲୁତା ତାରିଆହ୍ଲା ଡୟିଦେରି, ଆତିହିଁ ମୀରୁ ସାତେଏ ନା ସୀସୁୟାତେରି । ୩୨ ମୀରୁ ସାତାତି ପୁଞ୍ଜେରି ଅଡେ ଏ ସାତା ମିଙ୍ଗେ ଗେଲ୍‌ପାନେ ।”

୩୩ ☆ଏଝାରି ଏଝାଣାଇଁ ଏଲେଇଚେରି, “ମାମ୍ବୁ ଅବ୍ରାହାମତି କୃତାତମି, ଅଡେ ଏଚେଲା ଆମ୍ବାଆରି ହଲିୟା ଆହାହିଲଅମି, ଆତିହିଁ ମୀରୁ ମୁକଲଝି ଆଦେରି ଇଞ୍ଜିଁ ଏନିକିଁ ଝେସିମାଞ୍ଜାଦି ?”

୩୪ ଜୀସୁ ଏଝାଣାଇଁ ଏଲେଇଚେସି, “ନାନୁ ମିଙ୍ଗେ ସାତା ଝେସିମାଞ୍ଜାଇଁ, ଆମିନିଗାଟାସି ପାପୁ କିନେସି, ଏଝାସି ପାପୁତି ହଲେଏସି । ୩୫ ହଲେଏସି କାଲେଏ ତାକି ଇଲୁ କୁଟମିତା ଡୟିଅସି, ମୀରୁଏସି ଇଲୁ କୁଟମିତା କାଲେଏ ତାକି ଡୟିନେସି । ୩୬ ମୀରୁଏସି ମିଙ୍ଗେ ମୁକଲଝି କିୟାନେସି, ମୀରୁ ସାତେଏ ମୁକଲଝି ଆଦେରି । ୩୭ ମୀରୁ ଅବ୍ରାହାମତି କୃତାତାତେରି ନାନୁ ପୁଞ୍ଜାମାଇଁ; ସାମା ନା ବଲୁ ମୀ ହିୟାତି ଚାନ୍ଦୁତା ହିଲାଆକି ମୀରୁ ନାଙ୍ଗେ ପାୟାଲି ଅଣ୍ଡିମାଞ୍ଜେରି । ୩୮ ନା ଆବା ତାଣା ନାନୁ ଏନାଆଁ ମେସାମାଇଁ, ଏ ବାରେ ନାନୁ ଝେସିମାଞ୍ଜାଇଁ । ଏନାଆଁତାକି ମୀରୁ ଜିକେଏ ମୀ ଆବା ତାଣାଟି ଏନାଆଁ ଝେଞ୍ଜାମାଞ୍ଜେରି ଏ ବାରେ କିଦୁ ।”

୩୯ ଏଝାରି ଏଝାଣାଇଁ ଏଲେଇଚେରି, “ଅବ୍ରାହାମ ମା ଆବା ।” ଜୀସୁ ଏଝାଣାଇଁ ଏଲେଇଚେସି, “ମୀରୁ ଅବ୍ରାହାମତି ମୀରକା ମାସକାତେରି, ଆତିହିଁ ଅବ୍ରାହାମ କିହାମାତି କାମା କିଦୁ; ୪୦ ମାହାପୁରୁ ତାଣାଟି ଝେଞ୍ଜାମାନି ସାତାତି ମିଙ୍ଗେ ଝେସିମାଞ୍ଜାଇଁ, ନାନୁ ଇଲେତି ଲକୁ, ମୀରୁ ନାଙ୍ଗେ ପାୟାଲି ତାକି ଅଣ୍ଡିମାଞ୍ଜାଦେରି; ଅବ୍ରାହାମ ଇଲେତି କାମା କିଆତେସି । ୪୧ ମୀରୁ ମୀ ଆବାତି ବାରେ କାମା କିହିମାଞ୍ଜେରି ।”

ଏଝାରି ଜୀସୁଇଁ ଏଲେଇଚେରି, “ମାମ୍ବୁ ଦାରିକାମାଟି ଜାର୍ନା ଆହାହିଲଅମି; ମା ରଣ୍ଡିଏ ଆବା, ଏଝାସି ମାହାପୁରୁ ।”

୪୨ ଜୀସୁ ଏଝାଣାଇଁ ଏଲେଇଚେସି, “ମାହାପୁରୁ ସାତେଏ ମୀ ଆବା ଆତିହିଁ ମା, ମୀରୁ ନାଙ୍ଗେ ଜୀସୁ ନୟାତେରିମା, ଇତିହିଁ ନାନୁ ମାହାପୁରୁ ତାଣାଟି ଝାହାମାଇଁ; ନାନୁ ନା ତାଣାଟି ଝାହାହିଲଅଁ, ସାମା

ଏଝାସି ନାଙ୍ଗେ ପାଣ୍ଡାତେସି । ୪୩ ନାନୁ ଏନାଆଁ ଝେସିମାଞ୍ଜାଲ୍, ମୀରୁ ଏନାଆଁତାକି ନା ହାଡ଼ାତି ତେଲ୍‌ହାଲି ଆଡ଼ିହିଲଅତେରି ? ଇଦାନି କାତା ଆହିମାନେ ମୀରୁ ନା ବଲୁଡି ଝେଞ୍ଜାଲି ଆଡ଼ିହିଲଅତେରି । ୪୪ ମୀରୁ ମୀ ଆବା ସୟତାନତି ମୀରକା ମାସ୍କାତେରି, ଅଡ଼େ ମୀରୁ ମୀ ଆବାତି କାମା କିହାଲି ମୀ ଅଣ୍‌ପୁ । ଏଝାସି ମୂଲୁଟିଏ ଲକୁଣି ପାୟିନାସି, ଅଡ଼େ ଏଝାସି ସାତାତା ଡ଼ୟଅସି, ଇତିହିଁ ଏଝାଣି ତାଣା ସାତା ହିଲେଏ । ଏତିବେଲା ଏଝାସି ମିତି ଜଲିନେସି, ଏତେତା ତାନିତାଣାଟି ଜଲିନେସି; ଇତିହିଁ ଏଝାସି ମିତି ଗାଟାସି ଇଞ୍ଜା ମିତିତି ତାଞ୍ଜି । ୪୫ ସାମା ନାନୁ ସାତା ଜଲିମାନାକି, ମୀରୁ ନାଙ୍ଗେ ନାମିମାଞ୍ଜଅତେରି । ୪୬ ନାନୁ ପାପୁ ଗାଟାତେଏଁ ଇଞ୍ଜା ମୀ ବିତ୍ରାଟି ଆମ୍ବାଆତେରି ପାରମାଣା କିହାଲି ଆଡ଼ିଦେରି ? ନାନୁ ସାତା ଝେସ୍ତାସାରେ, ନାଙ୍ଗେ ମୀରୁ ଏନାଆଁତାକି ନାମିମାଞ୍ଜଅତେରି ? ୪୭ ଆମ୍ବାଆସି ମାହାପୁରୁ ତାଣାଟି ଝାହାମାନେସି, ଏଝାସି ମାହାପୁରୁଡି ବଲୁ ଝେନେସି; ମୀରୁ ମାହାପୁରୁ ତାଣାଟି ଝାହାହିଲଅତେରି, ଏନାଆଁତାକି ଇ ବଲୁ ଝେଞ୍ଜିହିଲଅତେରି ।”

ଜୀସୁ ଅଡ଼େ ଅବ୍ରାହାମ

୪୮ ଜୀହୁଦିୟାଁ ଜୀସୁଇଁ ଏଲେଇଚେରି, “ନୀନୁ ସମିରଣତି ଇଞ୍ଜା ନିଙ୍ଗେ ବୃତୁ ଆଲ୍‌ଗାମାଞ୍ଜାନେ, ଏନାଆଁ ମାମ୍ବୁ ସାତା ଝେସି ହିଲଅମି କି ?”

୪୯ ଜୀସୁ ଏଝାରାଇଁ ଏଲେଇଚେସି; “ନାଙ୍ଗେ ବୃତୁ ଆଲ୍‌ଗା ମାଞ୍ଜେଏ, ନାନୁ ନା ଆବାଇଁ ମାନି କିହିମାଇଁ, ସାମା ମୀରୁ ନାଙ୍ଗେ ଲାଜା କିହିମାଞ୍ଜାଦେରି । ୫୦ ନାନୁ ନା ଗାଝୁରମି କିହାଲି ଅଣ୍‌ପି ହିଲଅଁ; ରଅସି ଅଣ୍‌ପିମାନେସି ଏଝାସି ନା ଝାକିଟି ବିଚାରା କିନେସି । ୫୧ ନାନୁ ସାତା ଝେସିମାଞ୍ଜାଲ୍, ଆମ୍ବାଆସି ନା ବଲୁଡି ମାନଝି ଆନେସି, ଏଝାସି ଏଚେଲା ହାଅସି ।”

୫୨ ଜୀହୁଦିୟାଁ ଏଝାଣାଇଁ ଏଲେଇଚେରି, “ନୀଏଁ ମାମ୍ବୁ ପୁଚମି, ନିଙ୍ଗେ ବୃତୁ ଆଲ୍‌ଗାମାଞ୍ଜାନେ, ଅବ୍ରାହାମ ଅଡ଼େ ମାହାପୁରୁ ଅଣ୍‌ପୁଡି ବଲୁ ଝେହନାରି ବାରେଜାଣା ହାଡ଼େରି, ଅଡ଼େ ନୀନୁ ଝେସିମାଞ୍ଜି, ଆମ୍ବାଆସି ନା ବଲୁ ମାନଝି ଆନେସି, ଏଝାସି ଏଚେଲା ଜିକେଏ ହାଅସି । ୫୩ ମା ଆକୁ ଅବ୍ରାହାମ ହାଡ଼େସି, ନୀନୁ ଏନାଆଁ ଅବ୍ରାହାମ କିହାଁ

କାଜାତି ଇଞ୍ଜି ଅଣ୍ଠିମାଞ୍ଜି ? ମାହାପୁରୁ ଅଣ୍ଠପୁତି ବଲୁ ଖେହ୍ନାରି ଜିକେଏ ହାଡ଼ତରି; ନାନୁ ଆମ୍ବାଆତି ଇଞ୍ଜି ଖେସିମାଞ୍ଜି ?”

୫୪ ଜୀସୁ ଏଲେଇଚେସି, “ନାନୁ ନା ଗାଝୁରମି କିହିମାଞ୍ଜି, ଆତିହି ନା ଗାଝୁରମି ଏନାୟି ଆଏ; ଆମ୍ବାଆସି ନାଞେ ଗାଝୁରମି କିୟାନେସି ଏଝାସି ନା ଆବା ଆମ୍ବାଆରାଞ୍ଜି ମୀରୁ ମୀ ମାହାପୁରୁ ଇଞ୍ଜି ଏଲେ ଇଞ୍ଜିମାଞ୍ଜେରି; ୫୫ ମୀରୁ ଏଝାଣାଞ୍ଜି ଏଚେଲା ପୁଞ୍ଜାହିଲଅତେରି, ସାମା ନାନୁ ଏଝାଣାଞ୍ଜି ପୁଞ୍ଜାମାଞ୍ଜି । ଏଝାଣାଞ୍ଜି ପୁଞ୍ଜାହିଲଅଁ ଇଞ୍ଜି ନାନୁ ଖେସ୍ତିହି, ମୀ ଲେହେଁ ନାନୁ ଜିକେଏ ମିଚି ଗାଟାତେଏଁ ଆଞ୍ଜି, ସାମା ନାନୁ ଏଝାଣାଞ୍ଜି ପୁଞ୍ଜାମାଞ୍ଜି ଅଡ଼େ ତାନି ବଲୁତି ମାନଡ଼ି ଆଞ୍ଜି । ୫୬ ମୀ ଆବା ଅରାହାମ ନା ଦିନା ମେସାଲି ତାକି ଆସା କିହାନା ରାହାଁ କିତେସି, ଅଡ଼େ ଏଦାଆଁ ମେସାନା ଏଝାସି ରାହାଁ ଆଡ଼େସି ।”

୫୭ ଜୀହୁଦିୟାଁ ଏଝାଣାଞ୍ଜି ଏଲେଇଚେରି, “ନିଞେ ରୀ କଡ଼ି ଦସ ବାର୍ସା ଆହାମାଞ୍ଜେଏ, ନାନୁ ଏନାଆଁ ଅରାହାମାଞ୍ଜି ମେସାମାଞ୍ଜି ?”

୫୮ ଜୀସୁ ଏଝାରାଞ୍ଜି ଏଲେଇଚେସି, “ନାନୁ ମିଞେ ସାତା ଖେସିମାଞ୍ଜାଞ୍ଜି, ଅରାହାମତି ଜାର୍ନା ନକେଏ ନାନୁ ମାଞ୍ଜି ।”

୫୯ ଏଝାରି ଏଝାଣାଞ୍ଜି ଖେଚାଲିତାକି ଝାଲକା ପେରହା କଡ଼ିତେରି, ସାମା ଜୀସୁ ମାହାପୁରୁ ଇଲୁଚି ମେହ୍ଆରେରୁ ହଚାହାଚେସି ।

୯

ଜୀସୁ ଜାର୍ନାଟିଏ କାଣାଞ୍ଜି ନେହିଁ କିନାୟି

୯ ଜୀସୁ ହାଜିମାଚାଚି ର ଜାର୍ନାଟିଏ କାଣାଞ୍ଜି ବେଟାଆଡ଼େସି । ୨ ତାନି ସୀସୁୟାଁ ଖେଚେରି, “ଗୁରୁ, ଆମ୍ବାଆସି ପାପୁ କିହାଲିଏ ଇଝାସି କାଣା ଆହାନା ଜାର୍ନା ଆଡ଼େସି, ତାନୁ କି ତାନି ଇୟା ଆବା ପାପୁ କିତାକି ?”

୩ ଜୀସୁ ଏଲେଇଚେସି, “ଇଝାସି କି ତାନି ଇୟା ଆବା ପାପୁ କିତାକି ଆଏ, ସାମା ମାହାପୁରୁତି କାମା ଏନିକିଁ ଇଝାଣି ତାଣାଟି ତପ୍ପିଆନେ, ଏଦାଆଁତାକି ଇଦି ଆହାମାନେ । ୪ ଦିନା ମାଞ୍ଜା ମାଞ୍ଜାନା, ନାଞେ ପାଣ୍ଡାମାଞ୍ଜାନାଣି କାମା କିନାୟିମାନେ; ଏମିନି ବେଲାତା ଆମ୍ବାଆସି କାମା କିହାଲି ଆଡ଼ଅସି, ଇଲେତି ଲାଆଁ ଝାହିମାନେ

। ୫ ନାନୁ ଏତେପାତେକା ଦାର୍ତ୍ତିତା ମାଲ୍, ଏତେପାତେକା ନାନୁ ଦାର୍ତ୍ତିତି ଉଜେଡ଼ିତେଏଁ ।”

୬ ଈ କାତା ଏଲେଇଞ୍ଜାନା, ଜୀସୁ ଇରୁଆତା ହୁପାନା ହୁପକା ତଲେ କାଦ କିତେସି; ଅଡ଼େ ତାନି ରୀ କାଣ୍‌କାଣ୍ ରୁବିତେସି ଅଡ଼େ ଏଞ୍ଜାଣାଲ୍ ଏଲେଇଚେସି, ୭ ହାଲାନୁ “ସିଲହ* ବାନ୍ଦାତା ମୁମ୍ ନୁରହା ଖାମୁ ।” ଏମ୍ବାଟିଏ ଏଞ୍ଜାସି ହାଜାନା ନରହା କତାନା ଖେଣ୍ଟା ଖାହିମାଚାଟି ମେସାଲି ଆଡ଼ିତେସି ।

୮ ତାନି ପାଡ଼ିତାରି, ଅଡ଼େ ଏମିନିଗାଟାରି ଏଞ୍ଜାଣାଲ୍ ନଚେଏ ରାସ୍‌ପି ମାଚାଣି ମେସାମାଚେରି, ଏଞ୍ଜାରି ଖେଚେରି, “ଇଞ୍ଜାସି ଏନାଆଁ କୁଗାନା ରାସ୍‌ପି ମାଚେସି ଏଞ୍ଜାସି ଆଏକି ?”

୯ ଏଚରଜାଣା ଏଲେଇଚେରି, “ଇଞ୍ଜାସିଏ ଏଞ୍ଜାସି;” ଅଡ଼େ ଏଚରଜାଣା ଏଲେଇଚେରି, “ଆଏ, ଏଞ୍ଜାଣିଲେହେଁ ତାସି ।” ଏଞ୍ଜାସି ଏଲେଇଚେସି, “ନାନୁଏ ଏଞ୍ଜାତେଏଁ ।”

୧୦ ଲକୁ ଏଞ୍ଜାଣାଲ୍ ଖେଚେରି, “ଆଡିହୁ, ନାନୁ ନୀଏଁ ଏନିକିଁ ମେସାଲି ଆଡ଼ିମାଞ୍ଜି ?”

୧୧ ଏଞ୍ଜାସି ଏଲେଇଚେସି, “ଆମ୍ବାଆରାଲ୍ ଜୀସୁ ଇନେରି, ଏଞ୍ଜାସି ଇରୁଆତି କାଦ କିହାନା ନା କାଣ୍‌କାଣ୍ ରୁବାତେସି ଅଡ଼େ ସିଲହତା ହାଜାହାଁ ମୁମ୍ ନୁରହା କତାମୁ ଏଲେଇଞ୍ଜାତେସି; ଏଚେଟିଏ ନାନୁ ହାଜାନା ମୁମ୍ ନୁରହାଲିଏ ମେସାଲି ଆଡ଼ିତେଏଁ ।”

୧୨ “ଏଞ୍ଜାସି ଆମ୍ବିୟା ?” ଇଞ୍ଜିଁ ଏଞ୍ଜାଣାଲ୍ ଖେଚେରି, ଏଞ୍ଜାସି ଏଲେଇଚେସି, “ନାନୁ, ପୁଞ୍ଜାହିଲଅଁ ।”

ପାରୁସିୟାଁ ଈ କାମାତି ତାୟିପାରି କିନାୟି

୧୩ ଆମ୍ବାଆସି ନଚେଏ କାଣା ମାଚେସି, ଏଞ୍ଜାଣାଲ୍ ପାରୁସିୟାଁ ତାଣା ତାଚେରି । ୧୪ ଜୀସୁ ଏମିନି ଦିନା କାଦ କିହାନା ତାନି କାଣକା ନେହୁଁ କିହାମାଚେସି, ଏ ଦିନା ଜମିନି ଦିନା ମାଚେ । ୧୫ ପାରୁସିୟାଁ ଏଞ୍ଜାଣାଲ୍ ଖେଚେରି, ଏନିକିଁ ଏଞ୍ଜାସି ମେସାଲି ଆଡ଼ିତେସି ? ଏଞ୍ଜାସି ଏଲେଇଚେସି, “ନା କାଣ୍‌କାଣ୍ ଏଞ୍ଜାସି ଇଚାଣି କାଦ ରୁବାତେସି, ନାନୁ ହାଜାନା ମୁମ୍ ନୁରହାନା ଖାତେଏଁ ଅଡ଼େ ମେସାଲି ଆଡ଼ିମାଲ୍ ।”

☆ ୯:୫ ୯:୫ ମାତି ୫:୧୪; ଜହ ୮:୧୨

* ୯:୭ ୯:୭ ସିଲହ ଇଚିସାରେ ପାଣ୍ଡୁଞ୍ଜି

ଆହାମାନାୟି

୧୭ ପାରୁସିୟା ତାମି ବିଦ୍ରାଠି ଏଚରଜାଣା ଏଲେଇଚେରି, “ଏଝାସି ମାହାପୁରୁ ତାଣାଟି ଝାହାହିଲଅସି, ଇଚିହିଁ ଏଝାସି ଜମିନି ଦିନାତି ମାନୁଝି ଆହିହିଲଅସି ।” ଅଡ଼େ ଏଚରଜାଣା ଏଲେଇଚେରି, “ପାପୁ ଲକୁ ଆହାନା ଇଲେତି କାବାଆନି କାମା ଏନିକିଁ କିହାଲି ଆଡ଼ିନେସି ?” ଇଲେଆହିଁ ଏଝାରି ତାମି ବିଦ୍ରା ବାଟା ଆଡ଼େ ?

୧୭ ପାରୁସିୟା ଅଡ଼େ ଝେଣ୍ଡେ ଏ କାଣାଇଁ ଝେଚେରି, “ଏଝାସି ନୀ କାଣକା ନେହିଁ କିୟାତେସି, ଏଝାଣି କାତା ନୀନୁ ଏନାଆଁ ଇଞ୍ଜିମାଞ୍ଜି ?” ଏଝାସି ଏଲେଇଚେସି “ଏଝାସି ର ମାହାପୁରୁ ଅଣ୍ଡପୁତି ବଲୁ ଝେହନାସି ।”

୧୮ ଏଝାସି ଜାର୍ନାଟିଏ କାଣା ମାଚେସି ଅଡ଼େ ନୀଏଁ, ଇ ହାଡ଼ା ତାମି ଇୟା ଆବାତି ଝେନାଆ ପାଚେକା, ଜୀହୁଦିୟା ନାମାଆଚେରି । ୧୯ ଏଝାରି ତାମି ଇୟା ଆବାତି ଝେଚେରି, “ମୀ ଆମିନି ମୀରଏସି କାଣା ଆହାନା ଜାର୍ନା ଆହାମାଚେସି ଇଞ୍ଜିଁ ଏଲେଇଶ୍ଚିତେରି ଇଝାସି ଏନାଆଁ ଏ ମୀ ମୀରଏସି ? ଆତିହିଁ ଏଝାସି ନୀଏଁ ଏନିକିଁ ମେସାଲି ଆଡ଼ିମାନେସି ?”

୨୦ ଏମ୍ବାଟିଏ ତାମି ଇୟା ଆବା ଏଲେଇରୁ, “ହାଅ, ଏଝାସି ମା ମୀରଏସି, ଏଝାସି କାଣା ଆହାନା ଜାର୍ନା ଆହାମାଚେସି ଏଦାଆଁ ମାମ୍ବୁ ପୁଞ୍ଜାମାନମି; ୨୧ ସାମା ଏଝାସି ନୀଏଁ ଏନିକିଁ ମେସାଲି ଆଡ଼ିମାନେସି, ଏଦାଆଁ ମାମ୍ବୁ ପୁଞ୍ଜାହିଲଅମି, ଅଡ଼େ ଆମ୍ବାଆସି ଏଝାଣାଇଁ ମେସ୍ପି କିହାମାନେସି, ମାମ୍ବୁ ଏଦାଆଁ ଜିକେଏ ପୁଞ୍ଜାହିଲଅମି; ଏଝାଣାଇଁ ଝେଞ୍ଜୁ, ଏଝାସି କାଜାସି ଆଡ଼େସିଏ, ଏଝାସି ତାମି କାତା ତାନୁଏ ଝେସାଲି ଆଡ଼ିନେସି ।” ୨୨ ଏଝାଣି ତାମି ଇୟା ଆବା ଜୀହୁଦି ଲକୁତି କାଜାରାଇଁ ଆଜିମାଚାକି ଇ ବାରେ କାତା ଝେସ୍ପୁ ଏନାଆଁତାକି ଇଚିହିଁ ଆମ୍ବାଆସି ଜୀମୁଇଁ କ୍ରୀସ୍ତ ଇଞ୍ଜିଁ ଇନେସି, ଏଝାଣାଇଁ ଜୀହୁଦି ଲକୁତି କୁଚମି ଇଲୁଟିଠି ପେର୍ଝି ଆନେ ଇଞ୍ଜିଁ ଜୀହୁଦି ଲକୁ ଏ ନଡ଼କେଏ କାତା ଆହାମାଚେରି । ୨୩ ଏଦାଆଁତାକି ତାମି ଇୟା ଆବା ଏଲେଇରୁ, “ଏଝାସି କାଜାସି ଆଡ଼େସିଏ, ଏଝାଣାଇଁ ଝେଞ୍ଜୁ ।”

୨୪ ପାରୁସିୟା ଏ ଜାର୍ନାଟିଏ କାଣାଇଁ ଅଡ଼େ ଝେଣ୍ଡେ ହାଟାନା ଏଲେଇଚେରି, “ମାହାପୁରୁଇଁ ଗାଝୁରମି କିହାନା ଏଲେଇନାମ୍ବୁ,

† ୯:୨୨ ୯:୨୨ ସିନଗର୍

ଆତ୍ମାଆସି ନିଜେ ନେହୁଁ କିହାମାଜାନେସି, ଏଝାସି ର ପାପୁ ଗାଟାସି
ଇ କାତା ମାମ୍ ପୁଞ୍ଜାମାନମି ।”

୨୫ ଏଝାସି ଏଲେଇଚେସି, “ଏଝାସି ପାପୁ ଗାଟାସି କି ଆଏ, ନାନୁ
ପୁଞ୍ଜାହିଲଅଁ; ନାନୁ ର କାତା ପୁଞ୍ଜାମାଇଁ; ନାନୁ କାଣା ମାଚେଏଁ, ନୀଏଁ
ମେସାଲି ଆଡ଼ିମାଇଁ ।”

୨୬ ଏଝାରି ଏଝାଣାଇଁ ଏଲେଇଚେରି, “ଏଝାସି ନିଜେ ଏନାଆଁ
କିୟାଚେସି ? ଏନିକିଁ ଏଝାସି ନୀ କାଣକା ଦେପି କିୟାଚେସି ?”

୨୭ ଏଝାସି ଏଲେଇଚେସି, “ନଚେଏ ଝେସା ରାହାମାଜାଇଁ,
ଅଡ଼େ ମୀରୁ ଝେନାଆଚେରି; ଅଡ଼େ ଝେଣ୍ଡେ ଏନାଆଁତାକି ଝେଞ୍ଜାଲି
ଅଣ୍ଡିମାଞ୍ଜେରି ? ମୀରୁ ଜିକେଏ ଏନାଆଁ ତାନି ସୀସୁ ଆହାଲି
ଅଣ୍ଡିମାଞ୍ଜେରି ।”

୨୮ ଏଝାରି ଏଝାଣାଇଁ ଲାଗାନା ଏଲେଇଚେରି, “ନାନୁ ତାନି ସୀସୁତି,
ସାମା ମାମ୍ ମୁସାତି ସୀସୁୟାତମି । ୨୯ ମାମ୍ ପୁଞ୍ଜାମାନମି, ମାହାପୁରୁ
ମସାଇଁ କାତା ଆହାମାଚେସି, ସାମା ଇ ମାଣ୍ଡି ଆମ୍ବିଟି ଝାହାମାନେସି,
ଏଦାଆଁ ମାମ୍ ପୁଞ୍ଜାହିଲଅମି ।”

୩୦ ଏଝାସି ଏଝାରାଇଁ ଏଲେଇଚେସି, “ଇଦି ରଣ୍ଡି କାବାଆନି କାତା
ଏଝାସି ଏମ୍ବିଟି ଝାହାମାନେସି, ମୀରୁ ପୁଞ୍ଜାହିଲଅଚେରି, ସାମା ଏଝାସି
ନାଜେ କାଣକା ଦେପି କିୟାଚେସି । ୩୧ ମାମ୍ ପୁଞ୍ଜାମାନମି, ମାହାପୁରୁ
ପାପୁଗାଟି ଲକ୍ଷୁତି ହାଡ଼ା ଝେନଅସି, ଆନିନି ଗାଟାରି ମାହାପୁରୁଇଁ
ମାନି କିନେରି ଅଡ଼େ ତାନି ଅଣ୍ଡୁ ତଲେ କାମା କିନେରି, ଏଝାରି
ହାଡ଼ାତି ଏଝାସି ଝେନେସି । ୩୨ ତଲି କାଲୁଟିଏ ଆତ୍ମାଆସି ଜାର୍ନା
କାଣାଇଁ ମେସପିକିତି କାତା ଏଚେଲା ଝେଣ୍ଡି ଆହାହିଲାଆତେ ।
୩୩ ଇଝାସି ମାହାପୁରୁ ତାଣାଟି ଝାହା ହିଲାଆତେଁ, ଏନାଆଁ କିହାଲି
ଆଡ଼ାଆଚେସିମା ।”

୩୪ ଏଝାରି ଏଝାଣାଇଁ ଏଲେଇଚେରି, “ପାପୁ ତଲେ ନାନୁ ଜାର୍ନା
ଆହାନା ପାପୁ ତଲେ ପାଡ଼ାଆଡ଼ି, ନାନୁ ମାଜେ ଜାପୁହି ମାଞ୍ଜାଦି
?” ଏଦାଆଁତାକି ଏଝାରି ଏଝାଣାଇଁ ଜୀହୁଦି ଲକ୍ଷୁତି କୁଟମି ଇଲୁଟିଃ
ପେରହାତୁସ୍ତେରି ।

ସୁଦୁଗାଟି ମାଣ୍ଡକି ମେହୁଆ ଗାଟାୟି

୩୫ ଏଞ୍ଜାରି ଏଞ୍ଜାଣାଇଁ ପେରହା ମାନେରି, ଇଞ୍ଜା ଜୀସୁ ଇ କାତା ଝେଞ୍ଜାନା, ଏଞ୍ଜାଣାଇଁ ମେସାନା ଏଲେଇରେସି, “ନୀନୁ ଏନାଆଁ ମାଣ୍ଡସି ମୀରୁଏଣି ତାଣା ନାମିମାଞ୍ଜି ?”

୩୬ ଏଞ୍ଜାସି ଏଞ୍ଜାଣାଇଁ ଏଲେଇରେସି, “ପ୍ରୁ, ଝେସ୍ତାମୁ ଏଞ୍ଜାସି ଆମ୍ବାଆସି, ଆତିହିଁ ନୀନୁ ଏଞ୍ଜାଣାଇଁ ନାମିଇଁ ।”

୩୭ ଜୀସୁ ଏଞ୍ଜାଣାଇଁ ଏଲେଇରେସି, “ନୀନୁ ଏଞ୍ଜାଣାଇଁ ମେସାମାଞ୍ଜି, ନୀ ତଲେ ଆମ୍ବାଆସି ନୀଏଁ କାତା ଆହିମାନେସି, ଏଞ୍ଜାସିଏ ।”

୩୮ ଏମ୍ବାଟିଏ ଏଞ୍ଜାସି ଏଲେଇରେସି, “ନୀନୁ ନାମିମାଇଁ, ପ୍ରୁ !” ଇଞ୍ଜା ଜୀସୁ ନକିତା ମେଶ୍ଟାକୁତାନା ଜହରା କିତେସି ।

୩୯ ଜୀସୁ ଏଲେଇରେସି, “ମେହୁଆଗାଟି ଲକୁ ଏନିକିଁ ମେହୁନେରି ଇଞ୍ଜା ମେହୁନି ଲକୁ ଏନିକିଁ କାଣା ଆନେରି, ଇ ବିଚାରା କିହାଲି ନୀନୁ ଦାର୍ତିତା ଝାହାମାଇଁ ।”

୪୦ ଏମ୍ବାଆଁ ମାଟି ଏଚରଜାଣା ପାରୁସିୟାଁ ଇ କାତା ଝେଞ୍ଜାନା, ଏଞ୍ଜାଣାଇଁ ଏଲେଇରେସି, “ମାମ୍ବୁ ଜୁକେଏ ଏନାଆଁ କାଣାୟାଁତମି ?”

୪୧ ଜୀସୁ ଏଞ୍ଜାରାଇଁ ଏଲେଇରେସି, “କାଣାୟାଁ ଆହାମାଟିହିଁ ମୀରୁ ଦହ ହିଲଆଗାଟାତେରି ଆତେରିମା, ସାମା ମେସାଲି ଆଡ଼ିମାନମି ଇଞ୍ଜିମାନାକି ମୀରୁ ହାରେକା ପାପୁତା ମାଞ୍ଜେରି ।”

୧୦

ମେଶ୍ଟାୟାଁ ଅଡ଼େ ଗଡ଼ୁ

୧ ଜୀସୁ ଏଲେଇରେସି, “ନୀନୁ ମିଙ୍ଗେ ସାତା ଝେସିମାଞ୍ଜାଇଁ, ଆମ୍ବାଆସି ଦାରା ଝାକିଟି ମେଶ୍ଟାୟାଁ ମାନ୍ଦାତା ହଡ଼ଅସି, ସାମା ଅର୍ ଝାକିଟି ଡେଞ୍ଜାନା ହଡ଼ନେସି, ଏଞ୍ଜାସି ସରୁ ଇଞ୍ଜା ତଂଗେଏସି; ୨ ସାମା ଆମ୍ବାଆସି ଦାରା ଝାକିଟି ହଡ଼ନେସି, ଏଞ୍ଜାସି ମେଶ୍ଟା ଗଡ଼ୁ । ୩ ଦାରାତା କାଃଆନାସି ଏଞ୍ଜାଣାକି ଦାରା ଦେତା ହୀନେସି, ଅଡ଼େ, ଏଞ୍ଜାସି ତାନି ମେଶ୍ଟାୟାଁ ଦରୁ ଆସାନା ହାଟିନେସି, ଏଞ୍ଜା ତାନି ହାଟିନାଣି ଝେନୁ ଅଡ଼େ ଏଞ୍ଜାସି ଏ ମାନ୍ଦାତି ପାଙ୍ଗାତା ଜିରୁ ନକି କିହାନା ଅନେସି । ୪ ମେଶ୍ଟାୟାଁଣି ପାଙ୍ଗାତା ଅନାଟି ମେଶ୍ଟାୟାଁ ଗଡ଼ୁ ନକି ନକିତା ତାକିନେସି, ଅଡ଼େ ମେଶ୍ଟାୟାଁ ତାନି ଜେଚ ଜେଚ ତାକିନୁ, ଇତିହିଁ

ଏଞ୍ଜି ଏଞ୍ଜାଣି ଗିୟାଁ ତେଲହାଉ । ୫ ସାମା ଏଞ୍ଜି ପୁନାଆତି ଲକୁ ଜେତ ଏଚେଲା ଜିକେଏ ତାକାଉ, ସାମା ଏଞ୍ଜାଣି ଦାରି ଦାରିଟି ହଟାତୁହନୁ, ଇଚିହଁ ଏଞ୍ଜି ପୁନାଆତାରି ଗିୟାଁ ତେଲହିନୁ ।”

୬ ଜୀସୁ ଏଞ୍ଜାରାଇଁ ଇ ପୁଣ୍ଠିକିନି କାତା ଖେସାନା ଏଲେଇଚେସି, ସାମା ଏଞ୍ଜାସି ଏନା ଏନାଆଁ ଖେସିମାଚେସି, ଏ ବାରେ ଏନାୟି ଇଞ୍ଜି ଏଞ୍ଜାରି ପୁନାଆତେରି ।

ଜୀସୁ ନେହଁ ଫେଣ୍ଟାୟାଁ ଗଡୁ

୭ ଜୀସୁ ଅଡେ ଖେଣ୍ଟେ ଏଲେଇଚେସି, “ସାତା ସାତା ନାନୁ ମିଙ୍ଗେ ଖେସିମାଞ୍ଜାଇଁ, ନାନୁ ଫେଣ୍ଟାୟାଁ ଦୁଝେରିଚେସି । ୮ ଏଚରଜାଣା ନା ନକିତା ଖାହାମାନେରି, ଏଞ୍ଜାରି ବାରେ ସରକା ଅଡେ ତଂଗାଁୟାଁ, ସାମା ଫେଣ୍ଟାୟାଁ ଏଞ୍ଜାରି କାତା ଖେନାଆତୁ । ୯ ନାନୁ ଆହିମାଇଁ ଦାରା । ଆମ୍ବାଆସି ନା ତାଣାଟି ହଡ଼ନେସି, ଏଞ୍ଜାସି ଗେଲପି ଆନେସି ଇଞ୍ଜା ବିତ୍ତା ଖାହାନା ଅଡେ ପାଙ୍ଗାତା ହାଜାନା ହାରା ବେଟାଆନେସି । ୧୦ ସରୁ ଖାରଇ ସରୁ କିହାଲି, ପାୟାଲି ଅଡେ ନାସା କିହାଲି ଖାନେସି; ଏଞ୍ଜାରି ଏନିକଁ ଜୀଝୁ ବେଟାଆନେରି ଅଡେ ହାରେକା ବେଟାଆନେରି ଏଦାଆଁତାକି ନାନୁ ଖାହାମାଇଁ ।”

୧୧ “ନାନୁ ନେହଁ ଫେଣ୍ଟାୟାଁ ଗଡୁଚେସି; ନେହଁ ଫେଣ୍ଟାୟାଁ ଗଡୁ ଫେଣ୍ଟାୟାଁ ତାକି ତାନି ଜୀଝୁ ହାନେସି । ୧୨ ଆମ୍ବାଆସି ଫେଣ୍ଟାୟାଁ ଗଡୁ ଆଏ, ଗତି ଦାଂଗଣେସି, ଜାହାରା ଫେଣ୍ଟାୟାଁ ହିଲାଉ ଏଞ୍ଜାସି କ୍ଳାଠନି ଖାନାଣି ମେସାନା ଫେଣ୍ଟାୟାଁ ପିସା ହଣନେସି ଅଡେ କ୍ଳାଠନି ଖାହାନା ଏ ବାରେତି ସିନାସାତ୍ରା କିନେ, ୧୩ ଇଚିହଁ ଏଞ୍ଜାସି ଗତି ଦାଂଗଣେସି, ଇଞ୍ଜା ଫେଣ୍ଟାୟାଁକି ଅଣପୁ ହିଲେଏ, ୧୪ ନାନୁ ନେହଁ ଫେଣ୍ଟାୟାଁ ଗଡୁ ଆବା ଏନିକଁ ନାଙ୍ଗେ ପୁଞ୍ଜାମାଞ୍ଜାନେସି ଅଡେ ନାନୁ ଆବାଇଁ ପୁଞ୍ଜାମାଇଁ, ୧୫ ଏନିକଁ ଆବା ନାଙ୍ଗେ ପୁଞ୍ଜାମାଞ୍ଜାନେସି, ଅଡେ ନାନୁ ଆବାଇଁ ପୁଞ୍ଜାମାଇଁ, ଏଲେକିହଁ ଏ ନାନୁ ନା ଫେଣ୍ଟାୟାଁକି ପୁଇଁ, ଅଡେ ନା ଫେଣ୍ଟାୟାଁ ଜିକେଏ ନାଙ୍ଗେ ପୁଞ୍ଜାନୁ, ଅଡେ ଫେଣ୍ଟାୟାଁ ତାକି ନାନୁ ନା ଜୀଝୁ ହାଇଁ । ୧୬ ଏମିନି ଫେଣ୍ଟାୟାଁ ଇ ମାନ୍ଦାତାଇ ଆଏ, ନା ଇଲେତି ଫେଣ୍ଟାୟାଁ ମାନୁ, ଏଞ୍ଜାଆଁ ଜିକେଏ ନାଙ୍ଗେ ତାନାୟି ଆନେ, ଅଡେ

ଏଞ୍ଜି ନା ହାଡ଼ା ତେଲ୍‌ହିନ୍ଦୁ; ଏମ୍ବାଟିଏ ରଣ୍ଡିଏ ମାନ୍ଦା ଅଡ଼େ ରଣ୍ଡିଏ ଗଡ଼ୁ ଆନେସି ।”

୧୭ “ନାନୁ ନା ଜୀଝୁ ହୀନାକି ଆବା ନାଢ଼େ ଜୀଝୁ ନୟ୍‌ନେସି, ଅଡ଼େ ନାନୁ ନା ଜୀଝୁ ଝେଣ୍ଡେ ଅହାକତାଲି ନାନୁ ଏଦାଆଁ ହୀଇଁ । ୧୮ ନା ଜୀଝୁ ଏଟ୍‌କାତାରି ଆମ୍ବାଆରି ଅହାଲି ଆଡ଼ଅରି, ଏଦାଆଁ ନାନୁ ନା ଅଣ୍‌ପୁ ତଲେ ହୀଇଁ, ନା ଜୀଝୁ ହୀହାଲିତାକି ଅଡ଼େ ଏଦାଆଁ ଝେଣ୍ଡେ ଅହାକତାଲି ତାକି ନା ଅଦିକାରା ମାନେ । ଇଦାଆଁ କିହାଲି ଆବା ମାହାପୁରୁ ନାଢ଼େ ହୁକୁମି ହୀହାମାଞ୍ଜାନେସି ।”

୧୯ ଜୀସୁତି ଈ ବାରେ କାତାତାକି ଜୀହୁଦି ଲକୁତାଣା ଗଡ଼ହା ହଡ଼େ । ୨୦ ଏଞ୍ଜାରି ବିତ୍ରାଟି ଏତରଜାଣା ଏଲେଇଚେରି, “ଏଞ୍ଜାଣାଇଁ ବୁତୁ ଆଲଗାମାନେ, ଏଞ୍ଜାସି ବାୟା ଆହାମାନେସି, ଏନାଆଁତାକି ଏଞ୍ଜାଣି କାତା ଝେଞ୍ଜିମାଞ୍ଜେରି ?”

୨୧ ଏଟ୍‌କାତାରି ଏଲେଇଚେରି, “ଇ ବାରେ କାତା ବୁତୁ ଆଲଗାମାନାରି କାତା ଆଏ; ବୁତୁ ଏନାଆଁ କାଣାତି କାଣକା ମେସପି କିହାଲି ଆଡ଼ିନେ ।”

ଜୀସୁଇଁ ଅପାଆଗାଟାୟି

୨୨ ଏଚିବେଲା ଜିରୁସାଲମତା ମାହାପୁରୁ ଇଲୁତି ମାହାପୁରୁ ଦରୁଟି ହେରପିନି ପାର୍ଟୁ ଆଡ଼େ; ଏଦି ପେନିବେଲା ମାଚେ, ୨୩ ଜୀସୁ ମାହାପୁରୁ ଇଲୁତି ସଲମନ ପିଣ୍ଡାତା ରେଜିମାଚେସି । ୨୪ ଏମ୍ବାଟିଏ ଜୀହୁଦି ଲକୁ ସାରିଞ୍ଜାକି ମୁଗାନା ଝେଞ୍ଜାଲି ମାଟ୍‌ହେରି, “ଏତରଦିନା ପାତେକା ମା ମନତା ଆନାମାନା କିୟାଦି ? ନାନୁ ଜୀସୁତି ଇଚିହିଁ ମାଢ଼େ ନେହିଁକିଁ ଝେସ୍ତାମୁ ।”

୨୫ ଜୀସୁ ଏଞ୍ଜାରାଇଁ ଏଲେଇଚେସି, “ନାନୁ ମିଢ଼େ ଝେସାମାଞ୍ଜାଇଁ, ସାମା ମୀରୁ ନାମିହିଲଅଡ଼େରି; ନା ଆବା ଦରୁଟି ନାନୁ ଏମିନି ବାରେ କାମା କିହିମାଇଁ, ଏ ବାରେ ନା ଞ୍ଜାକିଟି ସାକି ହୀହିମାନେ; ୨୬ ଆଡ଼ିଜିକେଏ ମୀରୁ ନାମିହିଲଅଡ଼େରି, ଇଚିହିଁ ମୀରୁ ନା ମେଣ୍ଡାୟାତେରି ଆଏ । ୨୭ ନା ମେଣ୍ଡାୟାଁ ନା ହାଡ଼ା ଝେନ୍ଦୁ ଅଡ଼େ ନାନୁ ଏଞ୍ଜାଆଁ ପୁଇଁ, ଅଡ଼େ ଏଞ୍ଜି ନା ଜେଚ ଜେଚ ତାକିନ୍ଦୁ, ୨୮ ଅଡ଼େ ନାନୁ ଏଞ୍ଜାସିକାକି କାଲାକାଲାତି ଜୀଝୁ ହୀଇଁ, ଅଡ଼େ ଏଞ୍ଜି ଏତେଲା

ଜିକେଏ ନାସା ଆଡ଼, ଆମ୍ବାଆସି ନା କେୟୁଟି ଏଝାଆଁ ମୀଞ୍ଜା ଅୟଅସି । ୨୯ ନା ଆବା ନାଜେ ଏନାଆଁ ହୀହାମାଞ୍ଜାନେସି, ଏଡ଼ି ବାରେକିହାଁ ଦାରାଗାଗାୟି,* ଇଞ୍ଜା ଆବା ତାଣାଟି ଆମ୍ବାଆସି ମୀଞ୍ଜାଲି ଆଡ଼ଅସି । ୩୦ ଆବା ଅଡ଼େ ନାନୁ ରଅତମିଏ ।”

୩୧ ଜୀହୁଦି ଲକୁ ଏଝାଣାଇଁ ଝେଚାଲି ଅଡ଼େ ଝେଣ୍ଡେ ଝାଲୁକା ତାତିହୁଁ ଝାଡ଼େରି । ୩୨ ଜୀସୁ ଏଝାରାଇଁ ଏଲେଇଚେସି, “ନାନୁ ଆବା ତାଣାଟି ହାରେକା ନେହୁଁ କାମାୟାଁ ମିଜେ ତସାମାଞ୍ଜାଇଁ; ଏ ବାରେ କାମାୟାଁ ବିତ୍ରାଟି ଏମିନି କାମାତାକି ନାଜେ ଝାଲୁକା ଝେଟି ମାଞ୍ଜାଦେରି ?”

୩୩ ଜୀହୁଦିୟାଁ ଏଝାଣାଇଁ ଏଲେଇଚେରି, “ନେହୁଁ କାମାତାକି ନିଜେ ଝାଲୁକା ଝେଟିମାଞ୍ଜାଅମି, ସାମା ମାହାପୁରୁ ନିନ୍ଦା କିହିମାନାକି, ନୀନୁ ମାଣସି ଆହାନା ମାହାପୁରୁତେଏଁ ଇଞ୍ଜିମାନାକି ।”

୩୪ ଜୀସୁ ଏଝାରାଇଁ ଏଲେଇଚେସି, “ମୀ ମସା ମେରାତା ରାସ୍ତକି ଆହାହିଲେଏ, ନାନୁ ଏଲେଇଞ୍ଜାତେଏଁ ‘ମୀରୁ ମାହାପୁରୁୟାଁତେରି ।’ ୩୫ ଆମ୍ବାଆରି ତାଣା ମାହାପୁରୁତି ବଲୁ ତଞ୍ଜାଆଡ଼େ, ଏଝାରି ମାହାପୁରୁୟାଁ ଇତିହୁଁ ଦାମ୍ବୁ ସାଡ଼େରି ଉଜେଏ କିହାଲି ଆଡ଼ଅସି, ୩୬ ଆବା ମାହାପୁରୁ ନାଜେ ସୁଦୁ କିହାନା ଦାରୁତିତା ପାଣ୍ଡାମାଞ୍ଜାନେସି । ଇଞ୍ଜା ନାନୁ ନାଜେ ମାହାପୁରୁ ମୀରୁଏଣାତେଏଁ ଇଞ୍ଜିମାନାକି ମାହାପୁରୁ ନିନ୍ଦା କିହିମାଞ୍ଜା ଇଞ୍ଜୁଁ ଏନିକିଁ ଏଲେଇଞ୍ଜି ମାଞ୍ଜାଦେରି ? ୩୭ ନାନୁ ନା ଆବାତି ବାରେ କାମା କିହା ହିଲାଆତିହୁଁ ନାଜେ ନାମାଆଦୁ; ୩୮ ସାମା ନାନୁ କିହିମାଇଁ, ଆତିହୁଁ ମୀରୁ ନାଜେ ନାମି ମାଞ୍ଜାଅତେରି, ଆଡ଼ିଜିକେଏ ଆବା ନା ତାଣା ମାନେସି ଅଡ଼େ ନାନୁ ଆବା ତାଣା ମାଇଁ, ଇଦାଆଁ ମୀରୁ ଏନିକିଁ ପୁଞ୍ଜେରି ଅଡ଼େ ତେଲୁହିଦେରି, ଇଦାଆଁତାକି ବାରେ କାମାତି ନାମାଦୁ ।”

୩୯ ଏମ୍ବାଟିଏ ଏଝାରି ଜୀସୁଇଁ ଆସାଲି ଅଣ୍ପିତେରି, ସାମା ଏଝାସି ଏଝାରି କେୟୁତା ହେରୁପି ଆଆନା ଏମ୍ବାଟି ହଚାହାଚେସି ।

* ୧୦:୨୯ ୧୦:୨୯ ଆବା ନାଜେ ଏନାଆଁ ହୀହାମାଞ୍ଜାନେସି, ଏଡ଼ି ବାରେକିହାଁ ଦାରାଗାଗାୟି, ଇଦାଣି ଅର୍ତ୍ତ ଆମିନି ଆବା ନାଜେ ଇ ଲକୁଇଁ ହୀହାମାଞ୍ଜାନେସି, ଏଝାସି ଏଝାରି କିହାଁ କାଜସି ।

୪୦ ✨ଏମ୍ବାଟି ଏଞ୍ଜେଲ୍ସ ଅଡ଼େ ଖେଣ୍ଡେ ଜର୍ଦନ ଆତାଲା ହାଜାନା, ତଲି ଜହନ ଏମିନି ଟାୟୁତା ବାପ୍ତିସ୍ମା ହାହିମାଚେସି, ଏ ଟାୟୁତା ଖାହାନା ଡ଼ୟିତେସି । ୪୧ ଅଡ଼େ ହାରେକା ଲକୁ ଏଞ୍ଜେଲ୍ସି ତାଣା ଖାହାନା ଏଲେଇଚେରି, “ଜହନ ଏନି କାବାଆନି କାମା କିଆତେସି, ସାମା ଇ ମାଣ୍ଡସି କାତା ଜହନ ଏନା ଏନାଆଁ ଖେସାମାଚେସି, ଏ ବାରେ ସାତା ।” ୪୨ ଏମ୍ବାଆଁ ହାରେକା ଲକୁ ଏଞ୍ଜେଲ୍ସି ତାଣା ନାମିଚେରି ।

୧୧

ଲାଜର ହାନାୟି

୧ ✨ବେତନିୟାତି ଲାଜର ଦରୁଗାଟାସି ରଅସି ନଚେରି ଆହାମାଚେସି; ତାନି ତାଙ୍ଗିସ୍ମା ମରିୟମ ଅଡ଼େ ମାର୍ତା ଏ ନାୟୁତା ଡ଼ୟିମାରୁ । ୨ ✨ଏମିନି ଇୟା ପ୍ରବୁଇଁ ନିୟୁଁ ଖାକ୍‌ହାନା ତାନି ତାୟୁଁ ବାଣାୟାଁ ତଲେ ଏଞ୍ଜେଲ୍ସି ପାଃଆନାୟାଁ ଜେଜା ମାଚେ, ଇଦି ଏ ମରିୟମ; ତାନି ତାୟି ଲାଜର ନଚେରି ଆହାମାଚେସି । ୩ ଏଦାଆଁତାକି ଏ ତାଙ୍ଗିସ୍ମା ଜୀସୁ ତାଣା କାରୁ ପାଣ୍ଡିତୁ, “ପ୍ରବୁ, ନୀନୁ ଆମ୍ବାଆରାଇଁ ଜୀସୁ ନହୁଁ ମାଞ୍ଜି ଏଞ୍ଜେଲ୍ସି ନଚେରି ଆହାମାନେସି ।”

୪ ସାମା ଜୀସୁ ଇ କାତା ଖେଞ୍ଜାନା ଏଲେଇଚେସି, “ଇ ନଚେରି ହାହାଲି ତାକି ଆଏ, ସାମା ମାହାପୁରୁତି ଗାଞ୍ଜୁରମି ତାକି, ଏନିକ୍ ଏମ୍ବାଟି ମାହାପୁରୁତି ମାରୁଏସି ଗାଞ୍ଜୁରମି ବେଟା ଆନେସି ।”

୫ ଜୀସୁ ମାର୍ତା, ତାନି ତାଙ୍ଗି ମରିୟମଇଁ ଅଡ଼େ ଲାଜରଇଁ ଜୀସୁ ନହୁଁ ମାଚେସି । ୬ ଏଚେତା ଏଞ୍ଜେଲ୍ସି ନଚେରି ଆହାମାନେସି ଇଞ୍ଜି ଖେଚେସି, ଏଚେତା ଏଞ୍ଜେଲ୍ସି ଏମିନିତାଣା ମାଚେସି, ଏ ଟାୟୁତା ରୀ ଦିନା ଡ଼ୟିତେସି । ୭ ଏଚେଟିଏ ଏଞ୍ଜେଲ୍ସି ସୀସୁୟାଁଇଁ ଏଲେଇଚେସି, “ଜାଦୁ ମାରୁ ଖେଣ୍ଡେ ଜୀହୁଦା ରାଜିତା ହାନ ।”

୮ ସୀସୁୟାଁ ଏଞ୍ଜେଲ୍ସାଇଁ ଏଲେଇଚେରି, “ଏ ଗୁରୁ ଜୀହୁଦିୟାଁ ନୀଏଁ ନିଙ୍ଗେ ଖାଲକାତଲେ ଖେତାଲି ଅଣ୍ଡି ମାଞ୍ଜାଚେରି, ଅଡ଼େ ଖେଣ୍ଡେ ନୀନୁ ଏମ୍ବାଆଁ ହାଜିମାଞ୍ଜି ?”

✨ ୧୦:୪୦ ୧୦:୪୦ ଜହ ୧:୨୮ † ୧୦:୪୦ ୧୦:୪୦ ମୁଞ୍ଜିନାୟି ✨ ୧୧:୧ ୧୧:୧ ଲୁକ ୧୦:୩୮,୩୯ ✨ ୧୧:୨ ୧୧:୨ ଜହ ୧୨:୩

୯ ଜୀସୁ ଏଲେଇରେସି, “ଦିନାତାକି ବାର ଗଂଟା ହିଲେଏ ? ଆମ୍ବାଆସି ମାଦେନା ତାକିସାରେ ପୁଟିକିଅସି, ଇଚିହିଁ ଏଞ୍ଜାସି ଦାରୁତିତି ଉଜେଡ଼ି; ୧୦ ସାମା ଲାଆଁୟାଁ ତାକିସାରେ ଏଞ୍ଜାସି ପୁଟିକିନେସି, ଇଚିହିଁ ଏଞ୍ଜାଣି ହିୟାଁତା ଉଜେଡ଼ି ହିଲେଏ ।” ୧୧ ଈ ବାରେ କାତା ଖେସ୍ତି ତାନ୍ନୁ ଏଞ୍ଜାରାଇଁ ଅଡ଼େ ଏଲେଇରେସି, “ମା ତଃଣ ଲାଜର ଇଦା କିହାମାନେସି, ସାମା ଏଞ୍ଜାଣାଇଁ ଇଦାଟି ନିକ୍ହାଲି ନାନୁ ହାଜିମାଇଁ ।”

୧୨ ଏମ୍ବାଟିଏ ସୀସୁୟାଁ ଏଞ୍ଜାଣାଇଁ ଏଲେଇରେସି, “ପ୍ରବୁ ଏଞ୍ଜାସି ତୁରାନା ଇଦା କିହାମାଟିହିଁ ନେହିଁ ଆନେସି ।”

୧୩ ଜୀସୁ ଲାଜର ହାହାମାନାକି ଏ କାତା ଏଲେଇରେସି, ସାମା ଏଞ୍ଜାଣି ଇଦା କିହାମାନି କାତା ଖେସ୍ତାତେସି ଇଞ୍ଜିଁ ଅଣ୍ପିମାରେରି । ୧୪ ଏଚିବେଲା ଜୀସୁ ତୀରେତଲେ ଏଲେଇରେସି, “ଲାଜର ହାହାମାନେସି; ୧୫ ଅଡ଼େ ନାନୁ ଏମ୍ବାଆଁ ହିଲାଆତେଏଁ, ଏଦାଆଁତାକି ମୀ ତାକି ରାହାଁ କିହିମାଇଁ, ଏନିକିଁ ମୀରୁ ନାମିଦେରି; ସାମା ଜାଦୁ ମାର ଏଞ୍ଜାଣି ତାଣା ହାନ ।”

୧୬ ଏମ୍ବାଟିଏ ତମା, ଆମ୍ବାଆରାଇଁ ଦିଦୁମ ଇଞ୍ଜିଁ ଇନେରି, ଏଞ୍ଜାସି ତାମି ତଃଣ ସୀସୁୟାଁ ଏଲେଇରେସି, “ଜାଦୁ, ମାର ଜିକେଏ ହାଜାନା ଏଞ୍ଜାଣିତଲେ ହାନ ।”

ଜୀସୁଏ ଖେଣ୍ଡେ ନିଜିନାସି ଅଡ଼େ ଜୀସୁ

୧୭ ଜୀସୁ ବେତନିୟାଁତା ଏଜାନା ଖେରେସି, ଏଞ୍ଜାସି ସାରି ଦିନା ଆତେସି ମାହଣି ମାଣ୍ଡାତା ଇଟାମାନେରି । ୧୮ ବେତନିୟାଁ ଜିରୁସାଲମଟି ରୀ କିଲମିଟର ହେକ ମାଟେ, ୧୯ ଅଡ଼େ ଜୀହୁଦିୟାଁ ବିତ୍ରାଟି ହାରେକା ମାର୍ତ୍ତା ଇଞ୍ଜାଁ ମରିୟମଇଁ ତାମି ତାୟିତି ଦୁକୁ ତୁକ୍ହାଲି ଏମ୍ବାଆଁ ଖାହାମାରେରି ।

୨୦ ଜୀସୁ ଖାହିମାନେସି ଇଞ୍ଜିଁ ଏଚେତା ମାର୍ତ୍ତା ଖେରେ, ଏଚେତା ମାର୍ତ୍ତା ଏଞ୍ଜାଣାଇଁ ବେଟାଆୟାଲି ହାଚେ, ସାମା ମରିୟମ ଇଜ କୁଗାନା ତୁୟିତେ । ୨୧ ମାର୍ତ୍ତା ଜୀସୁଇଁ ଏଲେଇରେ, “ପ୍ରବୁ ନାନୁ ଇମ୍ବାଆଁ ମାଟିହିଁ ମା, ନା ତାୟି ହାଆତେସିମା, ୨୨ ସାମା ନାନୁ ମାହାପୁରୁଇଁ

ଏନାଆଁ ରୀହଦି, ମାହାପୁରୁ ନିଙ୍ଗେ ଏଦାଆଁ ହିୟାନେସି, ଏଦାଆଁ ନୀଏଁ ଜିକେଏ ପୁଞ୍ଜାମାଈ ।”

୨୩ ଜୀସୁ ଏଦାନି ଏଲେଇରେସି, “ନୀ ତାୟି ଅଡ଼େ ଖେଣ୍ଡେ ନିଙ୍ଗିନେସି ।”

୨୪ “ମାର୍ତୀ ଜୀସୁଈ ଏଲେଇରେ, ଏଞ୍ଜାସି ତାୟୁ ଖେଣ୍ଡେ ନିଙ୍ଗିନି ଦିନାତା ନିଙ୍ଗିନେସି, ଇଦାଆଁ ନାନୁ ପୁଞ୍ଜାମାଈ ।”

୨୫ ଜୀସୁ ଏଦାନି ଏଲେଇରେସି, “ନାନୁ ଖେଣ୍ଡେ ନିଙ୍ଗିନାତେଏଁ ଅଡ଼େ ଜୀସୁତେଏଁ; ଆମ୍ବାଆସି ନାଙ୍ଗେ ନାମାନେସି, ଏଞ୍ଜାସି ହାଡ଼ି ଜିକେଏ ନୀଡିନେସି, ୨୬ ଆମ୍ବାଆସି ନୀଡିନେସି ଅଡ଼େ ନାମିନେସି, ଏଞ୍ଜାସି ଏରେଲା ଜିକେଏ ହାଅସି; ଈ କାତା ନାମିମାଞ୍ଜି ?”

୨୭ ମାର୍ତୀ ଏଲେଇରେ, “ଏ ପ୍ରବୁ ଆମ୍ବାଆସି ଦାରୁଡିତା ଖାନାୟି ମାରେ, ନାନୁ ଏ କ୍ରୀସୁ ମାହାପୁରୁ ମୀରଏଣାଡି, ଈ କାତା ନାମିମାଈ ।”

ଜୀସୁ ଡୀତେସି

୨୮ ଈ କାତା ଖେସାନା ମାର୍ତୀ ହାଜାନା ତାନି ତାଙ୍ଗି ମରିୟମଈ ଏଟକା ହାଟାନା ଏଲେଇରେ, “ଗୁରୁ ଖାଡ଼େସିଏ ନିଙ୍ଗେ ପାରିମାଞ୍ଜାନେସି ।” ୨୯ ମରିୟମ ଈ କାତା ଖେଞ୍ଜାନା ଦାପେ ନିଙ୍ଗାନା ଏଞ୍ଜାଣି ତାଣା ହାରେ । ୩୦ ଏଚିବେଲା ଜୀସୁ ନାୟୁଁ ବିତ୍ରା ଖାହାହିଲାଆତେସି, ସାମା ମାର୍ତୀ ଏଞ୍ଜାଣାଈ ଏମିନି ଟାୟୁତା ବେଟାଆହାମାରେ, ଏଡ଼େପାତେକା ଏ ଟାୟୁତେଏ ମାରେସି । ୩୧ ଏମିନି ଜୀହୁଦିୟାଁ ଏଦାନିତଲେ ଏ ଇଲୁତା ଦୁକୁ ତୁକହିମାରେରି, ଏଞ୍ଜାରି ମରିୟମ ଦାପେ ନିଙ୍ଗାନା ପାଙ୍ଗାତା ହାଚାଣି ମେସାନା, ଏଦି ମାହୁଣି ମାଣ୍ଡାତା ଡୀହାଲି ହାଜିମାନେ, ଈ କାତା ଅଣ୍ପାମାନା ଏଦାନି କ୍ରେଚ କ୍ରେଚ ହାରେରି ।

୩୨ ଏମ୍ବାଟିଏ ଜୀସୁ ଏମିନି ଟାୟୁତା ମାରେସି, ମରିୟମ ଏ ଟାୟୁତା ହାଜାନା ଏଞ୍ଜାଣାଈ ମେସାନା ଏଞ୍ଜାଣି କଡାୟାଁ ଡ଼ଇ ରିହାନା ଏଲେଇରେ, “ପ୍ରବୁ ନାନୁ ଇମ୍ବାଆଁ ମାଟିହୁଁ ମା ନା ତାୟି ହାଆତେସିମା ।”

୩୩ ଜୀସୁ ମରିୟମ ଅଡ଼େ ତାନିତଲେ ଖାହାମାନି ଜୀହୁଦି ଲକୁ ଡୀହିମାନାଣି ମେସାନା ଜୀସୁତା ହାରେକା ଦୁକୁ ଆହାନା ଖେରେସି,

୩୪ “ଏଞ୍ଜାଣାଇଁ ଆମ୍ବିୟା ଇଟାମାଞ୍ଜେରି ?” ଏଞ୍ଜାରି ଏଲେଇଚେରି,
“ପ୍ରବୁ, ୱାହାନା ସିନିକିମୁ ?”

୩୫ ଜୀସୁ ଡୀଡେସି । ୩୬ ଏଚେଟିଏ ଜୀହୁଦି ଲକୁ ଏଲେଇଇମ୍ବି
ଆଡେରି, “ଏଞ୍ଜାସି ଏଞ୍ଜାଣାଇଁ ଏଚେକା ଜୀହୁ ନହୁଁ ମାଚେସି ।”

୩୭ ସାମା ଏଞ୍ଜାରି ବିତ୍ରାଟି ଏଚରଜାଣା ଏଲେଇଚେରି, “ଇ ମାଣସି ଏ
କାଣାଇଁ ମେସ୍‌ପି କିହାମାଚେସି, ଏଞ୍ଜାସି ଇଞ୍ଜାଣାଇଁ ହାକିଟି ଗେଲ୍‌ପାଲି
ଆଡିଚେସିମା ?”

ହାଡି ଲାଜରଇଁ ଜୀହୁ ହୀନାୟି

୩୮ ଏମ୍ବାଟିଏ ଜୀସୁ ଦୁକୁ ଆହାନା ମାହୁଣି ମାଣ୍ଡା ତାଗେ ୱାଡେସି;
ଏଦି ର ପାଞ୍ଜୁ ମାଚେ, ଇଞ୍ଜା ପାଞ୍ଜୁ ଦୁଞ୍ଜେରିତା ର କାଜା ୱାଲି ମାଚେ ।

୩୯ ଜୀସୁ ଏଲେଇଚେସି, “ଇ ୱାଲି ଗୁଟି କିଦୁ ।” ହାଡାଣି ତାଙ୍ଗି ମାର୍ତ୍ତା
ଏଲେଇଚେ, “ପ୍ରବୁ, ଏଞ୍ଜାସି ଗାନ୍ଦା ଆହାହାଚେସିଏ, ଇଚିହୁଁ ହାହାନା
ସାରି ଦିନା ଆଡେସିଏ ।”

୪୦ ଜୀସୁ ଏଦାନି ଏଲେଇଚେସି, “ନୀନୁ ନାମିଦି, ଆଡିହୁଁ
ମାହାପୁରୁତି ଗାଞ୍ଜୁରମି ମେହୁଦି, ଇ କାତା ନୀନୁ ନିଙ୍ଗେ
ଞ୍ଜେସାମାଞ୍ଜାଆଡେସି ?” ୪୧ ଅଡେ ଏଞ୍ଜାରି ୱାଲି ଗୁଟି କିଚେରି

। ଅଡେ ଜୀସୁ ଲାକଞ୍ଜାକି ସିନିକିହାନା ଏଲେଇଚେସି, “ଆବା ନା
ପ୍ରାଡାନା ୱେଟି ଇଞ୍ଜୁଁ ନୀନୁ ନିଙ୍ଗେ ଜହରା କିହିମାଞ୍ଜାଇଁ । ୪୨ ନୀନୁ
କାଲେଏ ନା ପ୍ରାଡାନା ୱେଞ୍ଜିମାଞ୍ଜି, ଇ କାତା ନୀନୁ ପୁଞ୍ଜାମାଇଁ; ସାମା

ଏମିନି ଲକୁ ସାରିସୁରୁ ନିଚାମାନେରି, ନୀନୁ ନାଙ୍ଗେ ପାଣ୍ଡାମାଞ୍ଜାଦି
ଇଞ୍ଜୁଁ ଏଞ୍ଜାରି ଏନିକଁ ନାମିନେରି, ଏଦାଆଁତାକି ଏଞ୍ଜାରି ତାକି
ନୀନୁ ଏଲେଇଚେସି ।” ୪୩ ଏଞ୍ଜାସି ଏଲେଇଞ୍ଜାନା କାଜା ଗିୟାତଲେ

ଏଲେଇଚେସି, “ଲାଜର ପାଙ୍ଗାତା ହଡା ୱାମୁ ।” ୪୪ ଦେବୁଣିଏ
ଲାଜର ପାଙ୍ଗାତା ହଡାଞ୍ଜାଡେସି; ତାନି କେସ୍ତା କଡାଣା ମାହୁଣି ମାଣ୍ଡାତି
ହିମ୍ବୁରିକା ତଲେ ରୁପି ଆହାମାରୁ, ଇଞ୍ଜା ତାନି ମୁମ୍ବୁତା ଇଚାୟି ପାସ୍‌କି

ପିଡରିଞ୍ଜି ଆହାମାଚେ । ଜୀସୁ ଏଞ୍ଜାରାଇଁ ଏଲେଇଚେସି, “ହିମ୍ବୁରିକା
ହୁକଦୁ ଏଞ୍ଜାସି ତାକାପେସି ।”

ଜୀସୁଇଁ ପାୟାଲି ପାରୁ ପାରିନାୟି

(ମାତି ୨୨:୧-୫; ମାର୍କ ୧୪:୧,୨; ଲୁକ ୨୨:୧,୨)

୪୫ ହାରେକା ଜୀହୁଦି ଲକୁ, ଇଚିହ୍ ଆମ୍ବାଆରି ମରିୟମ ତାଣା ଖାହାମାଚେରି ଅଡ଼େ ଜୀସୁତି କାମା ମେସାମାଚେରି, ଏଞ୍ଜାରି ଏଞ୍ଜାଣାଇଁ ନାମିଚେରି । ୪୬ ଅଡ଼େ ଏଞ୍ଜାରି ବିତ୍ରାତି ଆମ୍ବା ଆମ୍ବାଆରି ପାରୁସିୟାଁ ତାଣା ହାଜାନା ଜୀସୁ ଏନା ଏନାଆଁ କିହାମାଚେସି ଏ ବାରେ ଏଞ୍ଜାରାଇଁ ଖେସ୍ତେରି । ୪୭ ଇ କାତା ଖେଞ୍ଜାନା ପାରୁସିୟାଁ ଅଡ଼େ କାଜା ପୂଜେରାକା କାଜା ବେରଣିମାଣ୍ଡାତା ଏଲେଇଚେରି, “ମାର ଏନି କିନାୟି ଇ ମାଣ୍ଡସି ହାରେକା କାବାଆନି କାମାୟାଁ କିହିମାନେସି । ୪୮ ମାର ଏଞ୍ଜାଣାଇଁ ଏଲେକିହ୍ ପିସ୍ତ୍ରହ୍ ବାରେ ଲକୁ ଏଞ୍ଜାଣି ତାଣା ନାମିନେରି, ଅଡ଼େ ରମିୟ ଲକୁ ଖାହାନା ଇ ଟାୟୁ କୃଡ଼ା ବାରେତି ନାସା କିନେରି ।”

୪୯ ସାମା ଏଞ୍ଜାରି ବିତ୍ରାତି ର କାଜା ପୂଜେରା, ଇଚିହ୍ କୟାପା ଏ ବାର୍ସାତି କାଜା ପୂଜେରା ଏଞ୍ଜାରାଇଁ ଏଲେଇଚେସି, “ମାରୁ ଏନାଆଁ ପୁଞ୍ଜାହିଲଅଚେରି ? ୫୦ ବାରେ କୃଡ଼ାତାରି ନାସା ଆନି କିହାଁ ବାରେ ଲକୁ ତାକି ରଅସି ହାନାୟି ମିଙ୍ଗେ ତାକି ନେହେଁ, ଇଦାଆଁ ମାରୁ ଅଣ୍ଡପି ହିଲଅଚେରି ।” ୫୧ ଏଞ୍ଜାସି ତାନିତାଣାଟି ଏଲେଇଞ୍ଜା ହିଲାଆଚେସି, ସାମା ଏଞ୍ଜାସି ଏ ବାର୍ସାତି କାଜା ପୂଜେରା ମାଚାକି ଇ ଟାୟୁ ଆନି କାତା ତାନି ଗୁତିଟି ହଚାମାଚେ, ଜୀସୁ ଏ କୃଡ଼ାତି ଲକୁ ତାକି, ୫୨ ଅଡ଼େ ଖାରଇ ଏ କୃଡ଼ା ତାକି ଆଏ, ସାମା ମାହାପୁରୁତି ଇତାଲା ଆତାଲା ଆହାମାନି ମୀରକାଣି ଜିକେଏ କୃଡ଼ି କିହାନା ରଣ୍ଡିଏ କିହାଲିତାକି ହାହାଲି ହାଜିମାନେସି, ଇଦାଆଁତାକି ଇ କାତା ଖେକ୍‌ହେସି ।

୫୩ ଇଞ୍ଜା ଏ ଦିନାଟିଏ ଏଞ୍ଜାଣାଇଁ ପାୟାଲି ତାକି ପାରୁ ପାରିଚେରି । ୫୪ ଏଦାଆଁତାକି ଜୀସୁ ଜୀହୁଦି ଲକୁ ବିତ୍ରା ପାଙ୍ଗାଞ୍ଜେଙ୍ଗେ ରେଆଚେସି, ସାମା ଏଞ୍ଜାସି ଏ ଟାୟୁଟି ହଚା ହାଜାନା ଲକୁ ହିଲାଆ ଟାୟୁ ଦାରି ମାନି ଏପ୍ରିୟମ ଦରୁଗାଟି ର ଗାଡ଼ାତା ହାଚେସି, ଅଡ଼େ ସୀସୁୟାଁ ତଲେ ଏମ୍ବାଆଁ ଡ଼ୟିଚେସି ।

୫୫ ଏଚିବେଲା ଜୀହୁଦି ଲକୁତି ପିସ୍ତ୍ରଆନି ପାରୁଁ ତାଗେ ମାଚେ, ଅଡ଼େ ନାସ୍‌କାଟି ହାରେକା ଲକୁ ଜାହାରାଇଁ ଅଟ୍‌ହା କତାଲି ପିସ୍ତ୍ରଆନି ପାରୁଁ ନକେଏ ଜିରୁସାଲମତା ହାଚେରି । ୫୬ ଏମ୍ବାଟିଏ ଏଞ୍ଜାରି ଜୀସୁଇଁ ପାରି ପାରିହ୍ ମାହାପୁରୁ ଇଲୁଡା ନିଚାମାଚାଟି

ତାମ୍ଭୁ ତାମ୍ଭୁ ଏଲେଇଶ୍ୱି ଆଡେରି, “ମୀରୁ ଏନାଆଁ ଅଣ୍ଡିମାଞ୍ଜେରି ? ଏଞ୍ଜାସି କି ପାର୍ବୁତା ଖାଅସି ?” ୫୭ କାଜା ପୂଜେରାଞ୍ଜା ଅଡେ ପାରୁସିୟାଁ ଏଞ୍ଜାଶାଈ ଆସାଲି ତାକି, ଏଞ୍ଜାସି ଏମ୍ବିୟା ମାନେସି, ଈ କାତା ଆମ୍ବାଆସି ପୁଞ୍ଜାମାନେସି, ଏ କାତା ଖେସାଲି ତାକି ହୁକୁମି ହୀହାମାରେରି ।

୧୨

ଜୀସୁଇଁ ନିୟୁଁ ରୁବିନାୟି

(ମାତି ୨୭:୬-୧୩; ମାର୍କ ୧୪:୩-୯)

୧ ଏମ୍ବାଟିଏ ଜୀସୁ ପିସ୍ପିଆନ୍ତି ପାର୍ବୁତି ସ ଦିନା ନକେଏ ବେତନିୟାଁତା ଖାଡେସି; ଏମିନି ଲାଜରଇଁ ହାଡାରି ତାଣାଟି ନିକହା ମାରେସି, ଏଞ୍ଜାସି ଏ ଟାୟୁତା ମାରେସି । ୨ ଏଦାଆଁତାକି ଏଞ୍ଜାରି ଏଞ୍ଜାଶାକି ଏ ଟାୟୁତା ଲାଆଁୟାଁ ର ବଜି କିତେରି; ମାର୍ତା ବାଟି କିହିମାରେ, ଅଡେ ଆମିନି ଗାଟାରି ଏଞ୍ଜାଣିତଲେ ତିଞ୍ଜାଲି କୁଗାମାରେରି, ଲାଜର ଏଞ୍ଜାରି ବିତ୍ରାଟି ରଅସି ମାରେସି ।

୩ ✨ଏଟିବେଲା ମରିୟମ ଆଦା ଗାଜୁ ଗାନ୍ଦା ନିୟୁଁ ତାଚାନା ଜୀସୁ କତାଶା ରୁବାନା ତାନି ତାୟୁଁ ରୁଶାୟାଁ ତଲେ ତାନି କତାଣି ଜେଡେ, ଅଡେ ବାରେ ଇଲୁତା ନିୟୁଁ ଗାନ୍ଦା ଆଡେ । ୪ ସାମା ତାନି ସୀସୁୟାଁ ବିତ୍ରାଟି ଇସ୍ପାରିୟତ ଜୀହୁଦା ଆମିନି ସୀସୁ ଜୀସୁଇଁ ସାତୁୟାଁ କେୟୁତା ହେରପାଲି ହାଜିମାରେସି, ଏଞ୍ଜାସି ଏଲେଇରେସି, ୫ “ଇ ନିୟୁଁ ତାନି ଖାଞ୍ଜା ଟାକାୟାଁ ତାକି ପାର୍ପି ଆହାନା ଏନାଆଁତାକି କାକୁଲି ଗାଟାରାକି ହୀପକି ଆଆଡେ ?” ୬ ଏଞ୍ଜାସି କାକୁଲି ଗାଟାରାଈ ଅଣ୍ଡିମାରେସି ଇଞ୍ଜୁଁ ଏଲେଇରେସି, ଏଡି ଆଏ, ସାମା ଏଞ୍ଜାସି ର ସରୁ ଅଡେ ଏଞ୍ଜାଣି ତାଣା ଟାକାୟାଁ ମଣା ମାଟାକି, ଏମ୍ବାଆଁ ଏନା ଏନାଆଁ ଇଟକି ଆହିମାରେ, ଏଦାଆଁ ସରୁ କିହିମାରେସି ।

୭ ସାମା ଜୀସୁ ଏଲେଇରେସି, “ଇଦାଆଁ ପିହୁଦୁ, ଏନିକଁ ନା ମାଡହା ମୁହନି ଦିନାତାକି ଏଡି ଏଦାଆଁ ଇଟାଲି ଆଡିନେ । ୮ କାକୁଲି

✨ ୧୨:୩ ୧୨:୩ ଲୁକ ୭:୩୭,୩୮

ଗାଟାରି ବାରେଦିନା ମୀ ତାଣା ମାନେରି, ସାମା ନାନୁ ବାରେବେଲା ମୀ ତଲେ ମାନଅଁ ।”

ଲାଜର କପାଟି ପାରୁ ପାରିନାୟି

^୯ ଏଚେଟିଏ ହାରେକା ଜୀହୁଦି ଲକୁ ଏଞ୍ଜାସି ଏମ୍ପାଆଁ ମାନେସି ଇଞ୍ଜି ପୁଞ୍ଜାନା ଖାରଇ ଜୀସୁ ତାକି ଆଏ, ସାମା ଏମିନି ଲାଜରଇଁ ଏଞ୍ଜାସି ହାକିଟି ନିକ୍ତହା ମାଚେସି, ଏଞ୍ଜାଣାଇଁ ମେସାଲି ଖାଚେରି ।
^{୧୦} ସାମା ଲାଜରଇଁ ଜିକେଏ ପାୟାଲି କାଜା ପୂଜେରାଙ୍ଗା ପାରୁ ପାରିଚେରି, ^{୧୧} ଇଚିହଁ ଏଞ୍ଜାଣି ତାକି ଜୀହୁଦିୟା ବିତ୍ରାଟି ହାରେକା ହାଜାନା ଜୀସୁ ତାଣା ନାମି ମାଚେରି ।

ଜୀସୁ ଜିରୁସାଲମତା ରାହାଟି ହଡ଼ନାୟି

(ମାତି ୨୧:୧-୧୧; ମାର୍କ ୧୧:୧-୧୧; ଲୁକ ୧୯:୨୮-୪୦)

^{୧୨} ତାନି ଅର ଦିନା ପାର୍ବୁତା ଖାହାମାନି ହାରେକା ଲକୁ ଜୀସୁ ଜିରୁସାଲମତା ଖାହାମାନେସି ଇଞ୍ଜି ଖେଚେରି ^{୧୩} ଇଞ୍ଜା କାଜୁରି ମାଟାୟା ଆସାନା ଜୀସୁଇଁ ବେଟାଆହାଲି ଖାଚେରି ଅଡ଼େ କାଜା ଗିୟାତଲେ ଏଲେଇଚେରି, “ହସାନା । ପ୍ରବୁତି ଦରୁତଲେ ଆମ୍ବାଆସି ଖାହିମାନେସି, ଏଞ୍ଜାସି ନେହେଁ; ଇସ୍ରାୟେଲତି ରାଜାଇଁ ମାହାପୂରୁ ବର ହୀପାସି ।”

^{୧୪} ଜୀସୁ ର ଗାଡ଼ଦେ ତାଲୁ ଲାକ କୁଗାନା ଖାହିମାଚେସି, ଏନିକିଁ ରାସ୍‌କି ଆହାମାନେ,

^{୧୫} “ଆକେ ସିୟନତି ମାସ୍କା, ଆଜାଆଦୁ ମେହଦୁ ମୀ ରାଜା ଖାହିମାନେସି,

ଏଞ୍ଜାସି ଗାଡ଼ଦେ ତାଲୁ ଲାକ କୁଗାନା ଖାହିମାନେସି ।”

^{୧୬} ଏଚିବେଲା ସୀସୁୟା ଏଦାନି କାତା ପୁଞ୍ଜାଲି ଆଡାଆଚେରି, ସାମା ଜୀସୁ ଗାଝୁରମିଟି ଖେଣ୍ଡେ ନିଙ୍ଗାଲିଏ ଏଞ୍ଜାରି ଅଶ୍‌ପୁତା ଖାଚେ, ଇ ବାରେ କାତା ସାସ୍ତେରିତା ରାସ୍‌କି ଆହାମାନେ, ଇଚିହଁ ଏଲେକିହଁ ଏ ଏଞ୍ଜାରି କାମା କିହାମାଚେରି ।

^{୧୭} ଜୀସୁ ହାତି ଲାଜରଇଁ ମାହଣି ମାଣ୍ଡାଟି ହାଟାନା ନିକ୍ତହାମାଚି ବେଲାତା ଏମିନିଗାଟାରି ଏଞ୍ଜାଣିତଲେ ମାଚେରି, ଏଞ୍ଜାରି ଇ ବାରେ କାତା ସାରିଞ୍ଜାକି ଖେକ୍‌ହା ମାଚେରି । ^{୧୮} ଇଦାଆଁତାକି ଲକୁ ବାରେ

ଏଞ୍ଜେଲ୍ ବେଟାଆହାଲି ହାଜାମାଚେରି, ଅଡ଼େ ଏଞ୍ଜେସି ଇ କାବାଆନି କାମା କିହାମାଚେସି ଇଞ୍ଜିଁ ଖେଞ୍ଜାମାଚେରି । ୧୯ ଇଦାଆଁ ମେସାନା ପାରୁସିୟାଁ ତାନି ବିତ୍ରା କାତା ଆଡ଼େରି, “ମେସିମାଞ୍ଜେରି ମାରୁ ଏନାଆଁ କିହାଲି ଆଡ଼ିହିଲାଆୟି; ଦାରୁଡିତି ବାରେ ଲକୁ ଏଞ୍ଜାଣି ଜେଚ ହାଜିମାନେରି ।”

ଏଚେକା ଗ୍ରିକ୍ ଲକୁ ଜୀସୁଇଁ ପାରିନାୟି

୨୦ ପାରୁଁ ବେଲତା ପ୍ରାତାନା କିହାଲି ଜିରୁସାଲମତା ଖାହାମାନି ଲକୁ ବିତ୍ରା ଏଚେକା ଗ୍ରିକ୍ ଲକୁ ମାଚେରି । ୨୧ ଏଞ୍ଜାରି ଗାଲିଲିତି ବେଡ଼ସାୟିଦାତି ପିଲିପ ତାଣା ଖାହାନା ବାତିମାଲିହିଁ ଏଲେଇଚେରି, “ବାରୁ, ମାନ୍ସୁ ଜୀସୁଇଁ ମେସାଲି ଅଣପିମାନମି ।”

୨୨ ପିଲିପ ହାଜାନା ଆୟିୟଇଁ କାରୁ ହୀତେସି ଅଡ଼େ ରିଆରି ହାଜାନା ଜୀସୁଇଁ ଖେସ୍ତେରି । ୨୩ ଜୀସୁ ଏଞ୍ଜାରାଇଁ ଏଲେଇଚେସି, “ମାଣସି ମୀରୁଏସି ଗାଝୁରମି ଆନି ବେଲା ଖାହାମାନେ । ୨୪ ନାନୁ ମିଙ୍ଗେ ସାତା ଖେସିମାଞ୍ଜାଇଁ ଗହଁ ପାଡ଼େୟି ବୁମିତା ରିହାନା ହାନି ପାଚେକା ଏଡ଼ି ରଣ୍ଡିଏ ପାଡ଼େୟି ଆହାନା ଡ଼ୟିନେ, ସାମା ଏଡ଼ି ହାଡ଼ିସାରେ ଏମ୍ପାଟି ହାରେକା ପାଡ଼େୟିକା ଆନୁ । ୨୫ ✨ଆମ୍ବାଆସି ଜାହାରା ଜୀଝୁତି ଜୀଝୁ ନନେସି, ଏଞ୍ଜାସି ଏଦାଆଁ ହାରୁଓ କିନେସି, ଆମ୍ବାଆସି ଜାହାରା ଜୀଝୁତି ଇ ଦାରୁଡିତା ଅପଅସି, ଏଞ୍ଜାସି ଏଦାଆଁ କାଲାକାଲା ତାକି ଗେଲ୍ପିନେସି । ୨୬ ଆମ୍ବାଆସି ନା ସେବା କାମାକିନାସି ଆନେସି, ଆତିହିଁ ଏଞ୍ଜାସି ନା ଜେଚ ଖାପେସି; ଅଡ଼େ ନାନୁ ଆମ୍ବିୟା ଡ଼ୟିଇଁ, ନା ସେବା କାମାକିନାସି ଜିକେଏ ଏମ୍ବାଆଁ ଡ଼ୟିନେସି; ଆମ୍ବାଆସି ନା ସେବା କିନେସି, ଆତିହିଁ ଆବା ଏଞ୍ଜାଣାଇଁ ମାନି କିନେସି ।

ଜୀସୁ ତାନି ହାକିତି କାତା ଏଲେଇନାୟି

୨୭ ନୀଏଁ ନା ଜୀଝୁ କିଲିବିଲି ଆହିମାନେ, ଇଞ୍ଜାଁ ନାନୁ ଏନାଆଁ ଇଞ୍ଜାଇଁ? ଆବା ଇ ଲାଗେଏ ତାଣାଟି ଗେଲ୍ପାମ୍, ସାମା ଏଦାଆଁତାକି ନାନୁ ଇ ଗାୟୁତା ଖାହାମାଇଁ ।

୨୮ ଆବା ନୀ ଦରୁ ଗାଝୁରମି ଆପେ ।”

☆ ୧୨:୨୫ ୧୨:୨୫ ମାତି ୧୦:୩୯; ୧୭:୨୫; ମାର୍କ ୮:୩୫; ଲୁକ ୯:୨୪; ୧୭:୩୩

ଏଚିବେଲାତା ହାଗୁ ଲାକଟି ଇ ହାଡ଼ା ଆଡେ ନାନୁ ଏଝାଣାଈଁ ଗାଝୁରମି କିହାମାଈଁ ଅଡ଼େ ଗାଝୁରମି କିଈଁ ।

୨୯ ଇଞ୍ଜା ଏମ୍ବାଆଁ ଦାରି ନିଚାମାଚି ଲକୁ ବାରେ ଇ ହାଡ଼ା ଝେଞ୍ଜାନା ଏଲେଇଚେରି, “ଇଦି ହାଗୁ ଗୁଣ୍ହିମାନେ ।” ଅଡ଼େ ଏଚ୍ଚକାତାରି ଏଲେଇଚେରି, “ଲାକପୁରୁତି ଦୁଡୁ ଏଝାଣିତଲେ କାତା ଆହିମାନେ ।”

୩୦ ଜୀସୁ ଏଲେଇଚେସି, “ଇ ହାଡ଼ା ନାଞେତାକି ଆହା ହିଲେଏ, ସାମା ଇ ହାଡ଼ା ମିଞେତାକି ଆହାମାନେ । ୩୧ ନୀଏଁ ଇ ଦାରତି ବିଚାରା କିନି ଦିନା; ନୀଏଁ ଇ ଦାରତିତି ସାଲଝି କିନାଇ ତଇ ମେଡ଼ପିଆନୁ । ୩୨ ନାନୁ ଏଚିବେଲା ଦାରତିଚି ଲାକପୁରୁ ଅଝିଆଈଁ, ଏଚିବେଲା ବାରେତି ନା ତାଣା ରେଜା ଅଈଁ ।” ୩୩ ଏଝାସି ଏନିକିଁ ହାହାଲି ହାଜିମାନେସି, ଏଝାସି ଇ କାତାତା ଏଲେଇଚେସି ।

୩୪ ଲକୁ ଏଝାଣାଈଁ ଏଲେଇଚେରି, “ମସିହା କାଚ୍ଲେଏ ତୁୟିନେସି ଇଞ୍ଜିଁ ମାମୁମସାତି ମେରାତା ଝେଞ୍ଜାମାନମି, ଆତିହଁ ମାଣ୍ଠସି ମୀରଏସି ଲାକ ପେରଝି ଆନେସି ଇଞ୍ଜିଁ ନାନୁ ଏନିକିଁ ଏଲେ ଇଞ୍ଜିମାଞ୍ଜି ? ଏ ମାଣ୍ଠସି ମୀରଏସି ଆମ୍ବାଆସି ?”

୩୫ ଜୀସୁ ଏଝାରାଈଁ ଏଲେଇଚେସି, “ଅଡ଼େ ଗାଡ଼େକା ତାକି ଉଜେଡ଼ି ମୀ ତାଣା ମାନେ । ଆନେରି ମିଞେ ଏନିକିଁ ଗୁସ୍ତେଏ, ଏଦାଆଁତାକି ମୀ ତାଣା ଉଜେଡ଼ି ମାଞ୍ଜା ମାଞ୍ଜାନା ତାକାଦୁ; ଆମ୍ବାଆସି ଆନେରିତା ତାକିନେସି, ଏଝାସି ଆମ୍ବିୟା ହାଜିମାନେସି ପୁଞ୍ଜାଲି ଆଡ଼ଅସି । ୩୬ ମୀରୁ ଏନିକିଁ ଉଜେଡ଼ିତି ମୀରକା ମାସ୍କା ଆଦେରି, ଏଦାଆଁତାକି ଉଜେଡ଼ି ମୀ ତାଣା ମାଞ୍ଜା ମାଞ୍ଜାନା ଉଜେଡ଼ିତା ନାମାଦୁ ।” ଜୀସୁ ଇ ବାରେ କାତା ଝେସାନା ହାଚେସି ଇଞ୍ଜା ଏଝାରି ତାଣାଚି ତରୁନା ତୁୟିଚେସି ।

ଲକୁ ନାମାଆ ଗାଟାୟି

୩୭ ଏଝାରି ନକିତା ଏଚେକା କାବାଆନି କାମାୟାଁ କିହାମାଚେସି, ଆଡ଼ିଜିକେଏ ଏଝାରି ଏଝାଣି ତାଣା ନାମା ହିଲିଆଚେରି, ୩୮ ଏନିକିଁ ମାହାପୁରୁ ଅଣ୍ପୁତି ବଲୁ ଝେହ୍ନି ଜିସାୟ ତାଣାଚି ରାଟାମାନି କାତା ପୁରା ଆନେ,

“ପ୍ରବୁ ମା ହାଡ଼ା ଝେଞ୍ଜାନା ଆମ୍ବାଆସି ନାମା ମାନେସି ?

ଆମ୍ବାଆରି ତାଣା ପ୍ରବୁ ତାନି ବାଡ଼ୟୁ ତସାମାନେସି ?”

୩୯ ଇଦାଆଁତାକି ଏଝାରି ନାମାଲି ଆଡ଼ିହିଲାଆତେରି, ଇଞ୍ଜା ଜିସାୟ ଏଲେଇଞ୍ଜାମାଚେସି,

୪୦ ସାତେଏ ମାହାପୁରୁ ଏଝାରି କାଣ୍‌କା କାଣା କିହାମାନେସି ।

ଏଦାଆଁତାକି ଏଝାରି ହିୟାତା ଏନାଆଁ ମେସାଲି ଆଡ଼ଅରି, ଇଞ୍ଜା ହିୟାତା ଏନାଆଁ ତେଲ୍‌ହାଲି ଆଡ଼ଅରି

ମାହାପୁରୁ ଏଲେଇଞ୍ଜା ମାନେସି,

“ନେହ୍ ଆହାଲିତାକି ଏଝାରି ନା ତାଣା ଖେଶ୍ଟା ଖାହିହିଲଅରି ।”

୪୧ ଜିସାୟ ଜୀସୁ କ୍ରୀସ୍ତତି ଗାଝୁରମି ମେସ୍ତେସି ଏଦାଆଁତାକି ଏଝାସି ଏଝାଣି କାତା ଖେସ୍ତେସି ।

୪୨ ଆଡ଼ିଜିକେଏ ଜୀହୁଦି ଲକ୍ଷ୍ମି କାଜାରି ହାଚ୍ଚେକା ଏଝାଣି ତାଣା ନାମିତେରି, ସାମା ଏଚେତା ଜୀହୁଦି କୁଲମିଟି ପେରହାନେରି ଇଞ୍ଜା ପାରୁସିୟାଁ ଆଜିତାକି ବାରେଜାଣା ଏ କାତାବାର୍ତା ଆହି ହିଲାଆତେରି,

୪୩ ଇଚିହ୍ ଏଝାରି ମାହାପୁରୁ ତାଣାଟି ଗାଝୁରମି କିହାଁ ମାଣ୍‌ସିୟାଁ ତାଣାଟି ଗାଝୁରମି ଜୀସୁ ନହିମାଚେରି ।

ମାଣ୍‌ସିୟାଁ ତାଣାଟି ଜୀସୁତି କାତା ବିଚାରା କିନାୟି

୪୪ ଜୀସୁ କାଜା ଗିୟାତଲେ ଏଲେଇଚେସି, “ଆମ୍ବାଆସି ନା ତାଣା ନାମିନେସି, ଏଝାସି ନା ତାଣା ନାମଅସି, ସାମା ନାଞ୍ଜେ ପାଣ୍ଡାତାଣାଈଁ ନାମିନେସି; ୪୫ ଆମ୍ବାଆସି ନାଞ୍ଜେ ମେସ୍ତାନେସି, ଏଝାସି ନାଞ୍ଜେ ପାଣ୍ଡାତାଣାଈଁ ମେହ୍‌ନେସି । ୪୬ ଆମ୍ବାଆସି ନା ତାଣା ନାମିନେସି, ଏଝାସି ଏନିକ୍ ଆନ୍ଦେରିତା ବାସା କିଅସି, ଏଦାଆଁତାକି ନାନୁ ଦାର୍‌ତିତା ଉଜେଡ଼ି ଆହାନା ଖାହାମାଈଁ । ୪୭ ଆମ୍ବାଆସି ନା ବଲ୍ଲୁ ଖେଞ୍ଜାନା ମାନ୍‌ଝି ଆଅସି, ଆଡ଼ିହ୍ ନାନୁ ଏଝାଣି ବିଚାରା କିଅ; ଇଚିହ୍ ନାନୁ ଦାର୍‌ତିତା ବିଚାରା କିହାଲି ଖାଆନା ଦାର୍‌ତିତି ଗେଲ୍‌ପାଲି ଖାହାମାଈଁ । ୪୮ ଆମ୍ବାଆସି ନାଞ୍ଜେ ଅପଅସି ଅଡେ ନା ବଲ୍ଲୁତି ଆବଅସି, ନାନୁ ଏନିନି ବଲ୍ଲୁ ଜଲ୍ଲାମାଈଁ, ନା ଗୁଡ଼ିତି ବଲ୍ଲୁ ତାୟୁତି ଦିନାତା ଏଝାଣି ବିଚାରା କିନେ; ୪୯ ଇଚିହ୍ ନାନୁ ନା ତାଣାଟି ଜଲ୍ଲା ହିଲଅଁ, ସାମା ନାନୁ ଏନାଆଁ ଜଲ୍ଲିଈଁ ଅଡେ ଏନାଆଁ ଖେକ୍‌ଈଁ, ଏଦାଆଁ ନାଞ୍ଜେ ପାଣ୍ଡାମାଞ୍ଜାନି ଆବା ହୁକୁମି ହାହାମାଞ୍ଜାନେସି ୫୦ ଇଞ୍ଜା ନାନୁ ପୁଞ୍ଜାମାଈଁ ତାନି ହୁକୁମି କାଲ୍ଲାକାଲ୍ଲାତି ଜୀସୁ ହୀନେ । ନା

ଆବା ନାଙ୍ଗେ ଏନାଆଁ ଜଲ୍ଲାଲି ହୁକୁମି ହୀହାମାଞ୍ଜାନେସି, ୱାଉରଇ ଏଲେକିହିଁ ଏ ୱେହ୍‌ଇଁ ।”

୧୩

ଜୀସୁ ସୀସୁୟାଁ କତାୟାଁ ନରନାୟି

୧ ପିସ୍‌ପିଆନି ପାରୁଁ ନକେଏ ଜୀସୁ ଇ ଦାର୍‌ତିଟି ଆବା ତାଣା ହାନି କାରୁ ଆହାଲିଏ, ଦାର୍‌ତିତା ମାନି ତାନି ଲକୁଣି ଏଞ୍ଜାସି ଜୀଞ୍ଜୁ ନହ୍ଁମାରେସି, ଏଞ୍ଜାଉଇଁ ହାରେକା ଜୀଞ୍ଜୁ ନନାଣି ତସାମାରେସି ।

୨ ଜୀସୁ ତାନି ସୀସୁୟାଁ ତଲେ ଲାଆଁୟାଁ ତିନି ବେଲାତା ସୟତାନ ସିମନ ମୀରଏସି ଇସ୍‌ସାରିୟତ ଜୀହୁଦା ହିୟାଁତା ଜୀସୁଇଁ ସାତୁ କେୟୁତା ହେର୍‌ପାଲି ଅଣ୍‌ପି କିହାମାରେ । ୩ ଏଚିବେଲା ଆବା ତାନି କେୟୁତା ବାରେ ହେର୍‌ପା ମାନେସି ଅଡ଼େ ଏଞ୍ଜାସି ମାହାପୁରୁ ତାଣାଟି ୱାହାମାନେସି, ଅଡ଼େ ମାହାପୁରୁ ତାଣା ହାଜିମାନେସି, ୪ ଇଦାଆଁ ପୁଞ୍ଜାନା ରାନ୍ଦା ତିନି ତାଣାଟି ନିଙ୍ଗାନା, ତାନି ହିମ୍ବୁରି ଇଚିତେସି ଇଞ୍ଜା ର. ତୁଞ୍ଜାଲା ତାନି ଟେଡେଲିତା ରୁପା କଡିତେସି । ୫ ତାୟୁ ଏଞ୍ଜାସି ମୁତାତା ଏୟୁ କଡିତେସି, ଅଡ଼େ ସୀସୁୟାଁଟି କତାୟାଁ ନରହାନା ତାନି ଟେଡେଲିତା ମାନି ତୁଞ୍ଜାଲା ତଲେ ଢେଜାଲି ମାଟ୍‌ହେସି । ୬ ଏଚିବେଲା ଜୀସୁ ସିମନ ପିତର ଦାରିତା ୱାଡେସି; ଏଞ୍ଜାସି ଏଞ୍ଜାଣାଇଁ ଏଲେଇରେସି, “ପ୍ରବୁ ନୀନୁ ନା କତାୟାଁ ନରହି ମାଞ୍ଜାଦି ?”

୭ ଜୀସୁ ଏଞ୍ଜାଣାଇଁ ଏଲେଇରେସି, “ନୀନୁ ଏନାଆଁ କିହିମାଇଁ ନୀନୁ ନୀଏଁ ଏଦାଆଁ ପୁଞ୍ଜାଲି ଆଡ଼ଅଡି, ତାୟୁ ପୁଞ୍ଜି ।”

୮ ପିତର ଏଲେଇରେସି, “ଆଏ, ନା କତାୟାଁ ଏଚେଲାଞ୍ଜା ନରହଅଡି ।” ସାମା ଜୀସୁ ଏଲେଇରେସି, “ନୀନୁ ନୀ କତାୟାଁ ନରହାଆଡିହିଁ ନୀନୁ ଅଡ଼େ ନା ସୀସୁ ଆୟାଲି ଆଡ଼ଅଡି ।”

୯ ସିମନ ପିତର ଏଲେଇରେସି, “ପ୍ରବୁ, ଆଡିହିଁ କତାୟାଁ ଏନାଆଁକି, ନା କେସ୍‌ସା ଅଡ଼େ ତାୟୁଁ ଜୁକେଏ ନରହାମୁ ।”

୧୦ ଜୀସୁ ଏଞ୍ଜାଣାଇଁ ଏଲେଇରେସି, “ଆମ୍ବାଆସି ଏୟୁ ମାହାମାନେସି, ଏଞ୍ଜାଣି କତାୟାଁ ନରନି କିହିଁ ଏନାୟି ଲଡା ହିଲେଏ, ମୀରୁ ଅଟ୍‌ଞ୍ଜି ଆହାମାଞ୍ଜେରି; ସାମା ବାରେଜାଣା ଆଏ ।” ୧୧ ଇଚିହିଁ

ଆତ୍ମାଆସି ଏଞ୍ଜାଣାଇଁ ସାତୁୟାଁ କେୟୁତା ହେର୍ପିନେସି ଜୀସୁ ତଲିଏ ଏଞ୍ଜାଣାଇଁ ପୁଞ୍ଜାମାଚେସି; ଏଦାଆଁତାକି ଏଞ୍ଜାସି ଏଲେଇଚେସି, “ମୀରୁ ବାରେଜାଣା ଅର୍ଘି ଆହାହିଲଅରି ।”

୧୨ ✧ତାୟୁ ଜୀସୁ ଏଞ୍ଜାରି କତାୟାଁ ନରହାନା ତାନି ହିମ୍ବରି ପରହାନା ଖେଣ୍ଡେ ତିଞ୍ଜାଲି କୁଗିତେସି ଇଞ୍ଜା ଖେଚେସି, “ନାନୁ ମିଙ୍ଗେ ତାକି ଏନାଆଁ କିହାମାଇଁ ମୀରୁ ପୁଞ୍ଜାଲି ଆଡିତେରି କି ? ୧୩ ମୀରୁ ନାଙ୍ଗେ ଗୁରୁ ଇଞ୍ଜାଁ ହାଟିମାଞ୍ଜାଦେରି, ଏଦି ସାତା; ଇଚିହଁ ନାନୁ ଏଞ୍ଜାଚେସି । ୧୪ ମୀ ଗୁରୁ ଅଡେ ପ୍ରବୁଚେସି ନାନୁ, ନାନୁ ମୀ କତାୟାଁ ନରହାମାଞ୍ଜାଇଁ ଆଡିହଁ ମୀରୁ ଜିକେଏ ରଅତେରି ରଅଣି କତାୟାଁ ନରନାୟି ମାନେ । ୧୫ ଇଚିହଁ ନାନୁ ମିଙ୍ଗେତାକି ଏନିକଁ କିହାମାଇଁ ମୀରୁ ଜିକେଏ ଏଲେକିହଁ କିଦୁ, ଇଦାଆଁତାକି ଇଦାଆଁ ତସାମାଞ୍ଜାଇଁ । ୧୬ ✧ସାତା ସାତା ନାନୁ ମିଙ୍ଗେ ଖେସିମାଞ୍ଜାଇଁ, ହଲେଏସି ତାନି ସାସୁକାରି କିହାଁ କାଜାସି ଆଏ, ଅଡେ ପାଣ୍ଡୁଞ୍ଜି ଆଡାସି ତାନି ପାଣ୍ଡିତାଣା କିହାଁ କାଜାସି ଆଏ । ୧୭ ମୀରୁ ଇ ବାରେ ପୁଞ୍ଜାନା ଏଲେକଁ କିଦେରି ଇଚିହଁ ମୀରୁ ନେହାଁତେରି ।”

୧୮ “ନାନୁ ମୀ କାତା ଖେସିହିଲଅଁ; ଏନିଲେହେଁତି ଲକୁଣି ନାନୁ ଆଡାମାଇଁ, ଏ କାତା ନାନୁ ପୁଞ୍ଜାମାଇଁ; ସାମା ଦାମ୍ବୁ ପତିତି ଇ ବଲୁ ଏନିକଁ ପୁରା ଆନେ, ଇଦାଆଁତାକି ଇ ବାରେ ଆହିମାନେ, ‘ଆତ୍ମାଆସି ନା କାଦି ତିନେସି ଏଞ୍ଜାସି ନା କପାଟି ନିଙ୍ଗିତେସି ।’ ୧୯ ଏଦି ଗଟଞ୍ଜି ଆନାଟି ନାନୁ ଏଞ୍ଜାଚେସି ଇଞ୍ଜାଁ ମୀରୁ ନାମିଦେରି, ଏଦାଆଁତାକି ଗଟଞ୍ଜି ଆନି ନକେଏ ନାନୁ ମିଙ୍ଗେ ଖେସିମାଞ୍ଜାଇଁ । ୨୦ ✧ସାତା ସାତା ନାନୁ ମିଙ୍ଗେ ଖେସିମାଞ୍ଜାଇଁ, ଆତ୍ମାଆସି ନା ତାଣାଟି ପାଣ୍ଡୁଞ୍ଜି ଆଡାଣାଇଁ ଆବିନେସି, ଏଞ୍ଜାସି ନାଙ୍ଗେ ଆବାନେସି, ଅଡେ ଆତ୍ମାଆସି ନାଙ୍ଗେ ଆବାନେସି ଏଞ୍ଜାସି ନାଙ୍ଗେ ପାଣ୍ଡାତାଣାଇଁ ଆବିନେସି ।”

ସାତୁୟାଁ କେୟୁତା ହେର୍ପିନି କାତା ଖେହନାୟି

(ମାତି ୨୨:୨୦-୨୫; ମାର୍କ ୧୪:୧୭-୨୧; ଲୁକ ୨୨:୨୧-୨୩)

✧ ୧୩:୧୨ ୧୩:୧୨ ଲୁକ ୨୨:୨୨ ✧ ୧୩:୧୭ ୧୩:୧୭ ମାତି ୧୦:୨୪; ଲୁକ ୬:୪୦; ଜହ ୧୫:୨୦ ✧ ୧୩:୨୦ ୧୩:୨୦ ମାତି ୧୦:୪୦; ମାର୍କ ୯:୩୭; ଲୁକ ୯:୪୮; ୧୦:୧୨

୨୧ ଜୀସୁ ଈ ବାରେ କାତା ୱେସ୍ତି ତାୟ୍ ଜୀଝୁତା ହାରେକା ଦୁକୁ ଆହାନା ବାରେତି ନକିତା ୱେକ୍‌ହେସି, “ନାନୁ ମିଙ୍ଗେ ସାତା ୱେସିମାଞ୍ଜାଇଁ ମୀ ବିତ୍ରାତି ରଅସି ନାଙ୍ଗେ ସାତୁୟ୍ କେୟୁତା ହେର୍‌ପାନେସି ।”

୨୨ ଏଞ୍ଜାସି ଆମ୍ବାଆରି କାତା ଏଲେଇରେସି, ପୁନାଆନା କାବାଆହାନା ସୀସୁୟ୍ ତାମ୍‌ତାମ୍‌ସି ସିନିକିଞ୍ଜି ଆଡେତି । ୨୩ ଏଞ୍ଜାରି ବିତ୍ରାତି ଏମିନି ସୀସୁୟ୍ ଜୀସୁ ହାରେକା ଜୀଝୁ ନହ୍‌ମାରେସି, ଏଞ୍ଜାସି ଜୀସୁତି ଚିଃନିଞ୍ଜାକି କୁଗାନା ତିଞ୍ଜିମାରେସି । ୨୪ ସିମନ ପିତର ଏଞ୍ଜାଣାଇଁ କେୟୁତଲେ ଏଲେଇରେସି, “ଏଞ୍ଜାସି ଆମ୍ବାଆରି କାତା ଏଲେଇଞ୍ଜି ମାନେସି, ଏଦାଆଁ ୱେଞ୍ଜୁ ।”

୨୫ ଏ ସୀସୁ ଅଡେ ତାଗେ ଆହାନା ଜୀସୁୟ୍ ୱେରେସି, “ଏଞ୍ଜାସି ଆମ୍ବାଆସି ପ୍ରବୁ ।”

୨୬ ଜୀସୁ ଏଲେଇରେସି, “ଇ ରୁଚି ଗିନାତା କୁତି କିହାନା ହାଇଁ ଏଞ୍ଜାସି ।” ଏଲେଇଞ୍ଜାନା ଜୀସୁ ରୁଚି ଗିନାତା କୁତି କିହାନା ସିମନ ମୀର୍‌ଏସି ଇସ୍‌ସାରିୟୁତ ଜୀହୁଦାକି ହାତେସି । ୨୭ ରୁଚି ରାସାଲିଏ ସୟତାନା ଏଞ୍ଜାଣି ହିୟ୍‌ତା ହଡେ । ଏରେଟିଏ ଜୀସୁ ଏଲେଇରେସି, “ଏନାଆଁ କିନାୟିମାନେ ତବେ କିମ୍ପୁ ।” ୨୮ ଜୀସୁ ଏଞ୍ଜାଣାଇଁ ଈ କାତା ଏନାଆଁତାକି ଏଲେଇରେସି ଏଟ୍‌କାତାରି ଆମ୍ବାଆରି ପୁଞ୍ଜାଲି ଆଡାଆତେରି । ୨୯ ଜୀହୁଦା କେୟୁତା ଟାକାୟ୍ ମଣା ମାତାକି, ପାର୍ବୁତାକି ଏନା ଏନାଆଁ ଲଡାମାନେ, ଏଦାଆଁ କତାଲି ଆଆତ୍‌କାକୁଲି ଗାଟାରାକି ହାହାଲିତାକି ଜୀସୁ ଏଞ୍ଜାଣାଇଁ ଏଲେଇରେସି ଇଞ୍ଜି ଆମ୍ବା ଆମ୍ବାଆରି ଅଣ୍‌ପିତେରି ।

୩୦ ରୁଚି ତିଞ୍ଜାନା ଜୀହୁଦା ଏ ଦେବୁଣିଏ ପାଙ୍ଗାତା ହାଚେସି, ଏଡେତା ଲାଆଁୟ୍ ଆହାମାଚେ ।

ପୁଃନି ମେରା

୩୧ ଜୀହୁଦା ପାଙ୍ଗାତା ହାଜାଲିଏ ଜୀସୁ ଏଲେଇରେସି, “ନୀଏଁ ମାଣ୍‌ସି ମୀର୍‌ଏସି ଗାଝୁରମି ଆନି ବେଲ୍‌ମା ୱାହାମାନେ; ଅଡେ ତାନିତାଣାଟି ମାହାପୁରୁ ଗାଝୁରମି ଆନେସି । ୩୨ ମାହାପୁରୁ ମାଣ୍‌ସି ମୀର୍‌ଏଶା ତାଣାଟି ଗାଝୁରମି ଆଡିହ୍‌, ମାହାପୁରୁ ତାନୁଏ ଗାଝୁରମିଟି

ମାଣସି ମୀରଏଣାଇଁ ଗାଝୁରମି କିନେସି । ତବେ ଏଝାଣାଇଁ ଗାଝୁରମି କିହାଲି ହାଜିମାନେସି । ^{୩୩} ✱କକାତେରି ନାନୁ ଅଡ଼େ ଗାତି ଦିନା ଡୟଅଁ, ମୀରୁ ନାଙ୍ଗେ ପାରାଦେରି, ସାମା ନାନୁ ଆମ୍ବିୟା ହାଜିମାଇଁ ମୀରୁ ଏମ୍ବାଆଁ ହାଜାଲି ଆଡ଼ଅତେରି, ଈ କାତା ଜୀହୁଦି ଲକ୍ଷୁତି କାଜାରାଇଁ ଏଲେଇଞ୍ଜା ମାରୋଏଁ ଏଲେକିହିଁ ମିଙ୍ଗେ ଜିକେଏ ଝେସିମାଞ୍ଜାଇଁ । ^{୩୪} ✱ମୀରୁ ରଅତେରି ରଅଣାଇଁ ଜୀହୁନଦୁ, ଈ ପୁଃନି ମେରା ମିଙ୍ଗେ ହାହିମାଞ୍ଜାଇଁ; ନାନୁ ଏନିକିଁ ମିଙ୍ଗେ ଜୀହୁନହାଁମାଞ୍ଜାଇଁ, ମୀରୁ ଜିକେଏ ଏଲେକିହିଁଏ ରଅତେରି ରଅଣାଇଁ ଜୀହୁନଦୁ । ^{୩୫} ମୀ ତାଣା ରଅସି ରଅଣାଇଁ ଜୀହୁନନାୟି ମାନେ, ଆତିହିଁ ମୀରୁ ନା ସାସୁୟାଁତେରି, ଈ କାତା ବାରେଜାଣା ପୁନେସି ।”

ପିତର ପୁଞ୍ଜାହିଲଅଁ ଇନି କାତା ତଲିଏ ଝେହ୍ନାୟି

(ମାତି ୨୭:୩୧-୩୫; ମାର୍କ ୧୪:୨୭-୩୧; ଲୁକ ୨୨:୩୧-୩୪)

^{୩୬} ସିମନ ପିତର ଏଝାଣାଇଁ ଝେରେସି, “ପ୍ରବୁ ନାନୁ ଆମ୍ବିୟା ହାଜିମାଞ୍ଜି ?”

ଜୀସୁ ଏଲେଇରେସି, “ନାନୁ ଆମ୍ବିୟା ହାଜିମାଇଁ, ନୀନୁ ନୀଏଁ ନା ଜେତ ଜେତ ହାଜାଲି ଆଡ଼ଅତି, ସାମା ତାୟୁ ହାଜି ।”

^{୩୭} ପିତର ଏଝାଣାଇଁ ଏଲେଇରେସି, “ପ୍ରବୁ ନୀଏଁ ନାନୁ ଏନାଆଁକି ହାଜାଲି ଆଡ଼ଅଁ ? ନାନୁ ନୀ ତାକି ନା ଜୀହୁ ଜିକେଏ ହାଇଁ ।”

^{୩୮} ଜୀସୁ ଏଲେଇରେସି, “ଏନାଆଁ ନୀନୁ ନା ତାକି ନୀ ଜୀହୁ ହାଦି ? ନାନୁ ନିଙ୍ଗେ ସାତା ଝେସିମାଞ୍ଜାଇଁ, କୟୁ କେଣ୍ଡା ନକେଏ ନୀନୁ ନାଙ୍ଗେ ତାନିପାଲି ପୁଞ୍ଜାହିଲଅଁ ଈଞ୍ଜିଁ ଈଞ୍ଜାଦି ।”

୧୪

ଜୀସୁ ଜିରୁ, ସାତା ଅଡ଼େ ଜୀହୁ

^୧ “ମୀ ହିୟାଁ ଆତାଜାକା ଆଆପେ; ମୀରୁ ମାହାପୁରୁ ତାଣା ନାମାଦୁ, ଅଡ଼େ ନା ତାଣା ଜିକେଏ ନାମାଦୁ । ^୨ ନା ଆବାତି ଇଜ ହାରେକା ବାସାଟାୟୁ ମାନେ; ବାସାଟାୟୁ ହିଲାଆତିହିଁମା ନାନୁ

✱ **୧୩:୩୩** ୧୩:୩୩ ଜହ ୭:୩୪ ✱ **୧୩:୩୪** ୧୩:୩୪ ଜହ ୧୫:୧୨, ୧୭; ୧ଜହ ୩:୨୩; ୨ଜହ ୧:୫

ମିଙ୍ଗେ ଖେସ୍ତାଆତେଏଁମା, ନାନୁ ମିଙ୍ଗେତାକି ଚାୟୁ ତିୟାରା କିହାଲି ହାଜିମାଲ୍; ୩ ଅଡ଼େ ନାନୁ ହାଜାନା ମିଙ୍ଗେତାକି ଚାୟୁ କେପିତି ତାୟୁ, ଖେଣ୍ଡେ ଖାଲ୍, ଅଡ଼େ ନାନୁ ଆମ୍ବିୟା ମାଲ୍, ମୀରୁ ଜିକେଏ ଏନିକ୍ ଏ ଚାୟୁତା ଡ଼ୟିଦେରି, ଏଦାଆଁତାକି ମିଙ୍ଗେ ଏ ଚାୟୁତା ଅହିଁ ହାଜାଲ୍ । ୪ ନାନୁ ଆମ୍ବିୟା ହାଜିମାଲ୍ ଏ ଜିରୁ ପୁଞ୍ଜାମାଞ୍ଜେରି ।”

୫ ତମା ଏଲେଇରେସି, “ପ୍ରବୁ, ନାନୁ ଆମ୍ବିୟା ହାଜିମାଞ୍ଜି, ମାମ୍ବୁ ପୁଞ୍ଜାହିଲଅମି, ଏମ୍ବିୟା ହାଜି ଏ ଜିରୁତି ଏନିକ୍ ପୁନମି ?”

୬ ଜୀସୁ ଏଲେଇରେସି, “ନାନୁ ଜିରୁ, ସାତା ଅଡ଼େ ଜୀସୁତେଏଁ; ନା ତାଣାଟି ତାକାଆସାରେ ଆମ୍ବାଆସି ଆବା ତାଣା ହାଜାଲି ଆଡ଼ଅସି । ୭ ମୀରୁ ନାଙ୍ଗେ ପୁଞ୍ଜାତିହିଁମା, ନା ଆବାଲ୍ ଜିକେଏ ପୁରେରିମା; ନୀଏଁ ଜିକେଏ ଏଞ୍ଜାଣାଲ୍ ପୁଞ୍ଜିମାଞ୍ଜେରି ଅଡ଼େ ଏଞ୍ଜାଣାଲ୍ ମେସାମାଞ୍ଜେରି ।”

୮ ପିଲିପ ଏଞ୍ଜାଣାଲ୍ ଏଲେଇରେସି, “ପ୍ରବୁ, ମାଙ୍ଗେ ଆବାଲ୍ ତସ୍ତାମ୍ବୁ, ଏରେକେଏ ମାଙ୍ଗେତାକି ସାରି ।”

୯ ଜୀସୁ ଏଲେଇରେସି, “ପିଲିପ ଇଚର ଦିନା ନାନୁ ମୀ ତଲେ ଡ଼ୟାମାଲ୍, ମୀରୁ ଏନାଆଁ ନାଙ୍ଗେ ପୁଞ୍ଜାଆତେରି ? ଆମ୍ବାଆସି ନାଙ୍ଗେ ମେସାମାଞ୍ଜାନେସି ଏଞ୍ଜାସି ଆବାଲ୍ ମେସାମାନେସି; ମାଙ୍ଗେ ଆବାଲ୍ ତସ୍ତାମ୍ବୁ ଇଞ୍ଜି ଏନିକ୍ ଏଲେ ଇଞ୍ଜିମାଞ୍ଜି ? ୧୦ ନାନୁ ଆବା ତାଣା ଅଡ଼େ ଆବା ନା ତାଣା ମାନେସି, ଇ କାତା ଏନାଆଁ ମୀରୁ ନାମିହିଲଅତେରି ? ନାନୁ ମିଙ୍ଗେ ଏମିନି କାତା ଖେସିମାଞ୍ଜାଲ୍, ଏ ବାରେ ନା ତାଣାଟି ଖେସିମାଞ୍ଜାଅଁ, ସାମା ଆବା ନା ତାଣା ମାଞ୍ଜାନା ତାନି କାମା କିହିମାନେସି । ୧୧ ନାନୁ ଆବା ତାଣା ମାଲ୍ ଅଡ଼େ ଆବା ନା ତାଣା ମାନେସି ଇ କାତା ନାମାଦୁ, ଆଆତ୍ କାମାତି ମେସାନା ନାମାଦୁ । ୧୨ ନାନୁ ମିଙ୍ଗେ ସାତା ଖେସିମାଞ୍ଜାଲ୍, ଆମ୍ବାଆସି ନା ତାଣା ନାମିନେସି, ନାନୁ ଏନି ଏନି କାମା କିହିମାଲ୍, ଏଞ୍ଜାସି ଜିକେଏ ଏ ବାରେ କିନେସି, ଅଡ଼େ ଏ ବାରେକିହାଁ ହାରେକା କାଜା କାମା କିନେସି, ଇତିହିଁ ନାନୁ ଆବା ତାଣା ହାଜିମାଲ୍ । ୧୩ ଆବା ଏନିକ୍ ମୀରୁଏଣା ତାଣା ଗାଞ୍ଜୁରମି ଆନେସି, ଏଦାଆଁତାକି ମୀରୁ ନା ଦରୁତି ଏନାଆଁ ରୀହ୍‌ଦେରି, ଏ ବାରେ ନାନୁ ହିୟାଲ୍ । ୧୪ ମୀରୁ ନା ଦରୁତି ଏନାଆଁ ନାଙ୍ଗେ ରୀସ୍ତାଦେରି, ନାନୁ ମିଙ୍ଗେ ଏ ବାରେ ହିୟାଲ୍ ।”

ସୁଦୁଜୀଝୁତି ହାହାଲି ଆଞ୍ଜନାୟି

୧୫ “ମୀରୁ ନାଙ୍ଗେ ଜୀଝୁନହୁଁ ମାଞ୍ଜାଦେରି, ଆତିହୁଁ ନା ହୁକୁମି ମାନଝି ଆଦୁ । ୧୬ ଅଡେ ନାନୁ ନା ଆବାଇଁ ବାତିମାଲିଇଁ, ଅଡେ ମୀ ତଲେ କାଲେଏ ଡୟାଲି ତାକି ଏଝାସି ମିଙ୍ଗେ ଅଡେ ର ସାୟେମି କିନାଣାଇଁ, ୧୭ ଇଚିହୁଁ ଏ ସାତା ଜୀଝୁତି ହିୟାନେସି । ଦାରତି ଏଦାଣି ଆବାଲି ଆଡେଏ, ଇଚିହୁଁ ଦାରତି ଏଦାଣି ମେସା ହିଲେଏ କି ପୁଞ୍ଜା ହିଲେଏ; ମୀରୁ ଏଦାଣି ପୁଞ୍ଜାମାଞ୍ଜେରି, ଇଚିହୁଁ ଏଦି ମୀ ତଲେ ମାନେ, ଅଡେ ଏଦି ମୀ ହିୟାତା ଡୟିନେ ।”

୧୮ “ନାନୁ ମିଙ୍ଗେ କାର୍ମା କିହା ହାଜଅଁ, ନାନୁ ମୀ ତାଣା ଖେଣ୍ଡା ଖାଇଁ । ୧୯ ଗାଡେକା ଜେଚ ଦାରତି ଅଡେ ନାଙ୍ଗେ ମେସାଲି ଆଡେଏ; ସାମା ମୀରୁ ନାଙ୍ଗେ ମେସାଦେରି, ଇଚିହୁଁ ନାନୁ ନୀତାମାଇଁ, ଅଡେ ମୀରୁ ଜିକେଏ ନୀତାନା ଡୟିଦେରି । ୨୦ ନାନୁ ନା ଆବା ତାଣା ଅଡେ ମୀରୁ ନା ତାଣା ଅଡେ ନାନୁ ମୀ ତାଣା ଡୟିଇଁ, ଇଦାଆଁ ଏ ଦିନା ମୀରୁ ପୁଞ୍ଜେରି ।”

୨୧ “ଆମ୍ବାଆସି ନା ହୁକୁମି ଆବାହାଁ ମାନଝି ଆନେସି, ଏଝାସି ନାଙ୍ଗେ ଜୀଝୁ ନୟାଁନେସି, ଅଡେ ଆମ୍ବାଆସି ନାଙ୍ଗେ ଜୀଝୁ ନୟାଁନେସି, ନା ଆବା ଏଝାଣାଇଁ ଜୀଝୁ ନନେସି, ଅଡେ ନାନୁ ଏଝାଣାଇଁ ଜୀଝୁ ନଇଁ ଅଡେ ଏଝାଣି ତାଣା ତସାକତିଇଁ ।”

୨୨ ଜୀହୁଦା* ଏଝାଣାଇଁ ଏଲେଇଚେସି, “ଏ ପ୍ରବୁ, ଏନାଆଁ ଆଡେ, ନାନୁ ଦାରତିତା ନିଙ୍ଗେ ତସା କତାଆନା ମା ତାଣା ତସିମାଞ୍ଜାଦି ?”

୨୩ ଜୀସୁ ଏଝାଣାଇଁ ଏଲେଇଚେସି, “ଆମ୍ବାଆସି ନାଙ୍ଗେ ଜୀଝୁ ନୟାଁନେସି ଆତିହୁଁ ଏଝାସି ନା ବଲୁତି ମାନଝି ଆନେସି, ଅଡେ ନା ଆବା ଏଝାଣାଇଁ ଜୀଝୁ ନନେସି, ଅଡେ ନାନୁ ଏଝାଣି ତାଣା ଖାହାନା ଏଝାଣିତଲେ ବାସା କିଇଁ । ୨୪ ଆମ୍ବାଆସି ନାଙ୍ଗେ ଜୀଝୁ ନୟାଁସି, ଏଝାସି ନା ବଲୁତି ମାନଝି ଆଅସି, ଅଡେ ମୀରୁ ଏମିନି ବଲୁ ଖେଞ୍ଜାମାଞ୍ଜେରି, ଏଦି ନାଦି ଆଏ, ସାମା ନାଙ୍ଗେ ପାଣ୍ଡାମାଞ୍ଜାନି ଆବା ମାହାପୁରୁଖାୟି ।”

୨୫ “ନାନୁ ମୀ ତାଣା ମାଞ୍ଜା ମାଞ୍ଜାନା ମିଙ୍ଗେ ଇ କାତା ଖେସ୍ତାତେଏ । ୨୬ ସାମା ଏ ସାୟେମି କିନାୟି, ଇଚିହୁଁ ଏମିନି ସୁଦୁଜୀଝୁ ଆବା

* ୧୪:୨୨ ୧୪:୨୭ ଇସ୍ପାରିୟତ ଜୀହୁଦା ଆଏ

ନା ଦରୁତି ହିୟାନେସି, ଏଡ଼ି ମିଙ୍ଗେ ବାରେ ଜାପୁହାନେ, ଅଡ଼େ ନାନୁ ମିଙ୍ଗେ ଏନା ଏନାଆଁ ଖେସାମାଞ୍ଜାଇଁ, ଏ ବାରେ ମିଙ୍ଗେ ଅଣ୍ଡି କିୟାନେ ।”

୨୭ “ନାନୁ ମିଙ୍ଗେ ହିଡ଼ଡ଼ି ହାହାନା ହାଜିମାଇଁ, ନା ହିଡ଼ଡ଼ି ମିଙ୍ଗେ ଦାନା କିହିମାଞ୍ଜାଇଁ; ଦାର୍ତି ଏନିକ୍ ଦାନା କିନେ ନାନୁ ମିଙ୍ଗେ ଏଲେକ୍ ଦାନା କିହିହିଲଅଁ, ମୀ ହିୟାଁ କିଲିବିଲି ଅଡ଼େ ଆଜି ଗାଗାୟି ଆଆପେ । ୨୮ ନାନୁ ହାଜିମାଇଁ ଅଡ଼େ ମୀ ତାଣା ଖେଶ୍ଟା ଖାଇଁ, ଇ ନା କାତା ଖେଞ୍ଜାମାଞ୍ଜେରି । ମୀରୁ ନାଙ୍ଗେ ଜାପୁ ନୟାତିହିଁମା, ନାନୁ ନା ଆବା ତାଣା ହାଜିମାଇଁ ଇଞ୍ଜି ରାହାଁ କିତେରିମା, ଇତିହିଁ ଆବା ନା କିହାଁ କାଜାସି । ୨୯ ଏନାୟି ବାରେ ଗଟଞ୍ଜି ଆନାୟି ମାନେ, ଏ ନଡ଼କଏ ନାନୁ ମିଙ୍ଗେ ଖେସ୍ତାତେସଁ । ଏ ବାରେ ଗଟଞ୍ଜି ଆଡ଼ିସାରେ ମୀରୁ ନାଙ୍ଗେ ନାମାଦେରି । ୩୦ ନାନୁ ମୀ ତଲେ ହାରେକା କାତା ଆୟଅଁ, ଇତିହିଁ ଦାର୍ତିତି ସାଲ୍ଡ଼ି କିନାୟି ଖାହିମାନେ; ଅଡ଼େ ନା ତାଣା ତାନିଞ୍ଜାୟି ଏନାୟି ହିଲେଏ; ୩୧ ସାମା ଆବା ନାଙ୍ଗେ ଏନିକ୍ ହୁକୁମି ହାହାମାଞ୍ଜାନେସି, ଏଲେକିହିଁ ନାନୁ କାମା କିଇଁ । ଆତିହିଁ ନାନୁ ଆବାଇଁ ଜାପୁ ନହିଁମାଇଁ ଇଞ୍ଜି ଦାର୍ତି ପୁନେ ।”

“ଖାଦୁ ମାର, ଇମ୍ବାଟି ହାନ ।”

୧୫

ଜାସୁ ସାତା ଅଙ୍ଗୁରି ମାଡ଼ା

୧ “ନାନୁ ସାତା ଅଙ୍ଗୁରି ମାଡ଼ା, ଅଡ଼େ ନା ଆବା କାମାକିନାସି । ୨ ନା ତାଣା ମାନି ଏମିନି କମା ପାଡ଼େୟି ଆୟେଏ, ଏଦାନି ଏଞ୍ଜାସି ଚୁଣ୍ଡାହାଡ଼ୁହନେସି; ଅଡ଼େ ଏମିନି କମା ପାଡ଼େୟି ଆୟିନେ, ଗାଡ଼ି ପାଡ଼େୟି ଆୟାଲି ତାକି ଜାଡ଼ୁ କିନେସି । ୩ ନାନୁ ମିଙ୍ଗେ ଏମିନି ବଲୁ ଖେସାମାଞ୍ଜାଇଁ, ଏଦାଆଁତାକି ଜାଡ଼ୁ ଆହାମାଞ୍ଜେରି । ୪ ନା ତାଣା ଡ଼ୟାଦୁ ଆତିହିଁ ନାନୁ ମୀ ତାଣା ଡ଼ୟିଇଁ । କମା ଏନିକ୍ ଅଙ୍ଗୁରି ମାଡ଼ାତା ଡ଼ୟାଆସାରେ ତାନିତାଣାଟି ପାଡ଼େୟି ଆୟାଲି ଆଡେଏ, ଏଲେକିହିଁ ଏ ମୀରୁ ଜିକେଏ ନା ତାଣା ଡ଼ୟାଆସାରେ ପାଡ଼େୟି ଆୟାଲି ଆଡ଼ଅଡେରି ।”

୫ “ନାନୁ ଅଛୁରି ମାଡ଼ା ମୀରୁ କମାୟାଁ, ଆମ୍ବାଆସି ନା ତାଣା ଡ଼ୟିନେସି ଅଡ଼େ ନାନୁ ଆମ୍ବାଆରି ତାଣା ଡ଼ୟିଲ୍, ଏଞ୍ଜାସି ହାରେକା ପାଡ଼େୟି ଆୟିନେସି; ଇଚିହିଁ ନା ପିସ୍‌ପେ ମୀରୁ ଏନାଆଁ କିହାଲି ଆଡ଼ଅଡ଼େରି । ୬ ଆମ୍ବାଆସି ନା ତାଣା ଡ଼ୟିଅସି, ଆତିହିଁ ଏଞ୍ଜାସି କମା ଲେହେଁ ପାଙ୍ଗାତା ମେଡ଼ପି ଆନେସି ଅଡ଼େ ଖାୟା ହାନେସି, ଇଞ୍ଜା ଲକୁ ଏଞ୍ଜାଆଁ କୃଡ଼ି କିହାନା ହିରୁତା ମେଡ଼ନେରି ଅଡ଼େ ଏଞ୍ଜି ବାରେ ଖେହାହାନୁ । ୭ ମୀରୁ ନା ତାଣା ଡ଼ୟିଦେରି, ଅଡ଼େ ନା ବଲୁ ମୀ ତାଣା ଡ଼ୟିନେ, ଆତିହିଁ ମୀରୁ ଏନାଆଁ ମନ କିଦେରି, ଏଡ଼ାଆଁ ରାହ୍‌ଦୁ, ଆତିହିଁ ଏଡ଼ି ମିଙ୍ଗେତାକି କିଞ୍ଜିଆନେ । ୮ ମୀରୁ ହାରେକା ପାଡ଼େୟି ଆୟିସାରେ ନା ଆବା ଗାଞ୍ଜୁରମି ଆନେସି, ଅଡ଼େ ମୀରୁ ନା ସାତା ସୀସୁ ଆଦେରି । ୯ ଏନିକିଁ ଆବା ନାଙ୍ଗେ ଜୀଞ୍ଜୁ ନହାଁମାଞ୍ଜାନେସି, ନାନୁ ଜିକେଏ ଏଲେକିହିଁ ଏ ମିଙ୍ଗେ ଜୀଞ୍ଜୁନହାଁମାଞ୍ଜାଇଁ; ନା ଜୀଞ୍ଜୁ ନଞ୍ଜୁତା ତୀରିଆହାନା ଡ଼ୟାଦୁ । ୧୦ ନାନୁ ଏନିକିଁ ନା ଆବାତି ହୁକୁମି ମାନଞ୍ଜି ଆହାନା ତାନି ଜୀଞ୍ଜୁ ନଞ୍ଜୁତା ତୀରିଆହାନା ଡ଼ୟିମାଇଁ, ଏଲେକିହିଁ ଏ ମୀରୁ ଜିକେଏ ନା କାତା ମାନଞ୍ଜି ଆଦେରି, ଆତିହିଁ ନା ଜୀଞ୍ଜୁ ନଞ୍ଜୁତା ତୀରିଆହାନା ଡ଼ୟିଦେରି ।”

୧୧ “ଏନିକିଁ ନା ରାହାଁ ମୀ ତାଣା ଡ଼ୟିନେ, ଅଡ଼େ ମୀ ରାହାଁ ଏନିକିଁ ପୁରାଆନେ, ଏଡ଼ାଆଁତାକି ଇ ବାରେ ମିଙ୍ଗେ ଖେସ୍ତାତେଏଁ । ୧୨ ନାନୁ ଏନିକିଁ ମିଙ୍ଗେ ଜୀଞ୍ଜୁନହାଁମାଞ୍ଜାଇଁ, ମୀରୁ ଜିକେଏ ଏଲେକିହିଁ ଏ ରଅଡ଼େରି ରଅଣାଇଁ ଜୀଞ୍ଜୁନଦୁ, ଇଦି ନା ହୁକୁମି । ୧୩ ଜାହାରା ତଡ଼େସିଙ୍ଗା ତାକି ଜୀଞ୍ଜୁହାନି କିହାଁ ଅଡ଼େ କାଜା ଜୀଞ୍ଜୁନନାୟି ହିଲେଏ । ୧୪ ନାନୁ ମିଙ୍ଗେ ଆମିନି ହୁକୁମି ହାହାମାଞ୍ଜାଇଁ, ଏଡ଼ାଆଁ ମୀରୁ ମାନଞ୍ଜି ଆଦେରି ଆତିହିଁ ମୀରୁ ନା ତଡ଼େସିଙ୍ଗା । ୧୫ ନାନୁ ମିଙ୍ଗେ ଅଡ଼େ ହଲେଏସି ଇଞ୍ଜିଁ ମାଞ୍ଜିଆଁ, ଇଚିହିଁ ସାଞ୍ଜୁକାରି ଏନାଆଁ କିନେସି, ହଲେଏସି ଏଡ଼ାଆଁ ପୁନଅସି, ସାମା ନାନୁ ମିଙ୍ଗେ ତଡ଼େ ଇଞ୍ଜିମାଞ୍ଜାଇଁ, ଇଚିହିଁ ନାନୁ ନା ଆବା ତାଣାଟି ଏନା ଏନାଆଁ ଖେଞ୍ଜାମାଇଁ, ଏ ବାରେ ମିଙ୍ଗେ ଖେସାମାଞ୍ଜାଇଁ । ୧୬ ମୀରୁ ନାଙ୍ଗେ ଆବା ମାଞ୍ଜିଅଡ଼େରି, ସାମା ନାନୁ ମିଙ୍ଗେ ଆବାମାଞ୍ଜାଇଁ, ଅଡ଼େ ମୀରୁ ଏନିକିଁ

☆ ୧୫:୧୨ ୧୫:୧୨ ଜହ ୧୩:୩୪; ୧୫:୧୨; ୧ଜହ ୩:୨୩; ୨ଜହ ୧:୫

ପାଢ଼େଇ ଆୟାଲି ଆଡ଼ିଦେରି ଅଡ଼େ ମୀ ପାଢ଼େଇ ତୀରିଆହାନା ଡ଼ିନେ, ଏଦାଆଁତାକି ମିଙ୍ଗେ ଆଚାମାଞ୍ଜାଇଁ । ଏତେଟିଏ ମୀରୁ ନା ଦରୁତଲେ ଆବାଇଁ ଏନାଆଁ ରୀହଦେରି ଏଞ୍ଜାସି ମିଙ୍ଗେ ହିୟାନେସି । ୧୭ ମୀରୁ ଏନିକିଁ ରଅତେରି ରଅଣାଇଁ ଜୀଝୁ ନଡ଼େରି, ଏଦାଆଁତାକି ନାନୁ ଈ ବାରେ ହୁକୁମି ହାହିମାଞ୍ଜାଇଁ ।”

ଦାର୍ତ୍ତିତି ଅପାଆଗାଟାୟି

୧୮ “ଦାର୍ତ୍ତି ମିଙ୍ଗେ ଅପେଏ, ଆତିହିଁ ମିଙ୍ଗେ ଅପାଆ ନକେଏ ନାଙ୍ଗେ ଅପାମାଞ୍ଜେଏ, ଈଦାଆଁ ପୁଞ୍ଜାମାଞ୍ଜୁ । ୧୯ ମୀରୁ ଦାର୍ତ୍ତିତାତେରି ଆହାମାଟିହିଁମା, ଦାର୍ତ୍ତି ମିଙ୍ଗେ ନାଲକୁ ଈଞ୍ଜୁଁ ପୁଞ୍ଜାନା ଜୀଝୁ ନୟାତେମା; ମୀରୁ ଦାର୍ତ୍ତିତି ଖାହା ହିଲଅତେରି, ସାମା ନାନୁ ମିଙ୍ଗେ ଦାର୍ତ୍ତିତି ଆଚାମାଞ୍ଜାଇଁ, ଏଦାଆଁତାକି ଦାର୍ତ୍ତି ମିଙ୍ଗେ ଅପେଏ । ୨୦ ହଲେଏସି ସାଝୁକାରି କିହାଁ କାଜାସି ଆଏ, ନାନୁ ମିଙ୍ଗେ ଏମିନି ବଲୁ ଖେସାମାଞ୍ଜାଇଁ, ଏଦାଆଁ ଅଣ୍ପାଦୁ । ଏଞ୍ଜାରି ନାଙ୍ଗେ ସାସ୍ତି ହାହାମାଞ୍ଜାନେରି, ଆତିହିଁ ମିଙ୍ଗେ ଜିକେଏ ସାସ୍ତି ହିୟାନେରି; ଅଡ଼େ ଏଞ୍ଜାରି ନା ବଲୁତି ମାନୁଞ୍ଜି ଆହାମାନେରି, ଆତିହିଁ ମୀ ବଲୁ ଜିକେଏ ମାନୁଞ୍ଜି ଆନେରି । ୨୧ ସାମା ଏଞ୍ଜାରି ନାଙ୍ଗେ ପାଣ୍ଡାତାଣାଇଁ ପୁଞ୍ଜାହିଲାଆକି, ନା ଦରୁ ତାକି ମିଙ୍ଗେ ଈ ବାରେ ଆନେ । ୨୨ ନାନୁ ଖାହାନା ଏଞ୍ଜାରାଇଁ ଖେହୁଆତିହିଁ, ଏଞ୍ଜାରି ପାପୁ ଗାଟାରି ଆଆତେରିମା; ସାମା ନୀଏଁ ଈ ପାପୁ ତାକି ଏନି ମିତି କାତା ଖେସାଲି ଆଡ଼ଅରି ୨୩ ଆମ୍ବାଆସି ନାଙ୍ଗେ ଅପଅସି, ଏଞ୍ଜାସି ନା ଆବାଇଁ ଜିକେଏ ଅପଅସି । ୨୪ ନାନୁ ଏଞ୍ଜାରିତାଣା ଏନି କାବାଆନି କାମା କିହାହିଲାଆତହିଁ, ଏଞ୍ଜାରି ପାପୁ ଗାଟାରି ଈଞ୍ଜୁଁ ଏଜିକିଞ୍ଜି ଆଆତେରିମା । ସାମା ନା ବାରେ କାମା ମେସାନା ଜିକେଏ ଏଞ୍ଜାରି ନାଙ୍ଗେ ଅଡ଼େ ନା ଆବାଇଁ ଅପାହିଲଅରି । ୨୫ ସାମା ଏଞ୍ଜାରି ନାଙ୍ଗେ ଉଜେଏ ଅପାମାଞ୍ଜଅରି, ମସା ମେରାତା ରାସ୍ତି ଆହାମାନାୟି ଏନିକିଁ ପୂରା ଆନେ ଈଦାଆଁତାକି ଈ ବାରେ ଆହିମାନେ ।”

୨୬ “ଆବା ତାଣାଟି ନାନୁ ମୀ ତାଣା ଏମିନି ସାୟେମି କିନାଣି ପାଣ୍ଡାଇଁ, ଆବା ତାଣାଟି ଖାନି ଏ ସାତା ଜୀଝୁ ଖାଡ଼ିହିଁ ନା କାତା ସାକି ହିୟାନେ;

୨୭ ମୀରୁ ଜିକେଏ ନା କାତାତାକି ସାକି ହୀଦେରି, ଇଚିହିଁ ମୂଲୁଟିଏ ମୀରୁ ବାରେ ନା ତଲେ ମାତେରି ।”

୧୭

୧ “ମୀ ନାମୁତି ଏନିକିଁ ପିହିଅତେରି, ଇଦାଆଁତାକି ଇ ବାରେ କାତା ୱେସାମାଞ୍ଜାଇ । ୨ ଏଞ୍ଜାରି ମିଙ୍ଗେ କୁଲମଟି ହପ୍‌ହାନେରି, ଇଲେତି ଦିନା ୱାହିମାନେ, ଏତେତା ଆମ୍ବାଆସି ମିଙ୍ଗେ ପାୟାନେସି, ଏଞ୍ଜାସି ମାହାପୁରୁ ତାକି ଜହରାତି ପୂଜା କିହିମାଇଁ ଇଞ୍ଜିଁ ଅଣ୍‌ପିନେସି । ୩ ଲକୁ ଇ ବାରେ କିୟାନେରି, ଇଚିହିଁ ଏଞ୍ଜାରି ଆବା ଆଆତିଁ ନାଙ୍ଗେ ପୁଞ୍ଜାମାଞ୍ଜଅରି । ୪ ଇ ବାରେ ଗଟ୍‌ଝି ଆଡ଼ିସାରେ, ନାନୁ ମିଙ୍ଗେ ୱେସାମାଞ୍ଜାତେଏଁ ଇ କାତା ମୀରୁ ଏନିକିଁ ଅଣ୍‌ପିଦେରି, ଇଦାଆଁତାକି ଇ ବାରେ କାତା ମିଙ୍ଗେ ୱେସାମାଞ୍ଜାଇ । ନାନୁ ମୀ ତଲେ ମାତାକି ମୂଲୁଟିଏ ଇ ବାରେ କାତା ମିଙ୍ଗେ ୱେସାମାଞ୍ଜାଆଁ ।”

ସୁଦୁଜୀଝୁତି କାମା

୫ “ସାମା ନାନୁ ନୀଏଁ ନା ପାଶ୍ଚାତାଶା ତାଶା ହାଜିମାଇଁ, ଅଡେ ମୀରୁ ଆମ୍ବିୟା ହାଜିମାଞ୍ଜି ଇଞ୍ଜିଁ ମୀ ବିତ୍ରାତି ଆମ୍ବାଆତେରି ନାଙ୍ଗେ ୱେଞ୍ଜି ମାଞ୍ଜାଅତେରି । ୬ ସାମା ନାନୁ ଇ ବାରେ କାତା ୱେସାମାଞ୍ଜାନାକି ମୀ ହିୟାଁ ହାରେକା ଦୁକୁ ଆହିମାନେ । ୭ ସାମା ନାନୁ ମିଙ୍ଗେ ସାତା ୱେସିମାଞ୍ଜାଇଁ, ନାନୁ ହାନାୟି ମିଙ୍ଗେତାକି ନେହେଁ, ଇଚିହିଁ ନାନୁ ହାଲାଆସାରେ ଏ ସାୟେମି କିନାୟି ମୀ ତାଶା ୱାଏ, ସାମା ନାନୁ ହାଚିସାରେ ଏଦାଶି ମୀ ତାଶା ପାଶ୍ଚାଇଁ । ୮ ଏଡ଼ି ୱାହାନା ପାପୁ, ଦାମ୍ବୁ ଅଡେ ମାହାପୁରୁତି ବିଚାରାତି କାତା ଇ ଦାର୍‌ତିତି ଲକୁଣି ୱେହ୍‌ନେ; ୯ ପାପୁତି କାତା, ଇଚିହିଁ ଏଞ୍ଜାରି ନା ତାଶା ନାମା ହିଲଅରି; ୧୦ ଦାମ୍ବୁତି କାତା, ଇଚିହିଁ ନାନୁ ଆବା ତାଶା ହାଜିମାଇଁ ମୀରୁ ଅଡେ ନାଙ୍ଗେ ମେସୁଅତେରି; ୧୧ ବିଚାରାତି କାତା, ଇଚିହିଁ ଇ ଦାର୍‌ତି ସାଲ୍‌ଝି କିନାରି ବିଚାରା କିଝି ଆହାମାନେରି ।”

୧୨ “ମିଙ୍ଗେ ନାନୁ ଅଡେ ହାରେକା କାତା ୱେସ୍ତାନାୟିମାନେ, ସାମା ନୀଏଁ ମୀରୁ ଏ ବାରେ ଅରହାଲି ଆଡ଼ଅତେରି ୧୩ ସାମା ସାତାତି ଜୀଝୁ ୱାଡ଼ିସାରେ, ଏଡ଼ି ବାରେ ସାତାତି ତେଲହାଲି ବାଡ଼ୁୟି ହିୟାନେ, ଏଡ଼ି ମିଙ୍ଗେ ଜିରୁ ତସାନା ତାନିତାଶାଟି ଏନାଆଁ ୱେହ୍‌ଏ, ମାହାପୁରୁ ତାଶାଟି

ଏନା ଏନାଆଁ ଖେଞ୍ଜାମାନେ ଖାରଇ ଏଚେକେଏ ଖେହ୍ନେ, ଅଡ଼େ ଏନାୟି ଆହାଲି ହାଜିମାନେ ଏଦାଆଁ ଏଦି ଖେସ୍ତାନେ । ୧୪ ଏଝାସି ନାଞ୍ଜେ ଗାଝୁରମି କିୟାନେସି, ଇଚିହ୍ମ ନା ତାଣାଟି ବାରେ କାତା ପୁଞ୍ଜାନା ଏଦି ଏଦାଆଁ ମୀ ତାଣା ଖେସ୍ତାନେ । ୧୫ ଏନା ଏନାୟି ଆବାଝାୟି, ଏ ବାରେ ନାଦି; ଇଦାଆଁତାକି ନାନୁ ଏଲେଇଞ୍ଜାତେଏଁ, ଏଝାସି ନା କାତା ଅହାନା ମିଞ୍ଜେ ଖେସ୍ତାନେସି ।”

ଦୁକୁ ଅଡ଼େ ରାହାଁ

୧୬ “ଗାଡ଼େକା ଜେତ ମୀରୁ ଅଡ଼େ ନାଞ୍ଜେ ମେସ୍ତଅତେରି, ସାମା ଏଚରଦିନା ଜେତ ମେସ୍ତାଦେରି ।”

୧୭ ଏଚେଟିଏ ତାନି ସୀସୁୟାଁ ବିତ୍ରାଟି ଆମ୍ବା ଆମ୍ବାଆରି ଏଲେଇଚେରି, “ଗାଡ଼େକା ଜେତ ନାଞ୍ଜେ ମେସ୍ତଅତେରି, ଅଡ଼େ ଏଚରଦିନା ହାଟି ତାୟୁ ନାଞ୍ଜେ ମେସ୍ତାଦେରି, ନାନୁ ଆବା ତାଣା ହାଜିମାଲ୍, ଏଝାସି ଏମିନି କାତା ମାଞ୍ଜେ ଖେସ୍ତାତେସି, ଇଦି ଏନାୟି ?” ୧୮ ଏଝାରି ଏଲେଇଚେରି, “ଗାଡ଼େକା ଇଞ୍ଜିଁ ଏନାଆଁ ଏଲେଇଞ୍ଜି ମାନେସି ? ଏଝାସି ଏନାଆଁ ଏଲେଇଞ୍ଜି ମାନେସି ମାୟୁ ତେଲହାଲି ଆଡ଼ିହିଲଅମି ।”

୧୯ ସୀସୁୟାଁ ତାଞ୍ଜ ଖେଞ୍ଜାଲି ଅଣ୍ଡିମାନେରି ଇଞ୍ଜିଁ ପୁଞ୍ଜାନା ଜୀସୁ ଏଝାରାଇ ଏଲେଇଚେସି, “ଗାଡ଼େକା ଜେତ ନାଞ୍ଜେ ମେସ୍ତଅତେରି, ଅଡ଼େ ଏଚରଦିନା ହାଟି ତାୟୁ ନାଞ୍ଜେ ମେସ୍ତାଦେରି, ନାନୁ ଇ ଏମିନି କାତା ମିଞ୍ଜେ ଖେସ୍ତାତେଏଁ, ଏ କାତାତାକି ଏନାଆଁତାକି ମୀରୁ ବାଦିବାଦା ଆହିମାଞ୍ଜେରି ? ୨୦ ନାନୁ ମିଞ୍ଜେ ସାତା ଖେସିମାଞ୍ଜାଇ, ମୀରୁ ଦୁକୁଆହ୍ମ ତୀଦେରି, ସାମା ଦାରତି ରାହାଁ କିନେ; ମୀରୁ ଦୁକୁ ଆଦେରି, ସାମା ମୀ ଦୁକୁ ରାହାଁତା ତିରି ମୀଣନେ । ୨୧ ଜାନ କିନି ବେଲା ଖାଡ଼ିସାରେ ଇୟା ଦୁକୁ ବେଟାଆନେ; ସାମା ଏଦି କକାଶାଇ ଜାନ କିତି ତାୟୁ ଦାରତିତା ର ମାଣସି ଜାର୍ନା ଆହାମାନେସି, ଇ ରାହାଁତାକି କସ୍ତତି ଅଣ୍ଡିପେଏଦେଁ । ୨୨ ଏଲେକିହ୍ମ ଏ ମୀରୁ ନୀଏଁ ଦୁକୁ ବେଟାଆହିମାଞ୍ଜେରି, ସାମା ନାନୁ ଅଡ଼େ ଖେଣ୍ଡେ ମିଞ୍ଜେ ତଞ୍ଜା ଆୟାଇ, ଅଡ଼େ ମୀ ହିୟାଁ ରାହାଁ ଆନେ ଅଡ଼େ ଆମ୍ବାଆସି ମୀ ତାଣାଟି ମୀ ରାହାଁ ମୀଞ୍ଜା ଅୟସି ।”

୨୩ “ଏ ଦିନା ମୀରୁ ନାଙ୍ଗେ ଏନାଆଁ ଖେଞ୍ଜଅତେରି । ନାନୁ ମିଙ୍ଗେ ସାତା ଖେସିମାଞ୍ଜାଇ, ମୀରୁ ଆବାଇଁ ଏନାଆଁ ରାହ୍‌ଦେରି, ଏଞ୍ଜାସି ନା ଦରୁତଲେ ମିଙ୍ଗେ ହିୟାନେସି । ୨୪ ନୀର୍ବ ପାତେକା ନା ଦରୁତଲେ ଏନାଆଁ ରାସା ହିଲଅତେରି; ରାହ୍‌ଦୁ, ଏନିକ୍ ମୀ ରାହ୍‌ଆଁ ଗାତି ଆନେ, ଏଦାଆଁତାକି ମୀରୁ ଏଦାଆଁ ବେଟାଆଦେରି ।”

ଦାର୍ତ୍ତିତା ଜୀଣା ଆନାୟି

୨୫ “ନାନୁ ମିଙ୍ଗେ ପୁଣ୍ଡିକିନି କାତାତଲେ ଇ ବାରେ ଖେସାମାଞ୍ଜାଇ; ଦିନା ଖାହିମାନେ, ଏଚିବେଲା ନାନୁ ଅଡେ ପୁଣ୍ଡିକିନି କାତାତଲେ ମିଙ୍ଗେ ଖେସୁଅଁ, ଆବାତି କାତା ତୀରେତଲେ ଖେସୁାଇଁ । ୨୬ ଏ ଦିନା ମୀରୁ ନା ଦରୁତଲେ ରାହ୍‌ଦେରି; ଅଡେ ନାନୁ ମୀ ଖାକିଟି ଆବାଇଁ ବାତିମାଲିଇଁ, ଇ କାତା ନାନୁ ମିଙ୍ଗେ ଖେସିମାଞ୍ଜାଅଁ; ୨୭ ଇଚିହିଁ ଆବା ତାନୁଏ ମିଙ୍ଗେ ଜୀଝୁ ନହ୍‌ମାଞ୍ଜାନେସି, ମୀରୁ ନାଙ୍ଗେ ଜୀଝୁନହିଁ ମାଞ୍ଜାଦେରି ଅଡେ ନାନୁ ମାହାପୁରୁ ତାଣାଟି ଖାହାମାଇଁ, ଏଦାଆଁ ମୀରୁ ନାମାମାଞ୍ଜେରି । ୨୮ ନାନୁ ଆବା ତାଣାଟି ଦାର୍ତ୍ତିତା ଖାହାମାଇଁ; ଦାର୍ତ୍ତି ପିସାନା ଖେଣ୍ଡେ ଆବା ତାଣା ହାଜିମାଇଁ ।”

୨୯ ଇ ହାତା ଖେଞ୍ଜାନା ସୀସୁୟାଁ ଏଞ୍ଜାଣାଇଁ ଏଲେଇଚେରି, “ନୀର୍ବ ନାନୁ ପୁଣ୍ଡିକିନି କାତା ଲେମ୍ବାଆନା ତୀରେତଲେ ଖେସିମାଞ୍ଜି । ୩୦ ନାନୁ ବାରେ କାତା ପୁଞ୍ଜାମାଞ୍ଜି, ଆମ୍ବାଆସି ନିଙ୍ଗେ ଖେଞ୍ଜାନାୟି ଲଡା ହିଲେଏ, ଏଦାଆଁ ନୀର୍ବ ମାମ୍ବୁ ଦୁଚମି; ମାହାପୁରୁ ତାଣାଟି ଖାହାମାଞ୍ଜି ଇଞ୍ଜିଁ ମାମ୍ବୁ ଇ କାତା ନାମି ମାନମି ।”

୩୧ ଜୀସୁ ଏଞ୍ଜାରାଇଁ ଏଲେଇଚେସି, “ମୀରୁ ଏନାଆଁ ନୀର୍ବ ନାମିମାଞ୍ଜେରି? ୩୨ ମେହ୍‌ଦୁ ଦିନା ଖାହିମାନେ, ଏ ବେଲା ଖାଡେୟିଏ, ଏଚିବେଲା ମୀରୁ ଇତାଲା ଆତାଲା ଆହାନା ବାରେଜାଣା ଜାହାରା ଇଜ ହାଜେରି, ଅଡେ ନାଙ୍ଗେ ରଅତେର୍ବ କିୟାଦେରି; ଆଡିଜିକେଏ ନାନୁ ରଅତେର୍ବ ଆଏ, ଇଚିହିଁ ଆବା ନା ତଲେ ମାନେସି । ୩୩ ମୀରୁ ଏନିକ୍ ନା ତାଣାଟି ହିଡ଼ଡି ବେଟାଆଦେରି, ଏଦାଆଁତାକି ନାନୁ ମିଙ୍ଗେ ଇ ବାରେ କାତା ଖେସାମାଞ୍ଜାଇଁ । ଦାର୍ତ୍ତିତା ମିଙ୍ଗେତାକି ହାରେକା ସାସ୍ତି ମାନେ, ସାମା ସାସା ଆହ୍‌ଦୁ; ଇଚିହିଁ ନାନୁ ଦାର୍ତ୍ତିତା ଜୀଣା ଆହାମାଇଁ ।”

୧୭

ଜୀସୁ ତାନି ସୀସୁୟାକି ପ୍ରାତାନା କିନାୟି

୧ ଜୀସୁ ଇ ବାରେ କାତା ଏଲେଇଞ୍ଜା ଲାକପୁରୁ ଝାକି ସିନିକିହାନା ଏଲେଇଚେସି, “ଆବା, ବେଲା ଆଡେୟିଏ; ନୀ ମୀରଏଣାଇଁ ଗାଝୁରମି କିମ୍ପୁ ଏନିକିମ୍ପୁ ମୀରଏସି ନିଙ୍ଗେ ଗାଝୁରମି କିୟାନେସି । ୨ ନୀନୁ ଏଝାଣାଇଁ ବାରେ ମାଣସି କୂଡାତି ମୁହେଁ ଅଦିକାରା ହୀହାମାଞ୍ଜି । ଅଡେ ଆମ୍ବାଆରାଇଁ ଏଝାଣି କେୟୁତା କାଲାକାଲାତି ଜୀସୁ ହୀହାଲିତାକି ହେରପାମାଞ୍ଜି ଏଝାଣାକି ବାଡୁମୁ ହୀହାମାଞ୍ଜି । ୩ ଅଡେ ରଣିଏ ସାତା ମାହାପୁରୁତି ନୀନୁ, ନିଙ୍ଗେ ଅଡେ ନୀ ତାଣାଟି ପାଣ୍ଡୁଝିଆହାମାନି ଜୀସୁ କ୍ରୀସୁଇଁ ପୁନାୟି ଆହିମାନେ କାଲାକାଲାତି ଜୀସୁ । ୪ ନୀନୁ ନାଙ୍ଗେ ଏମିନି କାମା କିହାଲି ହୀହାମାଞ୍ଜାଦି, ଏଦାଆଁ ନାନୁ ରାପ୍‌ହାନା ଦାରତିତା ନିଙ୍ଗେ ଗାଝୁରମି କିହାମାଞ୍ଜାଇଁ । ୫ ଏ ଆବା ଦାରତି ଗାଡ଼ି ଆଆ ନକେଏ ନୀ ତଲେ ନା ଏମିନି ଗାଝୁରମି ମାଚେ, ଏମ୍ବାଟି ନୀନୁ ନାଙ୍ଗେ ନୀ ତଲେ ଗାଝୁରମି କିୟାମୁ ।”

୬ “ନୀନୁ ନାଙ୍ଗେ ଦାରତି ବିତ୍ରାଟି ଏମିନି ଲକୁଣି ନାଙ୍ଗେ ହୀହାମାଞ୍ଜାଦି, ନାନୁ ନୀ ଦରୁ ଏଝାରି ନକିତା ତସାମାଇଁ; ଏଝାରି ନୀ ଲକୁ ମାଚେରି ଅଡେ ନୀନୁ ଏଝାରାଇଁ ନାଙ୍ଗେ ହୀହାମାଞ୍ଜାତି, ଏଝାରି ନୀ ବଲୁତି ମାନଝି ଆହାମାନେରି । ୭ ନୀନୁ ନାଙ୍ଗେ ଏନା ଏନାଆଁ ହୀହାମାଞ୍ଜାଦି, ଏ ବାରେ ନୀ ତାଣାଟି ଝାହାମାନେ, ଇଦାଆଁ ନୀଏଁ ଏଝାରି ପୁଞ୍ଜାମାନେରି । ୮ ଇଚିହଁ ନୀନୁ ନାଙ୍ଗେ ହୀହାମାଞ୍ଜାନି ବଲୁ ନାନୁ ଏଝାରାକି ହୀହାମାଇଁ, ଅଡେ ଏଝାରି ଆବା ମାନେରି ଇଞ୍ଜା ନାନୁ ନୀ ତାଣାଟି ଝାହାମାଇଁ, ଏଦାଆଁ ସାତା ତଲେ ପୁଞ୍ଜାମାନେରି, ଅଡେ ନୀନୁ ନାଙ୍ଗେ ପାଣ୍ଡାମାଞ୍ଜାଦି ଇଞ୍ଜିଏଁ ଏଝାରି ନାମାନେରି ।”

୯ “ନାନୁ ଏଝାରି ତାକି ପ୍ରାତାନା କିହିମାଇଁ; ଦାରତି ତାକି ପ୍ରାତାନା କିହିହିଲଅଁ, ସାମା ନୀନୁ ନାଙ୍ଗେ ଏମିନି ଗାଟାରାଇଁ ହୀହାମାଞ୍ଜାଦି, ଏଝାରି ତାକି ପ୍ରାତାନା କିହିମାଇଁ, ଇଚିହଁ ଏଝାରି ନୀ ଲକୁ; ୧୦ ଏନା ଏନାୟି ନାଦି ମାନେ ଏ ବାରେ ନୀଦି, ଅଡେ ଏନା ଏନାୟି ନୀଦି ମାନେ, ଏ ବାରେ ନାଦି ଅଡେ ଏଝାରି ତାଣାଟି ନାନୁ ଗାଝୁରମି ଆହିମାଇଁ । ୧୧ ନାନୁ ଅଡେ ଇ ଦାରତିତା ଡୟିହିଲଅଁ, ସାମା ଇଝାରି

ଦାର୍ତ୍ତିତା ଡ଼ୟିମାନେରି, ଇଞ୍ଜା ନାନୁ ନୀ ତାଣା ଖାହିମାଇଁ; ସୁଦୁଗାଟି ଆବା ଆମିନି ଗାଟାରାଇଁ ନୀ ଦରୁତ ବାଡ଼ୟୁ ତଲେ ନାଢେଁ ହେରପା ମାଞ୍ଜାଦି ଏଞ୍ଜାରାଇଁ ଗେଲପାମୁ,* ନୀନୁ ଅଡେ ନାନୁ ଏନିକ୍ ରଣ୍ଡିଏ ଆହାମାନାୟି ଏଲେକିହିଁ ଏ ଏଞ୍ଜାରାଇଁ ଜିକେଏ ରଣ୍ଡିଏ କିହାଲି ସାୟେମି କିମୁ । ୧୭ ☆ଏଞ୍ଜାରିତଲେ ମାଟିବେଲାତା ନାନୁ ଏଞ୍ଜାରାଇଁ ନୀ ଦରୁତଲେ ଗେଲପାମାଇଁ, ଆମିନି ଦରୁ ନାନୁ ନାଢେଁ ହାହାମାଞ୍ଜାଦି, ଅଡେ ନାନୁ ଏଞ୍ଜାରାଇଁ ଜାଗ୍ରାତା ତଲେ ଗେଲପାମାଇଁ,† ଦାମ୍ ପତି ଏନିକ୍ ପୁରା ଆନେ, ଏଦାଆଁତାକି ଏଞ୍ଜାରି ନାସା ଆନାୟି ମାଟି ଜିକେଏ, ରଅସି ଜିକେଏ ନାସା ଆହାହିଲଅସି । ୧୩ ସାମା ନୀଏଁ ନାନୁ ନୀ ତାଣା ଖାହିମାଇଁ, ଅଡେ ଦାର୍ତ୍ତିତା ମାଞ୍ଜା ମାଞ୍ଜାନା ନା ରାହାଁତା ଏଞ୍ଜାରି ହିୟାଁ ଏନିକ୍ ରାହାଁ ଆନେ, ଏଦାଆଁତାକି ନାନୁ ଇ ବାରେ କାତା ଖେସିମାଞ୍ଜାଇଁ । ୧୪ ନାନୁ ଏଞ୍ଜାରାକି ନୀ ବଲୁ ହାହାମାଇଁ, ଏଦାଆଁତାକି ଦାର୍ତି ଏଞ୍ଜାରାଇଁ ଅପିହିଲେଏ, ନାନୁ ଏନିକ୍ ଦାର୍ତିଟି ଖାହାହିଲଅଁ ଏଞ୍ଜାରି ଜିକେଏ ଇ ଦାର୍ତିତାରି ଆଏ । ୧୫ ନାନୁ ଏଞ୍ଜାରାଇଁ ଇ ଦାର୍ତିଟି ଅହିଁ ହାଲାମୁ ଇଞ୍ଜାଁ ବାତିମାଲି ମାଞ୍ଜାଅଁ, ସାମା ଏଞ୍ଜାରାଇଁ ଲାଗେଏତି ପାନ୍ଦାଟି ଗେଲପାମୁ ଇଞ୍ଜାଁ ବାତିମାଲିମାଞ୍ଜାଇଁ । ୧୬ ନାନୁ ଏନିକ୍ ଦାର୍ତିଟି ଖାହାହିଲଅଁ, ଏଞ୍ଜାରି ଏଲେକ୍ ଦାର୍ତିଟି ଖାହାହିଲଅରି । ୧୭ ସାତା ତଲେ ଏଞ୍ଜାରାଇଁ ସୁଦୁ କିମୁ, ଇଚିହିଁ ନୀ ବଲୁଏ ସାତା । ୧୮ ନାନୁ ଏନିକ୍ ନାଢେଁ ଦାର୍ତିତା ପାଣ୍ଡାମାଞ୍ଜାଦି, ନାନୁ ଜିକେଏ ଏଞ୍ଜାରାଇଁ ଦାର୍ତିତା ପାଣ୍ଡାମାଇଁ । ୧୯ ଅଡେ ଏଞ୍ଜାରି ଜିକେଏ ଏନିକ୍ ସାତା ତଲେ ସୁଦୁ ଆନେରି, ଏଦାଆଁତାକି ନାନୁ ଏଞ୍ଜାରି ତାକି ନାଢେଁ ସୁଦୁ କିହିମାଇଁ ।”

୨୦ “ନାନୁ ଖାରଇ ଏଞ୍ଜାରି ତାକି ପ୍ରାତାନା କିହିହିଲଅଁ, ଏଞ୍ଜାରି ବଲୁ ଖେଞ୍ଜାନା ଆମାଆସି ନା ତାଣା ନାମିନେସି, ଏଞ୍ଜାରି ତାକି ଜିକେଏ ପ୍ରାତାନା କିହିମାଇଁ । ୨୧ ଏନିକ୍ ଏଞ୍ଜାରି ବାରେ ରଣ୍ଡିଏ ଆନେରି; ଏ, ଆବା ନାନୁ ଏନିକ୍ ନା ତାଣା ମାଞ୍ଜି ଅଡେ ନାନୁ ନୀ ତାଣା ମାଇଁ, ଏଞ୍ଜାରି ଜିକେଏ ଏଲେକିହିଁ ଏ ମା ତାଣା ଡ଼ୟାପେରି, ଏନିକ୍

* ୧୭:୧୧ ୧୭:୧୧ ଇ କାତା ପୁଃଇ ପତିତା ହିଲେଏ । ☆ ୧୭:୧୨ ୧୭:୧୨ ଜହ ୧୩:୧୮

† ୧୭:୧୨ ୧୭:୧୨ ଇ କାତା ପୁଃଇ ପତିତା ହିଲେଏ ।

ନୀନୁ ନାଢ଼େ ପାଣ୍ଡାତି ଇଞ୍ଜିଁ ଦାରତି ନାମିନେ । ୨୨ ଅଡ଼େ ନୀନୁ ନାଢ଼େ ଏମିନି ଗାଞ୍ଜୁରମି ହାହାମାଞ୍ଜାଦି, ନୀନୁ ଏଦାଆଁ ଏଞ୍ଜାରାକି ହାହାମାଞ୍ଜା, ମାର ଏନିକିଁ ରଣ୍ଡିଏ ଏଞ୍ଜାରି ଏଲେକିଁ ରଣ୍ଡିଏ ଆନେରି; ୨୩ ନୀନୁ ଏନିକିଁ ନା ତାଣା ନୀନୁ ଏଲେକିହଁ ଏଞ୍ଜାରିତାଣା ଡ଼ୟିଇଁ । ଏନିକିଁ ଏଞ୍ଜାରି ମାନି ତଲେ ରଣ୍ଡିଏ ଆନେରି, ଇଞ୍ଜା ଦାରତି ପୁନେ କି ନୀନୁ ନାଢ଼େ ପାଣ୍ଡାମାଞ୍ଜାଦି, ନାଢ଼େ ଏନିକିଁ ଜୀଞ୍ଜୁ ନହଁ ମାଞ୍ଜାଦି ଏଞ୍ଜାରାଇଁ ଜିକେଏ ଏଲେକିହଁ ଏ ଜୀଞ୍ଜୁ ନହଁ ମାଞ୍ଜି ।”

୨୪ “ଏ ଆବା ! ନୀନୁ ଏଞ୍ଜାରାଇଁ ନା କେୟୁତା ହାହାମାଞ୍ଜାଦି । ନୀନୁ ଆମ୍ବିୟା ଡ଼ୟିଇଁ, ଏଞ୍ଜାରି ଜିକେଏ ଏନିକିଁ ଏମ୍ବାଆଁ ଡ଼ୟିନେରି ଅଡ଼େ ଦାରତି ଗାଡ଼ି ଆଆ ନଡ଼କଏ ନୀନୁ ନାଢ଼େ ଜୀଞ୍ଜୁ ନହଁମାଞ୍ଜାନାକି ନାଢ଼େ ଏମିନି ଗାଞ୍ଜୁରମି ହାହାମାଞ୍ଜାଦି, ନା ଏ ଗାଞ୍ଜୁରମି ଏନିକିଁ ଏଞ୍ଜାରି ମେସାଲି ଆଡ଼ିନେରି ଇଦି ନା ଅଣ୍ଡୁ । ୨୫ ଏ ଦାମ୍ବୁଗାତି ଆବା, ଦାରତି ନିଢ଼େ ପୁଞ୍ଜାମାଞ୍ଜେଏ, ସାମା ନୀନୁ ନିଢ଼େ ପୁଞ୍ଜାମାଞ୍ଜାଇଁ; ଅଡ଼େ ନୀନୁ ନାଢ଼େ ପାଣ୍ଡାମାଞ୍ଜାଦି, ଏଦାଆଁ ଇଞ୍ଜାରି ପୁଞ୍ଜାମାଞ୍ଜାନେରି; ୨୬ ନୀନୁ ନାଢ଼େ ଏମିନି ଜୀଞ୍ଜୁ ନହଁଟି ଜୀଞ୍ଜୁ ନହଁମାଞ୍ଜାଦି, ଏଦ ଏନିକିଁ ଏଞ୍ଜାରିତାଣା ଡ଼ୟିନେ ଅଡ଼େ ନୀନୁ ଏଞ୍ଜାରିତାଣା ଡ଼ୟିଇଁ, ଏଦାଆଁତାକି ନୀନୁ ଏଞ୍ଜାରାଇଁ ଖେସାମାଇଁ ଅଡ଼େ ଖେହୁଇଁ ।”

୧୮

ଜୀସୁ ସାତୁୟାଁ କେୟୁତା ହେରପି ଆନାୟି
(ମାତି ୨୨:୪୭-୫୭; ମାର୍କ ୧୪:୪୩-୫୦; ଲୁକ ୨୨:୪୭-୫୩)

୧ ଜୀସୁ ଇ ପ୍ରାତାନା ରାପ୍‌ହି ଡାୟୁ ତାନି ସୀସୁୟାଁ ତଲେ କିଦ୍ରଣ କାତା ଆତାଲା ହାଚେରି, ଏମ୍ବାଆଁ ର ବାଡ଼ା ମାଚେ, ଇଞ୍ଜା ଏଞ୍ଜାସି ତାନି ସୀସୁୟାଁ ତଲେ ଏମ୍ବାଆଁ ହଚେରି । ୨ ଏମିନି ଜୀହୁଦା ଏଞ୍ଜାଣାଇଁ ସାତୁୟାଁ କେୟୁତା ହେରପିତେସି, ଏଞ୍ଜାସି ଜିକେଏ ଏ ଟାୟୁତି ପୁଞ୍ଜାମାଚେସି, ଇଚିହଁ ଜୀସୁ ହାଚେକା ପାଲି ସୀସୁୟାଁ ତଲେ ଏ ଟାୟୁତା ହାଜାମାଚେସି । ୩ ଏଦାଆଁତାକି ଜୀହୁଦା ଜାମାନାଙ୍ଗା ଇଞ୍ଜା କାଜା ପୁଜେରା ଅଡ଼େ ପାରୁସିୟାଁ ତାଣାଟି ମାହାପୁରୁ ଇଲୁତି ଜାମାନାଙ୍ଗା ଲକୁ ଦୀଞ୍ଜି, ହିରୁ ବନ୍ଦାୟାଁ ଅଡ଼େ ଟେଙ୍ଗା ବାଲାୟାଁ ଆସାନା

ଏମ୍ବାଆଁ ଖାଡେରି । ୪ ଏମ୍ବାଟିଏ ଜୀସୁ ତାଙ୍ଗେତାକି ଏନା ଏନାଆଁ ଆହାଲି ହାଜିମାନେ ଏ ବାରେ ପୁଞ୍ଜାନା, ନକିତା ହାଜାନା ଏଞ୍ଜାରାଇଁ ଝେରେସି, “ମୀରୁ ଆମ୍ବାଆରାଇଁ ପାରିମାଞ୍ଜେରି ?”

୫ ଏଞ୍ଜାରି ଏଲେଇରେସି, “ନାଜରିତତି ଜୀସୁ ।”

ଜୀସୁ ଏଞ୍ଜାରାଇଁ ଏଲେଇରେସି, “ନାନୁ ଏଞ୍ଜାତେଏଁ ?”

ଏମିନି ଜୀହୁଦା ଏଞ୍ଜାଣାଇଁ ସାତୁୟାଁ କେୟୁତା ହେରପିତେସି, ଏଞ୍ଜାସି ଜିକେଏ ଏଞ୍ଜାରିତଲେ ଏମ୍ବାଆଁ ନିଚାମାରେସି । ୬ ଜୀସୁ ଏଚିବେଲା ଏଞ୍ଜାରାଇଁ ଏଲେଇରେସି, “ନାନୁ ଏଞ୍ଜାତେଏଁ” ଏଚିବେଲା ଏଞ୍ଜାରି ତାୟୁଞ୍ଜାକି ଗୁଚା ଆହାନା ବୁନିତା ତରଗା ହାରେରି । ୭ ଜୀସୁ ଝେଣ୍ଡେ ଝେରେସି, “ମୀରୁ ଆମ୍ବାଆରାଇଁ ପାରିମାଞ୍ଜେରି ?” ଏଞ୍ଜାରି ଏଲେଇରେସି, “ନାଜରିତତି ଜୀସୁଇଁ ।”

୮ ଜୀସୁ ଏଲେଇରେସି, “ନାନୁ ଝେସାମାଞ୍ଜାଇଁ, ନାନୁ ଏଞ୍ଜାତେଏଁ । ମୀରୁ ନାଙ୍ଗେ ପାରିମାଞ୍ଜାଦେରି ଇଚିହଁ ଇଞ୍ଜାରାଇଁ ପିହୁଦୁ । ୯ ଆମ୍ବାଆରାଇଁ ନାଙ୍ଗେ ହାହାମାଞ୍ଜାଦି, ଏଞ୍ଜାରି ବିତ୍ରାଟି ରଥଣାଇଁ ଜିକେଏ ଜାକ୍‌ହା ହିଲଅଁ ।” ଏନିକଁ ଦାମ୍‌ ପତିତି କାତା ସାତା ଆନେ ଏଦାଆଁତାକି ଏଲେ ଇରେସି ।

୧୦ ସିମନ ପିତର ତାନି ତାଣ୍ଡା କାଣ୍ଡା ମାଚାକି ଏଞ୍ଜାସି କାଜା ପୂଜେରା ହଲେଏଣା ଚିଃନି କିୟଁ ଦୁାଡେସି, ଏଞ୍ଜାଣି ଦରୁ ମାଲକସ । ୧୧ ☆ ଏରେଟିଏ ଜୀସୁ ପିତରଇଁ ଏଲେଇରେସି, “କାଣ୍ଡା, କାଣ୍ଡା ଇଚିନି ଚାୟୁତା ଇଚାମ୍‌: ନୀନୁ ଏନାଆଁ ଅଣ୍‌ପିମାଞ୍ଜି, ଆବା ମାହାପୁରୁ ନାଙ୍ଗେ ହାହାମାଞ୍ଜାନି ଦୁକୁତି ସଲାତା ଗସାଲି ଆଡଅଁ କି ?”

ହାନାନ ନକିତା ଜୀସୁ

୧୨ ଏମ୍ବାଟିଏ ରମିୟ କସ୍କା, ଇଞ୍ଜା ରିଜାରି କସ୍କା ମୁହେଁ କାଜାସି, ଅଡେ ଜୀହୁଦି ଲକୁତି କସ୍କା ଜୀସୁଇଁ ଆସାନା ଦସ୍‌ପିତେରି । ୧୩ ଏଞ୍ଜାଣାଇଁ ଦସ୍‌ପାନା ମୁଲୁଏ ହାନାନ ତାଣ୍ଡା ଅଡେରି, ଇଚିହଁ ଏଞ୍ଜାସି ଏ ବାସୀତି କାଜା ପୂଜେରା କୟାପାତି ପଡଲେଏସି ମାରେସି ।

☆ ୧୮:୧୧ ୧୮:୧୧ ମାତି ୨୭:୩୯; ମାର୍କ ୧୪:୩୭; ଲୁକ ୨୨:୪୨

୧୪ ✨ ଏ କନ୍ୟାପା ବାରେ ଲକୁ ତାକି ରଅସି ହାନାୟି ମିଙ୍ଗେ ତାକି ନେହେଁ
ଇଞ୍ଜି ଜୀହୁଦି ଲକୁଣି ଖେସାମାରେସି ।

ପିତର ଜୀସୁଇଁ ପୁଞ୍ଜାହିଲଅଁ ଇନାୟି

(ମାତି ୨୭:୨୯-୩୦; ମାର୍କ ୧୪:୨୭-୨୮; ଲୁକ ୨୨:୫୫-୫୯)

୧୫ ସିମନ ପିତର ଅଡ଼େ ର ସୀସୁ ଜୀସୁତି ଜେଚ ଜେଚ ହାଜିମାରେରି
। ଏ ସୀସୁ କାଜା ପୂଜେରା ତଲେ ପୁଣ୍ଡି ଆହାମାରେରି ଅଡ଼େ
ଜୀସୁତଲେ କାଜା ପୂଜେରା ଆଂଗେଣିତା ହାରେସି; ୧୬ ସାମା ପିତର
ପାଙ୍ଗାତି ଦୁଖେରି ଦାରିତା ନିଚାନା ଡିୟିତେସି । ସାମା ଏମିନି ସୀସୁ
କାଜା ପୂଜେରା ତଲେ ପୁଣ୍ଡି ଆହାମାରେରି, ଏଞ୍ଜାସି ପାଙ୍ଗାତା
ହାଜାନା ଦୁଖେରିତା କାଃଆନାଣାଇଁ ଏଲେଇଞ୍ଜାନା ପିତରଇଁ ବିତ୍ରା
ଅଡ଼େସି । ୧୭ ଏମ୍ବାଟିଏ ଦୁଖେରିତା କାଃଆନାଣି ହଲେଣି ପିତରଇଁ
ଏଲେଇଚେ, “ନାନୁ ଜିକେଏ ଏନାଆଁ ଇ ଲକୁତି ସୀସୁୟାଁ ବିତ୍ରାଟି
ରଅତି ଆଏକି ?”

ପିତର ଏଲେଇଚେସି, “ନାନୁ ଏଞ୍ଜାତେଏଁ ଆଏ ।”

୧୮ ଏଚିବେଲାତା ପେନି ଆହିମାଚାକି ହଲିୟାଙ୍ଗା ଅଡ଼େ
କାଃଆନାରି ହିରୁ ତାସାନା ସାରିଞ୍ଜାକି ନିଚାନା କେରଞ୍ଜି ମାରେରି;
ପିତର ଜିକେଏ ଏଞ୍ଜାରିତଲେ ନିଚାନା ହିରୁ କେରଞ୍ଜି ମାରେସି ।

କାଜା ପୂଜେରା ଜୀସୁଇଁ ଖେନାୟି

(ମାତି ୨୭:୫୯-୬୬; ମାର୍କ ୧୪:୫୫-୬୪; ଲୁକ ୨୨:୬୬-୭୧)

୧୯ କାଜା ପୂଜେରା ଜୀସୁଇଁ ତାନି ଜାପ୍ନାଣି ଇଞ୍ଜା ସୀସୁୟାଁତି କାତା
ଖେଚେସି । ୨୦ ଜୀସୁ ଏଲେଇଚେସି, “ନାନୁ ବାରେ ଦାରଡିତି ନକିତା
ତସାନା ଜାପ୍ନାମାଇଁ, ଆମ୍ବିୟା ବାରେ ଜୀହୁଦି ଲକୁ କୁଡ଼ା ଆନେରି,
ମାହାପୁର ଇଲୁତା ଅଡ଼େ ଜୀହୁଦି ଲକୁତି କୁଟେ ଇଲକାଣା*,
ଲକୁ କୁଡ଼ା ଆହାମାନି ବେଲାତା ନାନୁ ଜାପ୍ନାମାଇଁ, ଡକୁହାନା
ଏନାଆଁ କିହାହିଲଅଁ । ୨୧ ନାଙ୍ଗେ ଏନାଆଁତାକି ଖେଞ୍ଜିମାଞ୍ଜାଦି ?
ନାନୁ ଏଞ୍ଜାରାଇଁ ଏନାଆଁ ଏଲେଇଞ୍ଜାମାଇଁ, ଆମ୍ବାଆରି ଖେଞ୍ଜାମାନେରି

✨ ୧୮:୧୪ ୧୮:୧୪ ଜହ ୧୧:୪୯,୫୦ * ୧୮:୨୦ ୧୮:୨୦ ସିନଗଗ

ଏଞ୍ଜରାଇଁ ଖେନାମୁ; ନାନୁ ଏନା ଏନାଆଁ ଏଲେଇଞ୍ଜାମାଇଁ, ଏଞ୍ଜାରି ବାରେ ପୁଞ୍ଜାମାନେରି ।”

୨୭ ଜୀସୁ ଏଲେ ଇଞ୍ଜିମାନାଣି ଖେଞ୍ଜାନା ଦାରିତା ନିଚାମାଟି ମାହାପୁରୁ ଇଲୁ ଜାମାନାଙ୍ଗା ବିତ୍ରାଟି ରଅସି ଏଞ୍ଜାଣାଇଁ ସାପ୍ତା ଖେଚାନା ଏଲେଇରେସି, “ନିଙ୍ଗେ ଇଚେକା ସାସା କାଜା ପୂଜେରାଇଁ ଏଲେ ଇଞ୍ଜିମାଞ୍ଜି ?”

୨୮ ଜୀସୁ ଏଞ୍ଜାଣାଇଁ ଏଲେଇରେସି, “ନାନୁ ଲାଗେଏ ଜଲ୍ଲାମାଟିହିଁ; ଏ ଲାଗେଏତି ପାରମାଣା ହିୟାଦୁ; ନେହିଁ ଜଲ୍ଲାମାଇଁ ଇଚିହିଁ ଏନାଆଁତାକି ନାଙ୍ଗେ ଖେଚିମାଞ୍ଜାଦି ?”

୨୯ ଏମ୍ବାଟିଏ ହାନାନ ଜୀସୁଇଁ ଏଲେକିହିଁଏ ଦସ୍ପି ଆହାମାନାଣାଇଁ କାଜା ପୂଜେରା କୟାପା ତାଣା ପାଣ୍ଡିତେସି ।

**ପିତର ଜୀସୁଇଁ ଅଡେ ଖେଣ୍ଡେ ପୁଞ୍ଜାହିଲଅଁ ଇନାୟି
(ମାଟି ୨୭:୭୧-୭୫; ମାର୍କ ୧୪:୨୯-୩୧; ଲୁକ ୨୨:୫୮-୬୨)**

୨୫ ସିମନ ପିତର ହିରୁ ତାଗେ ନିଚାନା ହିରୁ କେରଞ୍ଜି ମାଚେସି, ଏମ୍ବାଟିଏ ଏଞ୍ଜାରି ଏଞ୍ଜାଣାଇଁ ଖେଚେରି, “ନାନୁ ଜିକେଏ ଏଞ୍ଜାଣି ସୀସୁୟା ବିତ୍ରାଟି ରଅତି ଆଏକି ?”

ପିତର ଏଲେଇରେସି, “ନାନୁ ଆଏ ।”

୨୬ ପିତର, ଏମିନି କାଜା ପୂଜେରା ହଲିୟାଙ୍ଗା ବିତ୍ରାଟି ରଅଣି କିୟାଁ ଦୁଦାତା ମାଚେସି, ଏଞ୍ଜାଣି କୁଟମିତାସି ଏଲେଇରେସି, “ନାନୁ ନିଙ୍ଗେ ବାଡାତା ଏଞ୍ଜାଣିତଲେ ମାଚାଣି ମେସାମାଞ୍ଜାଆତେଏଁ କି ?”

୨୭ ପିତର ଅଡେ ଖେଣ୍ଡେ ଏଲେଇରେସି, “ଆଏ ପୁଞ୍ଜାହିଲଅଁ ।” ଏଚିବେଲ୍ୟାତା କୟୁ କେଶ୍ତେ ।

**ପିଲାତ ତାଣା ଜୀସୁ
(ମାଟି ୨୭:୧, ୨, ୧୧-୧୪; ମାର୍କ ୧୫:୧-୫; ଲୁକ ୨୩:୧-୫)**

୨୮ ତାନି ଅର ନେରୁ ଲାଇଁ ଏଞ୍ଜାରି ଜୀସୁଇଁ କୟାପା ଇଲୁଚି ଅହାନା ରମିୟ ରାଜି ସାଲ୍ଲି କିନାଣି ମେଡା ଇଲୁତା ଏତେରି, ଜୀହୁଦି ଲକୁ ମେଡା ଇଲୁ ବିତ୍ରା ହାଲାଆତେରି, ଇଚିହିଁ ଏଦାଆଁ ତଲେ ପିସ୍ପିଆଡି ପାର୍ବୁତି ବକ୍ତି ତାକି ତାମଙ୍ଗେ ଲାଗେଏ କିହାକତାଲି ଅଣ୍ଡି ହିଲାଆତେରି । ୨୯ ଏଦାଆଁତାକି ସାଲ୍ଲି କିନି ପିଲାତ ଏଞ୍ଜାରିତାଣା

ପାଞ୍ଚାତା ଖାହାନା ଖେରେସି, “ଇ ମାଣ୍ଠି କପାଟି ମୀ ଏନ୍‌ଲେହେଟି ଦାଞ୍ଜା ମାନେ ?”

^{୩୦} ଏଞ୍ଜାରି ଏଞ୍ଜାଣାଇଁ ଏଲେଇରେସି, “ଇ ମାଣ୍ଠି ଲାଗେଏତି କାମା କିହା ହିଲାଆତିହିଁ ମା, ମାମ୍ବୁ ଏଞ୍ଜାଣାଇଁ ନୀ ତାଣା ତାଆତମିମା ।”

^{୩୧} ପିଲାତ ଏଞ୍ଜାରାଇଁ ଏଲେଇରେସି, “ଆତିହିଁ ଇଞ୍ଜାଣାଇଁ ଅହାନା ମୀ ମେରା ତଲେ ନୀହାୟି କିଦୁ ।” ଜୀହୁଦିୟାଁ ଏଞ୍ଜାଣାଇଁ ଏଲେଇରେସି, “ଆମ୍ବାଆରାଇଁ ହାନ୍ତି ତଣ୍ଡ ହୀହାଲି ମା ଅଦିକାରା ହିଲେଏ ।” ^{୩୨} ଜୀସୁ ଏନ୍‌କିଁ ହାହାଲି ହାଜିମାନେସି, ଏ କାତା ଜୀସୁ ଏନାଆଁ ଏଲେଇଞ୍ଜାମାରେସି, ଏଦି ଏନ୍‌କିଁ ପୂରା ଆନେ, ଏଦାଆଁତାକି ଏଞ୍ଜାରି ଏଲେଇରେସି ।

^{୩୩} ପିଲାତ ଖେଣ୍ଡା ମେଡା ଇଲୁ ବିତ୍ରା ହାଜାନା ଜୀସୁଇଁ ଖେରେସି, “ଏନାଆଁ ନୀନୁ ଜୀହୁଦି ଲକୁତି ରାଜାତି ?”

^{୩୪} ଜୀସୁ ଏଲେଇରେସି, “ଇ କାତା ନୀ ମନଟି ଖେଞ୍ଜିମାଞ୍ଜାଦି କି ଏଟକାତାରି ନା କାତାତି ନିଙ୍ଗେ ଏନାଆଁ ଏଲେଇଞ୍ଜା ମାଞ୍ଜାନେରି ?”

^{୩୫} ପିଲାତ ଏଲେଇରେସି, “ନୀନୁ ଏନାଆଁ ଅଣପାମାଞ୍ଜି, ନୀନୁ ର ଜୀହୁଦିତେଏଁ ? ନୀ କୂଡାତି ଲକୁ ଇଞ୍ଜା କାଜା ପୂଜେରାଞ୍ଜା ନିଙ୍ଗେ ତାଚାନା ନା କେୟୁତା ହେରପା ମାଞ୍ଜାନେରି । ଖେସ୍ତାମ୍ବୁ ନୀନୁ ଏନାଆଁ କିହାମାଞ୍ଜି ?”

^{୩୬} ଜୀସୁ ଏଲେଇରେସି, ନା ରାଜି ଇ ଦାର୍ତତିତାୟି ଆଏ; ନା ରାଜି ଦାର୍ତତିତାୟି ଆତିହିଁ ମା, ନୀନୁ ଜୀହୁଦି ଲକୁତାଣା ହେରପି ଆଆରେଟୁ ନାଙ୍ଗେ ସେବା କିୟାନାରି ନା ତାକି କୁକୁ କିତେରିମା, ସାମା ନା ରାଜି ସାତେଏ ଇ ଦାର୍ତତିତାୟି ଆଏ । ^{୩୭} ପିଲାତ ଏଞ୍ଜାଣାଇଁ ଖେରେସି, “ଆତିହିଁ ନୀନୁ ଜୀହୁଦି ଲକୁତି ରାଜାତି ?”

ଜୀସୁ ଏଲେଇରେସି, “ନୀନୁ ଏଲେ ଇଞ୍ଜିମାଞ୍ଜି ନୀନୁ ର ରାଜାତେଏଁ । ନୀନୁ ସାତା ଖାକିଟି ସାକି ହୀହାଲି ଜାର୍ନା ଆହାମାଇଁ ଅଡେ ଦାର୍ତତିତା ଖାହାମାଇଁ । ଆମ୍ବାଆସି ସାତାତି ମୀରଏସି ଏଞ୍ଜାସି ନା କାତା ଖେନେସି ।”

ଜୀସୁଇଁ ହାନ୍ତି ତଣ୍ଡ ହୀନାୟି

(ମାତି ୨୭:୧୫-୩୧; ମାର୍କ ୧୫:୬-୨୦; ଲୁକ ୨୩:୧୩-୨୫)

୩୮ ପିଲାତ ଝେରେସି, “ସାତା ଏନାୟି ?”

ପିଲାତ ପାଙ୍ଗାତା ହାଜାନା ଜୀହୁଦି ଲକୁଣି ଏଲେଇରେସି, “ନାନୁ ଇଝାଣି ତାଣା ଏନି ଦହ ବେଟାଆହି ହିଲଅଁ ।

୩୯ ସାମା ନାନୁ ପିସ୍‌ପିଆନି ପାର୍ଶୁ ବେଲାତା ମିଙ୍ଗେତାକି କାୟିଦିତା ମାନାରାଇଁ ରଅଣାଇଁ ପିସାଲି ତାକି ମୀ ମେରା ମାନେ, ଏଦାଆଁତାକି ଜୀହୁଦି ଲକୁଡି ରାଜାଇଁ ମାଙ୍ଗେତାକି ପିସା ହିୟାପେସି ଇଞ୍ଜିଁ ମୀ ମନ ମାନେକି ?” ୪୦ ଏମ୍ବାଟିଏ ଏଝାରି କାଲୁଡି ଆହୁଁ ଏଲେଇରେରି, “ଇଝାଣାଇଁ ଆଏ, ସାମା ବାରବାଇଁ †ପିସାହିୟାମ୍ ।”

୧୯

୧ ତାୟୁ ପିଲାତ ଜୀସୁଇଁ ଅହାନା ସାଟ୍‌ଣି ମାଡ଼ା କିଝି କିତେସି ।
୨ ଅଡେ ରିଜାରି କସ୍‌କା ହାପୁକା ଟପେରି ଆଲାନା ଜୀସୁ ତାୟୁଁ ତୁ ଇଚିତେରି, ଅଡେ ଏଝାଣାଇଁ ହେୟାଁ ଝାଣା ହିମ୍ବୁରି ହୁଚିକିତେରି;
୩ ଏଝାରି ଏଝାଣି ତାଣା ଝାହାନା ଏଲେଇରେରି, “ଏ ଜୀହୁଦିୟାଁ ରାଜା ଜହରା;” ଇଞ୍ଜାଁ ଏଝାରି ଏଝାଣାଇଁ ସାପୁଡ଼ା ଝେତେରି ।

୪ ପିଲାତ ଝେଣ୍ଡେ ପାଙ୍ଗାତା ହାଜାନା ଏଲେଇରେସି, “ନାନୁ ଏଝାଣି ତାଣା ଏନି ଦହ ବେଟାଆହି ହିଲଅଁ, ଇଦାଆଁ ଏନିକଁ ମୀରୁ ପୁଞ୍ଜେରି, ଇଦାଆଁତାକି ନାନୁ ଏଝାଣାଇଁ ମୀ ତାଣା ତାଟିମାଇଁ ।” ୫ ଏମ୍ବାଟିଏ ଜୀସୁ ଏ ହାପୁକା ଟପେରି ଅଡେ ହେୟାଁ ଝାଣା ହିମ୍ବୁରି ପର୍‌ହାନା ପାଙ୍ଗାତା ଝାଡେସି, ପିଲାତ ଏଝାରାଇଁ ଏଲେଇରେସି, “ମେହୁଦୁ ଇଝାସି ଏ ମାଣ୍‌ସି ।”

୬ ଏମ୍ବାଟିଏ କାଜା ପୁଜେରାଙ୍ଗା ଅଡେ ମାହାପୁରୁ ଇଲୁ କାଠ୍‌ଆନି ଜାମାନାଙ୍ଗା ଏଝାଣାଇଁ ମେସାନା କାଲୁଡି ଆହୁଁ ଏଲେଇରେରି, “ଏଝାଣାଇଁ ପାସି ଏକଦୁ ପାସି ଏକଦୁ ।” ପିଲାତ ଏଝାରାଇଁ ଏଲେଇରେସି, “ମୀରୁ ଏଝାଣାଇଁ ଅହାନା ପାସି ଏକଦୁ, ଇଚିହଁ ନାନୁ ଏଝାଣି ତାଣା ଏନି ଦହ ବେଟାଆହି ହିଲଅଁ ।”

୭ ଜୀହୁଦି ଲକୁ ଏଝାଣାଇଁ ଏଲେଇରେରି, “ଇଚିହଁ ମାଙ୍ଗେ ରଣ୍ଡିଏ ମେରା ମାନେ, ଏ ମେରାଲେହେଁଏ ଏଝାସି ହାନି ତଣ୍ଡ ବେଟାଆନାୟି

† ୧୮:୪୦ ୧୮:୪୦ ଇ ବାରବା ର ଡ଼ଗେସି ମାରେସି

ମାନେ, ଇଚିହ୍ମ ଏଞ୍ଜାସି ତାଙ୍ଗେ ମାହାପୁରୁତି ମୀରଏସି ଇଞ୍ଜି
ଝେସାମାନେସି ।”

୮ ଏମ୍ବାଟିଏ ପିଲାତ ଇ କାତା ଝେଞ୍ଜାନା ଗାତି ଆଜିତେସି । ୯ ଝେଣ୍ଡେ
ମେଡ଼ା ଇଲୁତା ହାଜାନା, ଜୀସୁଇଁ ଝେଚେସି, “ନୀନୁ ଆମ୍ବିଟି ଝାହାମାଞ୍ଜି
?” ସାମା ଜୀସୁ ସାପି ଆହାନା ଡିୟିତେସି । ୧୦ ପିଲାତ ଏଲେଇଚେସି,
“ନାଙ୍ଗେ ଜଲିମାଞ୍ଜଅତି ? ନିଙ୍ଗ ଗେଲପାଲି ନା ଅଦିକାରା ମାନେ
ଅଡ଼େ ପାସିତା ଏକହାଲି ନା ଅଦିକାରା ମାନେ ଇ କାତା ନୀନୁ
ପୁଞ୍ଜାହିଲଅତି ?”

୧୧ ଜୀସୁ ଏଲେଇଚେସି, “ମାହାପୁରୁ ତାଣାଟି ନିଙ୍ଗେ ଅଦିକାରା
ହୁଆତିହ୍ମ, ନା ଲାକ ନୀ ଏନି ଅଦିକାରା ହିଲାଆତେମା; ଇଞ୍ଜା
ଆମ୍ବାଆସି ନାଙ୍ଗେ ନୀ କେୟୁତା ହେର୍ପା ମାଞ୍ଜାନେସି ଏଞ୍ଜାଣି ପାପୁ
ହାରେକା ।”

୧୨ ଇ କାତା ଝେଞ୍ଜାନା ପିଲାତ ଜୀସୁଇଁ ପିସାଲି ତାକି ଅଣ୍ପିତେସି,
ସାମା ଜୀହୁଦି ଲକୁ କାଲୁଝି ଆହ୍ମ ଏଲେଇଚେରି, “ନୀନୁ
ଇଞ୍ଜାଣାଲ୍ ପିହୁଦି ଆତିହ୍ମ ନୀନୁ କାୟିସରତି ତଣେତି ଆଏ;
ଆମ୍ବାଆସି ଜାହାରାଲ୍ ରାଜା ଇନେସି ଏଞ୍ଜାସି କାୟିସର କପାଟି କାତା
ଜଲିମାନେସି ।”

୧୩ ପିଲାତ ଇ କାତା ଝେଞ୍ଜାନା ଜୀସୁଇଁ ପାଙ୍ଗାତା ଝାଲୁକାତି
ବେରଣିମାଣ୍ଡା ତାତେରି । ଏମିନାଣି ଏବୁ ହାଡ଼ାତଲେ “ଗବ୍‌ବତା”
ଇଞ୍ଜି ଇନେରି, ଏ ଟାୟୁଟି ବିଚାରା କିନି ଟାୟୁତା କୁଟିତେସି । ୧୪ ଏ
ଦିନା ପିସ୍‌ପିଆନି ପାର୍ବୁତି ତଲିତି ଦିନା ମାଚେ, ଏତିବେଲା ଲାଲ ସ
ଗଂଟା ଆହାମାଚେ । ଇଞ୍ଜା ଏଞ୍ଜାସି ଜୀହୁଦି ଲକୁଣି ଏଲେଇଚେସି,
“ଇଞ୍ଜାସି ମେହୁଦୁ ମୀ ରାଜା ।” ୧୫ ଏମ୍ବାଟିଏ ଏଞ୍ଜାରି ଏଲେଇଚେରି,
“ଏଞ୍ଜାଣାଲ୍ ପାୟାଦୁ, ପାୟାଦୁ, ପାସି ଏକଦୁ ।” ପିଲାତ ଏଞ୍ଜାରାଲ୍
ଏଲେଇଚେସି, “ନୀନୁ ମୀ ରାଜାଲ୍ ପାସିତା ଏକଲ୍ ?” କାଜା
ପୁଜେରାଙ୍ଗା ଏଲେଇଚେରି, “କାୟିସର ପିସ୍‌ପେ ମା ରାଜା ଆମ୍ବାଆସି
ହିଲଅସି ।”

୧୬ ତାୟୁ ପିଲାତ ଜୀସୁଇଁ ପାସି ମୁଣ୍ଡାତା ଏକହାଲି ତାକି ଏଞ୍ଜାରି
କେୟୁତା ହେର୍ପିତେସି, ଇଞ୍ଜା ତାୟୁ ଏଞ୍ଜାରି ଜୀସୁଇଁ ଅହ୍ମ ହାଚେରି
।

ଜୀସୁତି ପାସି ଆନାୟି

(ମାତି ୨୭:୩୨-୪୪; ମାର୍କ ୧୫:୨୧-୩୨; ଲୁକ ୨୩:୨୬-୪୩)

୧୭ ଏଚେଟିଏ ଏଞ୍ଜାରି ଜୀସୁଇଁ ଅଡ଼େରି; ଅଡ଼େ ଜୀସୁ ଜାହାରା ପାସିମୁଣ୍ଡା ଡେକାନା “ତାୟିଁ ରୁପା” ଇନି ଟାୟୁତା, ଇଚିହିଁ ଏମିନାଣି ଏବି ହାଡ଼ାତଲେ “ଗଲ୍‌ଗତା” ଇଞ୍ଜିଁ ଇନେରି ଏମ୍ପାଆଁ ହାଚେସି । ୧୮ ଏମ୍ପାଆଁ ଏଞ୍ଜାରି ଜୀସୁଇଁ ପାସି ମୁଣ୍ଡାତା ଏକହେରି, ଏଞ୍ଜାଣିତଲେ ଅଡ଼େ ରିଆରାଇଁ ପାସି ମୁଣ୍ଡାତା ଏକହେରି, ରିକଞ୍ଜାକି ରିଆରି ଅଡ଼େ ମାଦିଏ ଜୀସୁ । ୧୯ ଅଡ଼େ ପିଲାତ ର ଆକୁତା ରାଚାନା ପାସିମୁଣ୍ଡା ଲାକ ଆଟିକିତେସି, ଏମ୍ପାଆଁ ରାସୁକି ଆହାମାଚେ, “ନାଜରିତଡ଼ି ଜୀସୁ ଜୀହୁଦିୟାଁ ରାଜା ।” ୨୦ ଜୀହୁଦିୟାଁ ବିତ୍ରାଟି ହାରେକା ଏ ଆକୁତି ପଡ଼ୁଞ୍ଜି ଆଡେରି, ଇଚିହିଁ ଜୀସୁଇଁ ଏମିନିତାଣା ପାସି ଏପକି ଆହାମାଚେ, ଏଦି ଗାଡ଼ା ଡାଗେ ମାଚେ; ଇଞ୍ଜା ଏ ଆକୁ ଏବି, ଲାଟିନ୍ ଅଡ଼େ ଗିକ୍ ହାଡ଼ାତଲେ ରାସୁକି ଆହାମାଚେ । ୨୧ ଜୀହୁଦି ଲକୁତି କାଜା ପୂଜେରାଈଁ ପିଲାତଇଁ ଏଲେଇଚେରି, “ଜୀହୁଦିୟାଁ ରାଜା ଇଞ୍ଜିଁ ରାଚାଆନା, ନାନୁ ଜୀହୁଦି ଲକୁତି ରାଜା ଇଞ୍ଜିମାଚେସି ଇଞ୍ଜିଁ ରାଚାମୁ ।” ୨୨ ସାମା ପିଲାତ ଏଲେଇଚେସି, “ନାନୁ ଏନାଆଁ ରାଚାମାଇଁ ଏଲେକିହିଁ ଏ ଡ଼ୟିନେ ।”

୨୩ ରିଜାରି କସକା ଜୀସୁଇଁ ପାସିତା ଏକହି ଡେଚ ଏଞ୍ଜାଣି ହିମ୍ବରିକା ଅହାନା ସାରି ବାଗା କିତେରି, ର ର କହୁଏଣାକି ରଣ୍ଡାଲାକା, ଅଡ଼େ ଏଞ୍ଜାଣି ଲାମ୍ବା ସକା ଜିକେଏ ଅଡ଼େରି । ଏ ଲାମ୍ବା ସକା ତାଚାନା ହେରକି ଟିଏ ପାଃଆନା କଡାୟାଁ ପାଚେକା କିଞ୍ଜି ଆହାମାଚେ । ୨୪ ଏଦାଆଁତାକି ଏଞ୍ଜାରି ଏଲେଇଚେରି, “ଇଦାଆଁ ଗେହୁଆପ, ସାମା ଇଦି ଆମ୍ପାଆରାଞ୍ଜାୟି ଆନେ, ଏଦାଆଁତାକି ପାଦି କିନ ।” ଏନିକିଁ ଦାମ୍ପୁ ପଡ଼ିତି କାତା ପୂରା ଆନେ,

“ଏଞ୍ଜାରି ତାମି ବିତ୍ରା ନା ହିମ୍ବରିକା ବାଗା କିତେରି,
ଅଡ଼େ ନା ଲାମ୍ବା ସକାତାକି ପାଦି କିତେରି ।” ରିଜାରି କସକା
ସମାନା ଏଲେକିହିଁ ଏ କିତେରି ।

୨୫ ସାମା ଜୀସୁତି ପାସିମୁଣ୍ଡା ଡାଗେ ତାମି ଇୟା, ତାମି ଇୟାନି ତାଈଁ, କୁପାତି ଡକ୍ତି ମରିୟମ ଅଡ଼େ ମଗ୍‌ଦଲିନି ମରିୟମ ନିଚାମାଚୁ । ୨୬ ଜୀସୁ ତାମି ଇୟା ଅଡ଼େ ଏମିନି ସୀସୁଇଁ ଜୀହୁ ନହିଁ ମାଚେସି,

ଏଞ୍ଜେଲ୍ ତାଗେ ନିରାମାନାଣି ମେସାନା ଏଲେଇଚେସି, “ଏ ଇୟା ମେହ୍ମୁ ନୀ ମୀରଏସି !”

^{୨୭} ତାୟୁ ଜୀସୁ ଏ ସୀସୁଇଁ ଏଲେଇଚେସି, “ଇଦି ମୀ ଇୟା ।” ଏ ଦିନାଟିଏ ଏ ସୀସୁ ଜୀସୁତି ଇୟାନି ତାମି ଇଜ ଅଡେସି ।

ଜୀସୁ ହାକି

(ମାତି ୨୭:୪୫-୫୬; ମାର୍କ ୧୫:୩୩-୪୧; ଲୁକ ୨୩:୪୪-୪୯)

^{୨୮} ତାୟୁ ଜୀସୁ ଦାମ୍ନୁ ପତିତି ବଲୁ ଏନିକ୍ ପୂରା ଆନେ, ଏଦାଆଁତାକି ବାରେ ରାହାମାନେ ଇଞ୍ଜୁ ପୁଞ୍ଜାନା ଏଲେଇଚେସି, “ନାକ୍ଷେ ଏସ୍ତକି ହଡ଼ିମାଞ୍ଜାନେ ।”

^{୨୯} ଏମ୍ବାଆଁ ପୁଲ୍ଲାଏୟୁ ନେଞ୍ଜାମାନି ର ଡକା ମାଚେ; ଏଞ୍ଜାରି ଏମ୍ବାଆଁ ର ଡ୍ରାଃଆଲି ମୁସାନା ବାଲ୍ଲାତି ମୁନୁତା ରୁପାନା ଜୀସୁତି ଗୁଡିତା ହାଡେରି । ^{୩୦} ଏଚେଟିଏ ଜୀସୁ ଏ ପୁଲ୍ଲାଏୟୁ ଗସାନା ଏଲେଇଚେସି, “ରାହାହାଚେ” ଏଲେଇଞ୍ଜାନା ତାୟୁ ଚୁଲ୍ଲସାନା ହାଡେସି ।

ଜୀସୁ ପାଡ଼କା ଟଟତା ବାଲ୍ଲା ତଲେ ଉହ୍ନାୟି

^{୩୧} ପାସି ଏପକି ଆହାମାନାରି କଡାୟାଁ ଡିକ୍‌ହାନା ଏଞ୍ଜାରି ହାଡି ମାଡ଼ହାଡି ପାସି ମୁଣ୍ଡାଟି ରେପ୍‌ହା ତାଚାଲି ଜୀହୁଦି ଲକୁଇଁ କାଜାରି ପିଲାତଇଁ ବାଡିମାଲିଚେରି, ଇଚିହ୍ ଏ ଦିନା ସୁକ୍ତି ତାନି ଅର୍ ଦିନା ସୁଦୁ ଜମିନି ଦିନାତା ହାଡି ମାଡ଼ହା ପାସିମୁଣ୍ଡା ଲାକ ପିସାଲି ଏଞ୍ଜାରି ମନ କିହିହିଲାଆଚେରି । ^{୩୨} ଇଞ୍ଜା ରିଜାରି କସ୍‌କା ଖାହାନା ଜୀସୁତଲେ ପାସି ମୁଣ୍ଡାତା ଏକହାମାଟି ରିଆରି କଡାୟାଁ ଡିକ୍‌ହେରି । ^{୩୩} ସାମା ଏଞ୍ଜାରି ଜୀସୁ ତାଣା ଖାହାନା ଏଞ୍ଜାସି ହାହାମାନାଣି ମେସ୍‌ସେରି, ଏଦାଆଁତାକି ଏଞ୍ଜାରି ଏଞ୍ଜାଣି କଡାୟାଁ ଡିକ୍‌ଆଚେରି । ^{୩୪} ଆଡିଜିକେଏ କସ୍‌କା ବିତ୍ରାଟି ରଅସି ଜୀସୁତି ପାଡ଼କା ଟଟତା ବାଲ୍ଲା ତଲେ ଗୁକ୍‌ହେସି ଇଞ୍ଜା ଦେରୁଣିଏ ଏମ୍ବାଟି ଏୟୁ ଅଡେ ନେତେରି ହଡେ । ^{୩୫} ଆମ୍ବାଆସି ମେସାମାନେସି, ଏଞ୍ଜାସି ସାକି ହାହାମାନେସି, ଏନିକ୍ ମୀରୁ ଜିକେଏ ନାମିଦେରି; ଇଞ୍ଜା ଏଞ୍ଜାଣି ସାକି ସାତା, ଏଞ୍ଜାସି ସାତା ଖେସାମାନେସି ଇ କାତା ଏଞ୍ଜାସି ପୁଞ୍ଜାମାନେସି । ^{୩୬} ଇଚିହ୍ ଦାମ୍ନୁ ପତିତି କାତା ପୂରା ଆହାଲିତାକି ଇ ବାରେ ଆଡେ, “ଏଞ୍ଜାଣି ର

ତୁମ୍ଭ ଜିକେଏ ଡିକଅରି ।” ^{୩୭} ☆ ଦାର୍ମ୍ଭ ପତିତି ଅର କାତା ଇଦି, “ଏଞ୍ଜାରି ଆମ୍ବାଆରାଇଁ ବାଲା ତଲେ ଗ୍ଲୁକହା ମାଚାରି ଜିକେଏ ଏଞ୍ଜାଣାଇଁ ସିନିକିନେରି ।”

ଜୀସୁଇଁ ମୁହନାୟି

(ମାତି ୨୭:୫୭-୬୧; ମାର୍କ ୧୫:୪୨-୪୭; ଲୁକ ୨୩:୫୦-୫୬)

^{୩୮} ଇଦାଆଁ ତାୟୁ ହାରାମାତିୟାତି ଜସେପ ଇନାସି ପିଲାତ ତାଣା ହାଜାନା ଜୀସୁତି ଆଙ୍ଗା ଅହାଲି ବାତିମାଲିତେସି । ଇ ଜସେପ ଜୀସୁତି ର ସୀସୁ ମାଚେସି, ସାମା ଜୀହୁଦି ଲକ୍ଷୁତି କାଜାରି ଆଜିତାକି ତଗ୍ଲାନା ମାଚେସି, ପିଲାତ ଏଞ୍ଜାଣାଇଁ ହେଲ ହୀହାଲିଏ ଏଞ୍ଜାସି ଜୀସୁତି ଆଙ୍ଗା ମୁସାଲି ଅଡେସି । ^{୩୯} ☆ ଏଞ୍ଜାଣିତଲେ ନିକଦିମ ମାଚେସି । ଇ ନିକଦିମ ର ଦିନା ଲାଆଁୟାଁ ଜୀସୁତଲେ କାତା ଆହାଲି ଖାହାମାଚେସି, ଏ ନିକଦିମ କଡେଦସ କେଜି ଗାନ୍ଦା ନିୟୁଁ ତାଚିହୁଁ ଖାହାମାଚେସି । ^{୪୦} ଏଞ୍ଜାରି ଜୀସୁତି ଆଙ୍ଗା ଅହାନା ଜୀହୁଦି ଲକ୍ଷୁତି ମୁହନି ମେରା ତଲେ ଏଦାଆଁ ଗାନ୍ଦା ନିୟୁଁତଲେ ପାଡାଡା ହିମ୍ବରି ରୁପିତେରି । ^{୪୧} ଜୀସୁ ଏମିନି ଚାୟୁତା ପାସି ମୁଶ୍ଟାତା ଏପକି ଆହାମାଚେସି ଏ ଦାରିତା ର ବାଡା ମାଚେ, ଏ ବିତ୍ରା ର ପୁଃନି ମାହଣି ମାଣ୍ଡା ମାଚେ, ଏମ୍ବାଆଁ ନକେଏ ଆମ୍ବାଆରାଇଁ ଇଚ୍ଚି ଆହାହିଲାଆଚେ । ^{୪୨} ଏ ଦିନା ଜୀହୁଦି ଲକ୍ଷୁତି ଜମିନି ଦାନାତି ନକିତି ଦିନା ମାଚାକି, ଗାଡି ହେକ ହାଲାଆନା ଏଞ୍ଜାରି ଜୀସୁତି ଆଙ୍ଗା ଅହାନା ମାହଣି ମାଣ୍ଡାତା ଇଚିତେରି ।

୨୦

ଞ୍ଜାରି ମାହଣି ମାଣ୍ଡା

(ମାତି ୨୮:୧-୮; ମାର୍କ ୧୬:୧-୮; ଲୁକ ୨୪:୧-୧୨)

^୧ ଞ୍ଜାରିତି ମୁଲୁ ଦିନା ଲାକ ଲାକ ଆନ୍ଦେରି ମାଞ୍ଜା ମାଞ୍ଜାନା ମଗ୍ଦଲିନି ମରୟମ ମାହଣି ମାଣ୍ଡା ଦାରିତା ଖାହାନା ଏମ୍ବାତି ଖାଲି ଗୁରା ଆହାମାନାଣି ମେସ୍ତେ । ^୨ ଇଞ୍ଜା ଏଦି ହଟି ହଟି ହାଜାନା ସିମନ ପିତର ଆମ୍ବାଆରାଇଁ ଜୀସୁ ଜୀସୁ ନହୁଁ ମାଚେସି, ଏ ସୀସୁୟାଁଇଁ

☆ ୧୯:୩୭ ୧୯:୩୭ ଝେ ବଲୁ ୧:୭ ☆ ୧୯:୩୯ ୧୯:୩୯ ଜହ ୩:୧,୨

ଏଲେଇଚେ, “ଆମ୍ବାଆରି ପ୍ରବୁଇଁ ମାହଣି ମାଣ୍ଡାଟି ଅହାମାନେରି, ଇଞ୍ଜା ଆମ୍ବିୟା ଇଟାମାନେରି ଏଦାଆଁ ମାମ୍ବୁ ପୁଞ୍ଜାହିଲଅମି ।”

୩ ଇ କାତା ୱେଞ୍ଜାନା ପିତର ଅଡ଼େ ଅର ସାସୁ ମାହଣି ମାଣ୍ଡା ଖାକି ହଚେରି । ୪ ଏଞ୍ଜାରି ରିଆରି ରହେଁଏ ହଚେରି, ଅର ସାସୁ ପିତରଇଁ ଡାୟୁ ପିସାନା ତଲିଏ ମାହଣି ମାଣ୍ଡା ଏଡେସି । ୫ ଏଞ୍ଜାସି ବଙ୍ଗାହାଁ ଏମିନି ପାଡ଼ାଡ଼ା ହିମ୍ବୁରି ଆଙ୍ଗାତା ରୁପା ମାଚେରି ଏମ୍ବାଆଁ ରିହାମାଚାଣି ମେସ୍ତେସି, ସାମା ବିତ୍ରା ହାଲାଆଡେସି । ୬ ଡାୟୁ ସିମନ ପିତର ଜିକେଏ ୱାଡେସି ଇଞ୍ଜା ମାହଣି ମାଣ୍ଡା ବିତ୍ରା ହଡାନା ସିନିକିଡେସି ଏମ୍ବାଆଁ ପାଡ଼ାଡ଼ା ହିମ୍ବୁରିକା ମାନ୍, ୭ ଇଞ୍ଜା ତାନି ତାୟୁଁ ତୁ ଦସାମାଟି ଏ ପାଡ଼ାଡ଼ା ହିମ୍ବୁରିକା ତଲେ ହିଲାଆଡେ ଏଡି ଏଟ୍ଟକା ମାଚେ । ୮ ଏଚିବେଲା ଏମିନି ସାସୁ ତଲିଏ ମାହଣି ମାଣ୍ଡା ଡାଗେ ୱାହାମାଚେସି, ଏଞ୍ଜାସି ଜିକେଏ ବିତ୍ରା ହଡାନା ମେସ୍ତେସି ଅଡ଼େ ନାମିଡେସି; ୯ ଇଚିହଁ ହାଡାରି ବିତ୍ରାଟି ଏଞ୍ଜାଣାକି ନିଙ୍ଗାଲି ଆଚେ, ଦାମ୍ବୁ ପଡ଼ିତି ଇ ବଲୁ ଏଚେ ପାଡେକା ଡେଲହା ହିଲାଆଡେରି । ୧୦ ଡାୟୁ ସାସୁୟାଁ ୱେଣ୍ଡେ ଇଜ ହାଚେରି ।

ଜାସୁ ମଗ୍ଦଲିନି ମରିୟମଇଁ ତଞ୍ଜା ଆନାୟି

(ମାତି ୨୮:୯, ୧୦; ମାର୍କ ୧୬:୯-୧୧)

୧୧ ସାମା ମରିୟମ ଡାହି ଡାହି ପାଙ୍ଗାତା ନିଚା ଡୟିଡେ; ଇଞ୍ଜା ଡାହି ଡାହି ବଙ୍ଗାହାଁ ମାହଣି ମାଣ୍ଡା ବିତ୍ରା ସିନିକିଡେ, ୧୨ ଜାସୁଡି ଆଙ୍ଗା ଏମିନି ଚାୟୁଡା ଇଟ୍ଟକି ଆହାମାଚେ, ଏମ୍ବାଆଁ ତାୟୁଁ ୱାକି ରଅସି ଅଡ଼େ କଡାୟାଁ ଖାକି ରଅସି ଦବଲା ହିମ୍ବୁରିକା ପରହାନା ରିଆରି ଦୁତୁୟା କୁଗାମାନାଣି ମେସ୍ତେ । ୧୩ ଏଞ୍ଜାରି ଏଦାନି ଏଲେଇଚେରି, “ଏ ଇୟା ଏନାଆଁତାକି ଡାହିମାଞ୍ଜି ?” ଏଡି ଏଞ୍ଜାରାଇଁ ଏଲେଇଚେ, “ଆମ୍ବାଆରି ନା ପ୍ରବୁଇଁ ଅହାମାନେରି, ଅଡ଼େ ଏଞ୍ଜାଣାଇଁ ଆମ୍ବିୟା ଇଟାମାନେରି ପୁଞ୍ଜାହିଲଅଁ ।”

୧୪ ଏଡି ଏଲେଇଞ୍ଜାନା ଡାୟୁଖାକି ସିନିକିହାନା ଜାସୁଇଁ ମେସ୍ତେ, ସାମା ଏଞ୍ଜାସି ଜାସୁ ପୁଞ୍ଜାଲି ଆଡାଆଡେ । ୧୫ ଜାସୁ ଏଦାନି ଏଲେଇଚେସି, “ଏ ଇୟା ଏନାଆଁତାକି ଡାହିମାଞ୍ଜି ? ଆମ୍ବାଆରାଇଁ ପାରିମାଞ୍ଜି ?”

ଏହି ଏଝାଣାଇଁ ବାଡ଼ା ଗାଟାସି ଇଞ୍ଜି ଅଣ୍ଟାପାନା ଏଲେଇଚେ,
“ବାବୁ ନାନୁ ଏଝାଣାଇଁ ଅହାମାଞ୍ଜି ଇଚିହିଁ ଆମ୍ବିୟା ଇଟାମାଞ୍ଜି,
ନାଞ୍ଜେ ଖେସ୍ତାମୁ ନାନୁ ଅଇଁ ।”

୧୭ ଜୀସୁ ଏଦାନି ଏଲେଇଚେସି, “ମରିୟମ !” ମରିୟମ
ଏଝାଣି ଝାକି ସିନିକିହାନା ଏବ୍ରି ହାଡ଼ାତଲେ ଏଲେଇଚେ, “ରାବୁନୁନି”
ଇଚିହିଁ ଏ ଗୁରୁ ।

୧୮ ଜୀସୁ ଏଦାନି ଏଲେଇଚେସି, “ନାଞ୍ଜେ ଆସା ଇଟାଲି
ଅଣ୍ଟାଆନି, ଇଚିହିଁ ନାନୁ ନୀଏଁ ପାତେକା ଆବା ତାଣା ହାଜାହିଲଅଁ;
ସାମା ନା ତାୟିୟାଁ ତାଣା ହାଜାନା କାରୁ ହୀମୁ, ନାନୁ ନା ଆବା ମୀ
ଆବା ନା ମାହାପୁରୁ ମୀ ମାହାପୁରୁ ତାଣା ହାଜିମାଇଁ ।”

୧୯ ମଗ୍ଦଲିନି ମରିୟମ ହାଜାନା, ନାନୁ ପ୍ରବୁଇଁ ମେସାମାଇଁ ଏଝାସି
ନାଞ୍ଜେ ଇ ବାରେ କାତା ଖେସାମାଞ୍ଜାନେସି ଇଞ୍ଜି ସୀସୁୟାଁଇଁ କାରୁ
ହୀତେ ।

ଜୀସୁ ସୀସୁୟାଁଇଁ ତଞ୍ଜା ଆନାୟି

(ମାତି ୨୮:୧୭-୨୦; ମାର୍କ ୧୬:୧୪-୧୮; ଲୁକ ୨୪:୩୬-୪୯)

୧୯ ଏ ଦିନା ଇଚିହିଁ ଝାରାତି ତଲିତି ଦିନା ମିଡ଼ଅଲ୍ଲା ବେଲ୍ଲା
ଏଚେତା ସୀସୁୟାଁ ଏମିନି ଇଲୁତା ଜୀହୁଦି ଲକୁତି ଆଜିତାକି
ଦାରାୟାଁ ସୁଶ୍ଚାମାଚେରି, ଏଚିବେଲ୍ଲା ଜୀସୁ ଝାହାନା ମାଦିଏ ନିଗାନା
ଏଲେଇଚେସି, “ମିଞ୍ଜେ ହିଡ଼ଡ଼ି ଆୟାପେ ।” ୨୦ ଏଝାସି ଏଲେଇଞ୍ଜାନା
ତାନି କେସ୍ତା, ପାଡ଼କା ଡ଼ଇକା ତଢ଼େସି, ଏମ୍ବାଟିଏ ସୀସୁୟାଁ ପ୍ରବୁଇଁ
ମେସାନା ରାହାଁ ଆଚେରି । ୨୧ ଜୀସୁ ଖେଶ୍ତେ ଏଲେଇଚେସି, “ମିଞ୍ଜେ
ହିଡ଼ଡ଼ି ଆୟାପେ ଆବା ଏନିକିଁ ନାଞ୍ଜେ ପାଶ୍ଚାମାଞ୍ଜାନେସି, ନାନୁ
ଜିକେଏ ମିଞ୍ଜେ ଏଲେକିହିଁଏ ପାଶ୍ଚିମାଞ୍ଜାଇଁ ।” ୨୨ ଏଲେଇଞ୍ଜାନା
ଏଝାରି ଲାକ ନେଞ୍ଜାନା ଏଲେଇଚେସି, “ସୁଦୁଜୀଝୁଇଁ ଆବାକତାଦୁ,
୨୩ ☆ମୀରୁ ମାଣସିୟାଁ ପାପୁ ମ୍ଲେକ୍‌ହିସାରେ, ମାହାପୁରୁ ଜିକେଏ ଏଝାରି
ପାପୁ ମ୍ଲେକ୍‌ନେସି; ଇଞ୍ଜା ଆମ୍ବାଆରି ପାପୁ ମ୍ଲେକ୍‌ଅତେରି, ଇଚିହିଁ
ଏଝାଣି ପାପୁ ମେଶ୍‌ଜେଏ ।”

ଜୀସୁ ଅଚେତ ତମା

☆ ୨୦:୨୩ ୨୦:୨୩ ମାତି ୧୭:୧୯; ୧୮:୧୮

୨୪ ସାମା ଜୀସୁ ଏଚିବେଲା ଖାହାମାଚେସି, ଏଚିବେଲାତା ବାରଜାଣା ବିତ୍ତା ତମା ଆମ୍ବାଆରାଇଁ ଦିଦୁମ ଇନେରି, ଏଝାସି ଏଝାରିତଲେ ହିଲାଆତେସି । ୨୫ ଏଚକାତି ସୀସୁୟାଁ ଏଲେଇଚେରି, “ମାମ୍ବୁ ଜୀସୁଇଁ ମେସ୍ତମି ।” ଇଞ୍ଜା ଏଝାସି ଏଝାରାଇଁ ଏଲେଇଚେସି, “ଏଝାଣି କେୟୁତି କୁଟିୟାଁ ସିନା ମେହୁଆତିହୁଁ ଅଡେ ଏ ବାରେ ତାଣା ନା ଖାଞ୍ଜୁ ଉହୁଆନା ଇଞ୍ଜା ଏଝାଣି ପାଡ଼କା ଡ଼ଇକା ତୀଗାଆନା ନାନୁ ଏଚେଲା ଜିକେଏ ନାମଅଁ ।”

୨୬ ଆଟାଦିନା ଜେଚ ତାନି ସୀସୁୟାଁ ଏ ଇଲୁତେଏ ମାଚେରି, ଅଡେ ତମା ଜିକେଏ ଏଝାରିତଲେ ମାଚେସି, ଦାଋୟାଁ ସୁଣ୍ଡକି ଆହାମାରୁ, ସାମା ଜୀସୁ ଖାହାନା ଏଝାରି ମାଦି ନିଚାନା ଏଲେଇଚେସି, “ମିଙ୍ଗେ ହିଡ଼ଡ଼ି ଆୟାପେ ।” ୨୭ ତାୟୁ ଏଝାସି ତମାଲ୍ ଏଲେଇଚେସି, “ଇମ୍ବାଆଁ ନୀ ଖାଞ୍ଜୁ ଉସାନା ସିନିକିମ୍ବୁ, କେୟୁ ଦାସାନା ନା ପାଡ଼କା ଡ଼ଇକା ତୀଗାମ୍ବୁ; ଆନାମାନା ଆଆନା ନାମାମ୍ବୁ ।”

୨୮ ତମା ଜୀସୁଇଁ ଏଲେଇଚେସି, “ନା ପ୍ରବୁ ନା ମାହାପୁରୁ ।”

୨୯ ଜୀସୁ ଏଝାଣାଇଁ ଏଲେଇଚେସି, “ନାନୁ ନାଙ୍ଗେ ମେସାନା ନାମିମାଞ୍ଜାଦି, ଆମ୍ବାଆରି ମେହୁଆନା ନାମିନେରି ଏଝାରି ନେହେଁ ।”

ଇ ପତି ଏନାଆଁତାକି ରାସ୍ତକି ଆହାମାନେ

୩୦ ଜୀସୁ ସୀସୁୟାଁ ନକିତା ହାରେକା କାବାଆନ୍ତି କାମାୟାଁ କିହାମାଚେସି, ଏଝି ବାରେ ଇ ପତିତା ରାସ୍ତକି ଆହାହିଲାଡ଼; ୩୧ ସାମା ମୀରୁ ଏନିକ୍ ନାମିଦେରି, ଜୀସୁ ମାହାପୁରୁ ମୀରୁଏସି ମସିହା,* ଇ କାତା ନାମାହାଁ ଏନିକ୍ ମୀରୁ ଏଝାଣି ଦରୁଟି ଜୀସୁ ବେଟାଆଦେରି, ଏଦାଆଁତାକି ଇ ବାରେ ରାସ୍ତକି ଆହାମାନେ ।

୨୧

ସାତା ଜାଣା ସୀସୁୟାଁ ଜୀସୁ ତଞ୍ଜା ଆନାୟି

୧ ଇଦାଆଁ ତାୟୁ ଜୀସୁ ତିବିରିୟା ସାମ୍ବୁଦ୍ଦରି ଗାରୁତା ସୀସୁୟାଁଇଁ ଖେଣ୍ଡେ ତଞ୍ଜାଆଡେସି; ୨ ଏମ୍ବାଆଁ ସିମନ ପିତର ତମା ଆମ୍ବାଆରାଇଁ ଦିଦୁମ ଇନେରି, ଗାଲିଲିତି କାନା ଗାଡ଼ାତି ନିତନିୟେଲ, ଜେବଦିତି

* ୨୦:୩୧ ୨୦:୩୧ କ୍ରୀସ୍ତ

ମୀରକା ଅଡ଼େ ତାନି ସୀସୁୟାଁ ବିତ୍ରାଟି ରିଆରି କୁଡ଼ା ଆହାମାଚେରି ।
 ୩ ✧ ସିମନ ପିତର ଏଝାରାଇଁ ଏଲେଇଚେସି, “ନାନୁ ମୀଶ୍ଟକା ଆସାଲି
 ହାଜିମାଇଁ ।” ଏଝାରି ଏଝାଣାଇଁ ଏଲେଇଚେରି, “ମୀସୁ ଜିକେଏ ନୀ
 ତଲେ ଖାନମି ।” ଏଝାରି ହାଜାନା ତଂଗତା ହଡ଼େରି, ଏ ଲାଆଁୟାଁ
 ଏଝାରି ଏନାଆଁ ଜିକେଏ ବେଟାଆଆଚେରି । ୪ ସାମା କୁଲୁପୁଲୁ
 ଆହାଲିଏ ଜୀସୁ ଗାରୁତା ନିତେସି; ଆଡ଼ିଜିକେଏ ଏଝାସି ଜୀସୁ ଇଞ୍ଜି
 ସୀସୁୟାଁ ପୁନାଆଚେରି । ୫ ଜୀସୁ ଏଝାରାଇଁ ଏଲେଇଚେସି, “ଏ
 କକାଚେରି ମୀ ତାଣା ଏନାଆଁ ମୀଶ୍ଟକା ମୀନୁ କି ?” ଏଝାରି “ଆଏ”
 ଇଚେରି ।

୬ ✧ ଏଝାସି ଏଝାରାଇଁ ଏଲେଇଚେସି, “ତଂଗତି ଚିଃନିଝାକି ଜାଲା
 ମେଡ଼ଦୁ, ଆତିହିଁ ମୀରୁ ବେଟାଆଡ଼େରି ।” ଏମ୍ବାଟିଏ ଏଝାରି ଜାଲା
 ମେଡ଼ହେରି, ଏମ୍ବାଆଁ ଇଚେକା ମୀଶ୍ଟକା ଖାତୁ ଏଝାରି ଏଦାଆଁ ରେଜାଲି
 ଆଡ଼ାଆଚେରି ।

୭ ଏମ୍ବାଟିଏ ଜୀସୁ ଏମିନି ସୀସୁଇଁ ଜୀସୁ ନହିଁ ମାଚେସି, ଏ ପିତରଇଁ
 ଏଲେଇଚେରି, “ଇଝାସିତ ପ୍ରବୁ ।” ସିମନ ପିତର ଇ କାତା ଖେଞ୍ଜାନା
 ତୁମ୍ବଣା ମାଚାକି ତାନି ସକା ତୁରହାନା ସାମ୍ବୁରିତା ଡ଼େଝିତେସି;
 ୮ ସାମା ଏଟକାତି ସୀସୁୟାଁ ନେଞ୍ଜାମାନି ମୀଶ୍ଟକା ଜାଲାତି ରେଜି ରେଜି
 ତଂଗତି ଗାରୁତା ତାଚେରି, ଇଚିହିଁ ଏଝାରି ଗାରୁଟିଏ ହାରେକା ହେକ
 ହାଜା ହିଲାଆଚେରି । ୯ ଏଝାରି ସାମ୍ବୁରି ଗାରୁତା ରେଚାନା, ଏମ୍ବାଆଁ
 ରାଙ୍ଗାୟାଁତି ହିରୁ ଇଞ୍ଜା ହିରୁ ଲାକ ମୀଶ୍ଟକା ଅଡ଼େ ରୁଟି ଇଟାମାନାଣି
 ମେସ୍ତେରି । ୧୦ ଜୀସୁ ଏଝାରାଇଁ ଏଲେଇଚେସି, “ମୀରୁ ନୀଏଁ ଏମିନି
 ମୀଶ୍ଟକା ଆସାମାଞ୍ଜେରି ଏମ୍ବାଟି ଇଚରା ତାଚିହିଁ ଖାତୁ ।”

୧୧ ସିମନ ପିତର ହାଜାନା ସାଡ଼ାକଡ଼ି ଡ଼େରଗଟା ମୀଶ୍ଟକା ମାଟି
 ଜାଲାତି ଗାରୁତା ରେଜା ତାଚେସି; ଇଚେକା ମୀଶ୍ଟକା ତାକି ଜିକେଏ
 ଜାଲା ତାମ୍ବାଆଚେ । ୧୨ ଜୀସୁ ଏଝାରାଇଁ ଏଲେଇଚେସି, “ଝାଦୁ ତିଞ୍ଜୁ
 ।” ସୀସୁୟାଁ ବିତ୍ରାଟି ଆମ୍ବାଆରି ଏଝାଣାଇଁ ନୀନୁ ଆମ୍ବାଆତି ଇଞ୍ଜି
 ଖେଞ୍ଜାଲି ସାସା କିଆଚେରି, ଇଚିହିଁ ଏଝାସି ପ୍ରବୁ ଇ କାତା ଏଝାରି
 ପୁଞ୍ଜାମାଚେରି । ୧୩ ଜୀସୁ ଖାହାନା ରୁଟି ଅହାନା ହାଚେସି, ଇଞ୍ଜା

ମୀଶାକା ଜିକେଏ ଏଲେକିହିଁଏ ହାତେସି । ୧୪ ଜୀସୁ ହାକିଟି ନିଜିତି ତାୟୁ ଇଦି ତାନି ପାଲି ତାକି ସୀସୁୟାଁଇଁ ତଞ୍ଜାଆଡେସି ।

ଜୀସୁ ଅଡେ ପିତର

୧୫ ଏଞ୍ଜାରି ତିଞ୍ଜାଲି ଆଡିତି ଦେଚ ଜୀସୁ ସିମନ ପିତରଇଁ ଝେଚେସି, “ଏ ଜହନତି ମୀରଏଶା ସିମନ ଏନାଆଁ ନୀନୁ ନାଜେ ଇଞ୍ଜାରି କିହା ହାରେକା ଜୀସୁ ନହଁ ମାଞ୍ଜାଦି ?” ଏଞ୍ଜାସି ଏଲେଇଚେସି, “ଏ ପ୍ରବୁ ନୀନୁ ନିଜେ ଜୀସୁନହଁ ମାଞ୍ଜାଇଁ ନୀନୁ ଏଦାଆଁ ପୁଞ୍ଜାମାଞ୍ଜି ।” ଜୀସୁ ଏଞ୍ଜାଶାଇଁ ଏଲେଇଚେସି, “ନା ମେଶ୍ଟା ତାଲକାଣି ତୀହମୁ ।” ୧୬ ଜୀସୁ ଝେଶ୍ଟେ ରୀ ପାଲି ତାକି ଝେଚେସି, “ଏ ଜହନତି ମୀରଏଶା ସିମନ ଏନାଆଁ ନୀନୁ ନାଜେ ଜୀସୁ ନହଁ ମାଞ୍ଜାଦି ?” ଏଞ୍ଜାସି ଏଲେଇଚେସି, “ଏ ପ୍ରବୁ ନୀନୁ ନିଜେ ଜୀସୁନହଁ ମାଞ୍ଜାଇଁ ନୀନୁ ଏଦାଆଁ ପୁଞ୍ଜାମାଞ୍ଜି ।” ଏଞ୍ଜାସି ଏଞ୍ଜାଶାଇଁ ଏଲେଇଚେସି, “ନା ମେଶ୍ଟାୟାଁଣି ପହିକିମୁ ।” ୧୭ ଜୀସୁ ଅଡେ ତାନି ପାଲି ତାକି ଝେଚେସି, “ଏ ଜହନତି ମୀରଏଶା ସିମନ ଏନାଆଁ ନୀନୁ ନାଜେ ଜୀସୁ ନହଁ ମାଞ୍ଜାଦି ?” ଏଲେଇଞ୍ଜି ତାନି ପାଲି ଝେଞ୍ଜାଲିଏ ଏଞ୍ଜାସି ଦୁକୁ ଆହାନା ଏଲେଇଚେସି, “ଏ ପ୍ରବୁ ନୀନୁ ବାରେ ପୁଞ୍ଜାମାଞ୍ଜି; ନୀନୁ ନିଜେ ଜୀସୁନହଁ ମାଞ୍ଜାଇଁ, ଏଦାଆଁ ନୀନୁ ପୁଞ୍ଜାମାଞ୍ଜି ।” ଜୀସୁ ଏଞ୍ଜାଶାଇଁ ଏଲେଇଚେସି, “ନା ମେଶ୍ଟାୟାଁଣି ଜାଡିନୁ ଅମୁ ।”

୧୮ ନୀନୁ ମିଜେ ସାତା ଝେସିମାଞ୍ଜାଇଁ, ନୀନୁ ଦୀଂଗଣା ମାନି ବେଲାତା ନୀ ଟେଡେଲି ରୁପା କତାନା ଆସିୟାଞ୍ଜାକି ନୀ ମନ ଏନିକା ରେଜିମାତି, ସାମା ବୁଡହା ଆଡିହିଁ ନୀନୁ ନୀ କେସ୍ତା ଦାହୁଦି ଇଞ୍ଜା ଅର ରଅସି ନୀ ଟେଡେଲିତା ଦସାନା ଆସିୟା ନୀ ମନ ହିଲେଏ ଏନିକା ରେଜା ଅୟାନେସି । ୧୯ ପିତର ଏନିଲେହେଁତି ହାକି ତଲେ ମାହାପୁରୁଇଁ ଗାଞ୍ଜୁରମି କିନେସି, ଏଦାଆଁ ପୁଶ୍ଟି କିହାଲି ଏଲେଇଞ୍ଜାମାଚେସି । ଏଲେଇତି ତାୟୁ ଏଞ୍ଜାସି ଏଞ୍ଜାଶାଇଁ ଏଲେଇଚେସି, “ନା ଦେଚ ଝାମୁ ।”

ଜୀସୁ ତାନି ଜୀସୁତି ସୀସୁ

୨୦ ☆ଜୀସୁ ଏମିନି ସୀସୁଇଁ ଜୀସୁ ନହୁଁ ମାରେସି, ଅଡ଼େ ଲାଆଁୟାଁ ବକ୍ତି ବେଲାତା ତାନି ବକତା ଲାବାନା ପ୍ରବୁ ନିଜେ ଆମ୍ବାଆସି ସାତୁୟାଁ କେୟୁତା ହେରପାନେସି ଇଞ୍ଜୁଁ ଖେଞ୍ଜାମାରେସି, ଏ ସୀସୁ ଜେଚ ଖାହିମାନାଣି ପିତର ଖେଣ୍ଡେ ତିରୁଖାନା ମେସେସି । ୨୧ ପିତର ଏଞ୍ଜାଣାଇଁ ମେସାନା ଜୀସୁଇଁ ଖେରେସି, “ପ୍ରବୁ ଇଞ୍ଜାଣି କାତା ଏନାଆଁ ଇଞ୍ଜିମାଞ୍ଜି ?”

୨୨ ଜୀସୁ ଏଞ୍ଜାଣାଇଁ ଏଲେଇରେସି, “ନା ଖାନି ଦିନା ପାତେକା ତୟାପେସି ଇଞ୍ଜୁଁ ନାନୁ ମନ କିଇଁ, ଆତିହୁଁ ଏମ୍ବାଆଁ ନୀଦି ଏନାୟି ମାନେ ? ନାନୁ ନା ଜେଚ ଖାମୁ ।”

୨୩ ଏମ୍ବାଟିଏ ଏ ସୀସୁ ହାଅସି, ଇ କାତା ତାୟିୟାଁ ବିତ୍ରା ଖେଙ୍ଗାହାରେ, ସାମା ଏଞ୍ଜାସି ହାଅସି ଇଞ୍ଜୁଁ ଜୀସୁ ଏଞ୍ଜାଣାଇଁ ଏଲେଇଞ୍ଜା ହିଲାଆତେସି, ସାମା ନା ଖାନି ଦିନା ପାତେକା ଏଞ୍ଜାସି ତୟାପେସି ଇଞ୍ଜୁଁ ନାନୁ ମନ କିଇଁ, ଆତିହୁଁ ଏମ୍ବାଆଁ ମୀ ଏନାୟି ମାନେ ଇଞ୍ଜୁଁ ଖେସାମାରେସି ।

୨୪ ଆମ୍ବାଆସି ଇ ବାରେ ସାକି ହାହିମାନେସି, ଅଡ଼େ ଇ ବାରେ ରାଚାମାନେସି, ଏଞ୍ଜାସି ଏ ସୀସୁ; ଅଡ଼େ ଏଞ୍ଜାଣି ସାକି ସାତା ଇଦାଆଁ ମାମୁ ପୁଞ୍ଜାମାନମି ।

ରାନି ହାଡ଼ା

୨୫ ଜୀସୁ ହାଚ୍ଚେ ହାଚ୍ଚେକା କାମାୟାଁ କିହାମାରେସି; ଏ ବାରେ ରଣ୍ଡା ରଣ୍ଡାଆଁ କିହୁଁ ରାଚିତିହୁଁମା, ଇଚେକା ପତିୟାଁ ରାସ୍‌କି ଆତୁମା, ଇଚିହୁଁ ନା ଅଣ୍ଡପୁତା ବାରେ ଦାର୍ତ୍ତିତା ଜିକେଏ ଏ ବାରେ ଇଟାଲି ଟାମୁ ଆଆତେମା ।

lxxxv

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33